

華陽國志

華陽國志

四部備要

史部

上海中華書局據顧校廖

刻本校刊

桐鄉 陸費達 總勘
杭縣 高時顯 輯校
吳汝霖
杭縣 丁輔之 監造

校刊華陽國志序

唐已前方志存者甚少惟三輔黃圖及晉常璩華陽國志最古三輔黃圖爲宋人增亂華陽國志明刻本俱缺卷十之上中兩卷近時始有補完本而皆舛誤不可讀予家益土念搜討古迹莫先於此志求善本不得前十餘年由中州葉令擢守京江唐刺史仲冕告予謂陽湖孫觀察星衍有季氏振宜家所錄宋嘉泰四年李至刻本擬卽借刊後以右遷觀察至豫章未遂其願及再來江淮司轉運之事官閣餘暇披閱此書因借數本合校之又參以書傳所引舊文訂定譌錯按李至序稱凡一事而先後失序本末舛逆者則考而正之一意而詞旨重複句讀錯雜者則刊而去之設或字誤而文理明白則因而全之是其本已經至刪改故蜀志汶山郡與越巂郡誤連而少汶山屬縣及漢嘉郡士女讚少巴郡第二又三國志注引此書有李宓陳情表而今本無之此類悉加補正或附按語以諭學者雖元豐閒呂

汲公大防所刻不可得見無以全復常氏舊觀其視至本則固有過之無不及矣元和顧茂才廣圻是正諸書最稱審密竭半歲之力爲予督工開雕故能精緻古雅不減宋元佳刻孫觀察雅好流傳古書又見近世脩志者空無故實慨古地理書多放佚嘗欲刊行舊本以備一方掌故先校刊三輔黃圖長安志於關中又刊建康志於江左每惜浙中未將乾道咸淳臨安兩志付梓又因脩志松江先刊楊潛雲閒志今此書成於晉魏之閒古字古義尤足證佐經史後有脩滇蜀方志者據以爲典則誠藝林之勝事也其書稱華陽者晉代梁益寧三州故禹貢梁州之域爲今四川省及雲南并陝西漢中迤南之境按禹貢華陽黑水惟梁州注疏以華爲華岳恐此華在迤東陽爲荊州非梁州秦本紀武公元年伐彭戲氏至於華山下居平陽封宮正義曰封宮在岐州平陽城內也則此華山在岐州之北其南正值梁益與太華不同黑水據括地志云源出梁州成固縣西北太山亦

與三危之黑水殊異說經者誤以此爲滇池之黑水又謂瀘水皆誤
然常氏書以此爲名而未記載辨析惟蜀志云五岳則華山表其陽
特用補其義云嘉慶十九年歲在甲戌清明節兩淮都轉鹽運司使
鄰水廖寅序

華陽國志序

先王之制自二十五家之閭書其恭敏任卹等而上之或月書其學
行或歲考其道德故民之賢能衰惡其吏無不與知之者焉漢魏以
還井地廢而王政闕然猶時有所考察旌勸而州都中正之職尙脩
於郡國鄉閭士女之行多見於史官隋唐急事緩政此制遂廢而不
舉潛德隱行非野史紀述則悉無見於時民日益漓俗日益卑此有
志之士所爲歎惜也晉常璩作華陽國志於一方人物丁寧反覆如
恐有遺雖蠻髦之民井臼之婦苟有可紀皆著於書且云得之陳壽
所爲耆舊傳按壽嘗爲郡中正故能著述若此之詳自先漢至晉初
踰四百歲士女可書者四百人亦可謂衆矣復自晉初至於周顯德
僅七百歲而史所紀者無幾人忠魂義骨與塵埃野馬同沒於丘原
者蓋亦多矣豈不重可歎息哉此書雖繁富不及承祚之精微然議
論忠篤樂道人之善蜀記之可觀未有過於此者鏤行於世庶有益

重刊華陽國志序

古者封建五等諸侯國皆有史以記事後世罷封建爲郡縣然亦必有圖志以具述蓋以疆域旣殊風俗各異山川有險要阨塞之當備郡邑有廢置割隸之不常至於一士之行一民之謠皆有不可沒者顧非筆之於書則不能也周官職方氏掌天下之地圖辨其邦國都鄙夷蠻閩貊五戎六狄之人民與其財用之數要至於九穀之所宜六畜之所產亦未嘗不佔畢而紀其詳况夫環數千里之地分城置邑殆踰數十中閒時異事變往往裂爲偏方霸國其理亂得失蓋有繫天下大數安可使放絕而無聞乎此晉常璩華陽國志之作所以有補於史家者流也予嘗考其書部分區別各有條理其指歸有三焉首述巴蜀漢中南中之風土次列公孫述劉二牧蜀二主之興廢及晉太康之混一以迄於特雄壽勢之僭竊繼之以兩漢以來先後賢人梁益寧三州士女總贊序志終焉就其三者之閒於一方人物

尤致深意雖侏離之氓賤俚之婦苟有可取在所不棄此尤足以弘
宣風教使善惡知所懲勸豈但屑屑於山川物產以資廣見異聞而
已乎本朝元豐閒呂汲公守成都嘗刊是書以廣其傳而載禊荒忽
刊缺愈多觀者莫曉所謂予每患此久矣假守臨邛官居有暇蓋嘗
博訪善本以證其誤而莫之或得因撫兩漢史陳壽蜀書益部耆舊
傳互相參訂以決所疑凡一事而先後失序本末舛逆者則考而正
之一意而詞旨重複句讀錯雜者則刊而去之設或字誤而文理明
白者則因而全之其他旁搜遠取求通於義者又非一端凡此皆有
明驗可信不誣者若其無所考據則亦不敢臆決姑闕之以俟能者
然較以舊本之訛謬大略十得五六矣鋟木既具輒敘所以冠於篇
首好古博雅與我同志者願無以夏五郭公之義而律之嘉泰甲子
季夏朔眉丹稜李堽叔廬甫謹序

華陽國志目錄

第一

巴志

第二

漢中志

第三

蜀志

第四

南中志

第五

公孫述劉二牧志

第六

劉先主志

第七

劉後主志

第八

大同志

第九

李特雄期壽勢志

第十

先賢士女總讚

第十一

後賢志

第十二

序志并益梁寧三州先後以來士女名

華陽國志卷第一

巴志

昔在唐堯洪水滔天鯀功無成聖禹嗣興導江疏河百川蠲脩封殖
天下因古九囿以置九州仰稟參伐俯壤華陽黑水江漢為梁州厥
土青黎厥田惟下上厥賦惟下中厥貢璆鐵銀鏤柝磬熊羆狐狸織
皮於是四隩既宅九州攸同六府孔脩庶土交正底賚財賦成貢中
國蓋時雍之化東被西漸矣歷夏殷周當作歷虞夏殷脫虞字衍周字九州牧伯率
職周文為伯西有九國及武王克商并徐合青省梁合雍而職方氏
猶掌其地辨其土壤甄其寶利迄於秦帝漢興高祖藉之成業乃改

雍曰涼革梁曰益故巴漢庸蜀屬益州至魏咸熙元年平蜀始分益

州巴漢七郡置梁州治漢中以相國參軍中山耿黼為刺史 元

康六年廣漢益州當作廣益梁州更割雍州之武都陰平荊州之新城上庸

魏興以屬焉凡統郡一十一當作二按巴漢七郡者巴一巴東二涪陵三巴西四宕渠五漢中六梓潼七也

所廣益者武都入陰平九新城十上庸十縣五十八
一魏興十二故梁州之統郡一十二也 洛書曰人

皇始出繼地皇之後兄弟九人分理九州爲九圍人皇居中州制八
輔華陽之壤梁岷之域是其一圍圍中之國則巴蜀矣其分野輿鬼
東井其君上世未聞五帝以來黃帝高陽之支庶世爲侯伯及禹治
水命州巴蜀以屬梁州禹娶於塗山辛壬癸甲而去生子啓呱呱啼
不及視三過其門而不入室務在救時今江州塗山是也帝禹之廟
銘存焉會諸侯於會稽執玉帛者萬國巴蜀往焉周武王伐紂實得
巴蜀之師著乎尚書巴師勇銳歌舞以凌殷人前徒倒戈故世稱之
曰武王伐紂前歌後舞也武王旣克殷以其宗姬封於巴爵之以子
古者遠國雖大爵不過子故吳楚及巴皆曰子 其地東至魚復

西至夔道北接漢中南極黔涪土植五穀牲具六畜桑蠶麻紵魚鹽
銅鐵丹漆茶蜜靈龜巨犀山雞白雉黃潤鮮粉皆納貢之其果實之
珍者樹有荔芡蔓有辛蒟園有芳鶻香茗給客橙當作橙其

藥物之異者有巴戟天椒竹木之瓚者有桃支靈壽其名山有塗籍靈臺石書刊山 其民質直好義土風敦厚有先民之流故其詩

曰川崖惟平其稼多黍旨酒嘉穀可以養父野惟阜丘彼稷多有嘉穀旨酒可以養母其祭祀之詩曰惟月孟春獺祭彼崖永言孝思享祀孔嘉彼黍既潔彼犧惟澤蒸命良辰祖考來格其好古樂道之詩曰日月明明亦惟其名誰能長生不朽難獲當有誤又曰惟德實寶富

貴何常我思古人令問令望而其失在於重遲魯鈍俗素樸無造次辨麗之氣其屬有濮竇苴共奴孺夷蜚之蠻 周之仲世雖奉王

職與秦楚鄧爲比春秋魯桓公九年巴子使韓服告楚請與鄧爲好楚子使道朔將巴客聘鄧鄧南鄙攻而奪其幣巴子怒伐鄧敗之其後巴師楚師伐申楚子驚巴師 魯莊公十八年巴伐楚克之

魯文公十六年巴與秦楚共滅庸 哀公十八年巴人伐楚敗

於鄧 是後楚主夏盟秦擅西土巴國分遠故於盟會希 戰

國時嘗與楚婚及七國稱王巴亦稱王 周之季世巴國有亂將

軍有蔓子請師於楚許以三城楚王救巴巴國既寧楚使請城蔓子

曰藉楚之靈克弭禍難誠許楚王城將吾頭往謝之城不可得也乃

自刎以頭授楚使王嘆曰使吾得臣若巴蔓子用城何爲乃以上卿

禮葬其頭巴國葬其身亦以上卿禮 周顯王時楚國衰弱秦惠

文王與巴蜀爲好蜀王弟苴當有私親於巴巴蜀世戰爭 周慎

王五年蜀王伐苴侯苴侯奔巴巴爲求救於秦秦惠文王遣張儀司

馬錯救苴巴遂伐蜀滅之儀貪巴苴之富因取巴執王以歸置巴蜀

及漢中郡分其地爲一當 衍縣儀城江州司馬錯自巴涪水取楚商於

地爲黔中郡 秦昭襄王時白虎爲害自秦蜀巴漢患之秦王乃

重募國中有能斂虎者邑萬家金帛稱之於是夷胸忍廖仲藥何射

虎秦精等乃作白竹弩於高樓上射虎中頭三節白虎常從羣虎瞋

恚盡搏斂羣虎大咆而死秦王嘉之白虎歷四郡害千二百人一朝

患除功莫大焉欲如約王嫌其夷人乃刻石爲盟要復夷人頃田不
租十妻不算傷人者論煞人雇死倭錢盟曰秦犯夷輸黃龍一雙夷
犯秦輸清酒一鍾夷人安之漢興亦從高祖定亂有功高祖因復之
專以射白當虎爲事戶歲出寶錢口四十故世號白虎復夷一曰板
楯蠻今所謂弼頭虎子者也 漢高帝滅秦爲漢王王巴蜀閬中

人范目有恩信方略知帝必定天下說帝爲募發寶民要與共定秦
秦地既定封目爲長安建章鄉侯帝將討關東寶民皆思歸帝嘉其
功而難傷其意遂聽還巴謂目曰富貴不歸故鄉如衣繡夜行耳徒

封閬中慈李善蜀都賦注引風俗通有鼻字疑此脫鄉侯目固辭乃封渡沔縣當衍目錄無此字

侯故世謂亡秦范三侯也目復除民羅朴咎鄂度女龔李善蜀都賦注引風俗通

作龔疑此誤今本後漢書板楯傳作龔蓋李至依彼改耳七姓不供租賦 閬中有渝水寶民

多居水左右天性勁勇初爲漢前鋒陷陣銳氣喜舞帝善之曰此武

王伐紂之歌也乃令樂人習學之今所謂巴渝舞也天下既定高帝

乃分巴置廣漢郡

孝武帝又兩割置犍爲郡故世曰分巴割蜀

以成犍廣也

自時厥後五教雍和秀茂挺逸英偉旣多而風謠

旁作故朝廷有忠貞盡節之臣鄉黨有主文歌詠之音巴郡譙君黃

仕成哀之世爲諫議大夫數進忠言後違避王莽又不事公孫述

怒遣使賣藥酒以懼之君黃笑曰吾不省藥乎其子瑛納錢八百萬

得免國人作詩曰肅肅清節士執德實固貞違惡以授命沒世遺令

聲 巴郡陳紀山爲漢司隸校尉嚴明正直西虜獻眩王庭試之

分公卿以爲嬉紀山獨不視京師稱之巴人歌曰築室載直梁國人

以貞真邪娛不揚目枉行不動身奸軌辟乎遠理義協乎民 巴

郡嚴王思爲揚州刺史惠愛在民每當遷官吏民塞路攀轅詔遂留

之居官十八年卒百姓若喪考妣義送者賣錢百萬欲以贍王思家

其子徐州刺史不受送吏義崇不忍持還乃散以爲食食行客巴郡

太守汝南應季先善而美之乃作詩曰乘彼西漢潭潭其淵君子愷

悌作民二親沒世遺愛式鏡後人

漢安帝時巴郡太守連失道

國人風之曰明明上天下土是觀帝選元后求定民安孰可不念禍福由人願君奉詔惟德日親

永初中廣漢漢中羌反虐及巴郡

有馬妙祈妻義王元憤妻姬趙蔓君妻華夙喪夫執共姜之節守一醮之禮號曰三貞遭亂兵迫匿懼見拘辱三人同時自沈於西漢水而沒死有黃鳥鳴其亡處徘徊焉國人傷之乃作詩曰關關黃鳥爰集於樹窈窕淑女是繡是黼惟彼繡黼其心匪石嗟爾臨川邈不可獲

永建中泰山吳資元約爲郡守屢獲豐年民歌之曰習習晨風

動澍雨潤乎苗我后卹時務我民以優饒及資遷去民人思慕又曰望遠忽不見惆悵嘗徘徊恩澤實難忘悠悠心永懷

孝桓帝時

河南李盛仲和爲郡守貪財重賦國人刺之曰狗吠何諠諠有吏來在門披衣出門應府記欲得錢語窮乞請期吏怒反見尤旋步顧家中家中無可爲思往從鄰貸鄰人已言匱錢錢何難得令我獨憔悴

漢末政衰牧守自擅民人思治作詩曰混混濁沼魚習習激清

流温温亂國民業業仰前脩 其德操仁義文學政幹若洛下閔

任文公馮鴻卿龐宣孟玄文和趙温柔龔升侯楊文義等播名立事

言行表世者不勝次載者也 孝安帝元初三年涼州羌入漢中殺

太守董炳擾動巴中中郎將尹就討之不克益州諸郡皆起兵禦之

三府舉廣漢王堂為巴郡太守撥亂致治進賢達士貢孝子嚴永隱

士黃錯名儒陳髦俊士張璠案巴郡士女目錄越嵩太守張璠翁子太守王堂察舉孝廉以後漢書訂之璠

當作皆至大位益州刺史張喬表其尤異徙右扶風民為立祠

孝桓帝以并州刺史泰山但望字伯闔為巴郡太守勲卹民隱郡文

學掾宕渠趙芬掾弘農馮尤墊江龔榮王祈李温臨江嚴就胡良文

愷安漢陳禧閬中黃闔江州毋成陽譽喬就張紹牟存平直等詣望

自訟曰郡境廣遠千里給吏兼將人從冬往夏還夏單冬複惟踰時

之役懷怨曠之思其昏喪吉凶不得相見解緩補綻下至薪菜之物

無不躬買於市富者財得自供貧者無以自久是以清儉天枉不聞
加以水陸艱難山有猛獸思迫期會隕身江河投死虎口咨嗟之歎
歷世所苦天之應感乃遭明府欲爲更新童兒匹婦懽喜相賀將去
遠就近釋危蒙安縣無數十民無遠邇恩加未生澤及來世巍巍之
功勒於金石乞以文書付計掾史人鬼同符必獲嘉報芬等幸甚望
深納之郡戶曹史枳當有脫白望曰芬等前後百餘人歷政訟訴未蒙
感寤明府運機布政稽當皇極爲民庶請命救患德合天地澤潤河
海開闢以來今遇慈父經曰奕奕梁山惟禹甸之有倬其道韓侯受
命比隆等感於斯爲美永興二年三月甲午望上疏曰謹按巴郡圖
經境界南北四千東西五千周萬餘里屬縣十四鹽鐵五官各有丞
史戶四十六萬四千七百八十口百八十七萬五千五百三十五遠
縣去郡千二百至千五百里鄉亭去縣或三四百或及千里土界遐
遠令尉不能窮詰姦凶時有賊發督郵追案十日乃到賊已遠逃蹤

跡滅絕罪錄逮捕證驗文書詰訊卽從春至冬不能究訖繩憲未加
或遇德令是以賊盜公行姦宄不絕榮等及隴西太守馮含上谷太
守陳弘說往者至有劫閩中令楊殷終津侯姜昊傷尉蘇鴻彭亭侯
孫魯雍亭侯陳己殷侯樂普又有女服賊千有餘人布散千里不卽
發覺謀成乃誅其水陸覆害煞郡掾枳謝盛塞威張御魚復令尹尋
主簿胡直若此非一給吏休謁往還數千閉囚須報或有彈劾動便
歷年吏坐踰科恐失冬節侵疑先死如當移傳不能待報輒自刑戮
或長吏忿怒冤枉弱民欲赴訴郡官每憚還往太守行桑農不到四
縣刺史行部不到十縣郡治江州時有溫風遙縣客吏多有疾病地
勢剛當作側見險皆重屋累居數有火害又不相容結舫水居五百
餘家承三當作二見江之會夏水漲盛壞散顛溺死者無數而江州
以東濱江山險其人半楚姿態敦重墊江以西土地平敞精敏輕疾
上下殊俗情性不同敢欲分爲二郡一治臨江一治安漢各有桑麻

丹漆布帛魚池鹽鐵足相供給兩近京師榮等自欲義出財帛造立
府寺不費縣官得百姓懽心孝武以來亦分吳蜀諸郡聖德廣被民
物滋繁增置郡土釋民之勞誠聖主之盛業也臣雖貪大郡以自優
假不忍小民顛顛蔽隔謹具以聞朝議未許遂不分郡分郡之議始
於是矣 順桓之世板楯數反太守蜀郡趙溫恩信降服於是宕
渠出九穗之禾胸忍有連理之木 光和二年板楯復叛攻害三

蜀漢中州郡連年苦之天子欲大出軍時征役疲弊問益州計曹考
以方略益州計曹掾程包對曰板楯七姓以射白虎爲業立功先漢

本爲義民復除徭役但出寶錢口歲四十其人勇敢能戰昔羌數入
漢中郡縣破壞不絕若線後得板楯來虜彌 當作 盡號爲神兵羌人

畏忌傳語種輩勿復南行後建寧 舊校云後漢作建和 二年羌復入漢牧守遑

遑賴板楯破之若微板楯則蜀漢之民爲左衽矣前車騎將軍馮緄
南征雖授丹陽精兵亦倚板楯近益州之亂朱龜以并涼勁卒討之

無功太守李顥以板楯平之忠功如此本無惡心長吏鄉亭更賦至重僕役過於奴婢箠楚降於囚虜至乃嫁妻賣子或自剄割陳冤州郡牧守不理去闕庭遙遠不能自聞含怨呼天叩心窮谷愁於賦役困乎刑酷邑域相聚以致叛戾非有深謀至計僭號不軌但選明能牧守益其資穀安便賞募從其利隙自然安集不煩征伐也昔中郎將尹就伐羌擾動益部百姓諺云虜來尙可尹將殺我就徵還後羌自破退如臣愚見權之遣軍不如任之州郡天子從之遣太守曹謙宣詔降赦一朝清哉

獻帝初平元年征東中郎將安漢趙穎建議分巴爲二郡穎欲得巴舊名故白益州牧劉璋以墊江以上爲巴郡江南龐羲爲太守治安漢以江州至臨江爲永寧郡胸忍至魚復爲固陵郡巴遂分矣

建安六年魚復蹇允白璋爭巴名璋乃改永寧爲巴郡以固陵爲巴東徙羲爲巴西太守是爲三巴於是涪陵謝本白璋求以丹興漢髮二縣爲郡初以爲巴東屬國後遂爲涪陵

郡分後屬縣七戶二萬去洛三千七百八十五里東接胸忍西接蔣

嘗作符符縣 縣南接涪陵北接安漢德陽 巴子時雖都江州或

治墊江或治平都後治閬中其先王陵墓多在枳其畜牧在沮今東

突破下畜沮是也又立市於龜亭北岸今新市里是也其郡東枳有

明月破廣德嶼 按此有誤也以水經注訂之當作黃葛破故下文言

之誤而李至又 依彼誤改此耳故巴亦有三破 巴楚數相攻伐故置扞關陽關

及沔關 漢世郡治江州巴水北有甘橘官今北府城是也後乃

遷南城劉先主初以江夏費瓘 當作觀見 為太守領江州都督後都

護李嚴更城大城周迴十六里欲穿城後山自汶江通水入巴江使

城為州求以五郡置巴州丞相諸葛亮不許亮將北征召嚴漢中故

穿山不逮然造蒼龍白虎門別郡縣倉皆有城嚴子豐代為都督豐

解後梓潼李福為都督 延熙中車騎將軍鄧芝為都督治陽關

十七年省平都樂城常安 咸熙元年但四縣以鎮西參軍

隴西當有脫怡思和爲太守二部守軍

江州縣 郡治 塗山有禹王祠及塗后祠北水有銘書詞云

漢初犍爲張君爲太守忽得仙道從此升度今民曰張府君祠縣下

有清水穴巴人以此水爲粉則膏暉鮮芳貢粉京師因名粉水故世

謂江州墮休當作林見水經注粉也有荔茭園至熟二千石常設廚膳命士

大夫共會樹下食之縣北有稻田出御米陂池出蒲萹藺席其冠族

有波鋁毋謝然愷楊白上官程常世有大官也

枳縣 郡東四百里治涪陵水會土地确瘠時多人士有章常連

黎牟陽郡冠首也

臨江縣 枳東四百里接胸忍有鹽官在監塗二溪一郡所仰其

豪門亦家有鹽井又嚴甘文楊杜爲大姓晉初文立實作常伯納言

左右楊宗符當作稱武隆當作陵讀以楊宗有稱武陵六字人在吳

爲孫氏虎臣也按此有誤也考三國志甘寧傳云巴郡臨江人也當是人上脫甘寧縣二字

平都縣

蜀延熙時省大姓殷呂蔡氏

墊江縣

郡西北中水四百里有桑蠶牛馬漢時龔榮以俊才為

荊州刺史後有龔揚趙敏以令德為巴郡太守淳于長寧雅有美貌

黎夏杜皆大姓也

樂城縣

在西州江

當有誤

三百里延熙十七年省

常安縣

亦省

巴東郡先主入益州改為江關都尉

建安二十一年以胸忍魚

復

舊有空格當是脫漢豐也胸忍一魚復二漢豐三羊渠四巫五北井六故云六縣也巫北井本屬宜都郡故云及宜都之巫北井也

羊渠及宜都之巫北井六縣為固陵郡武陵康立為太守

章武

元年胸忍徐惠魚復蹇機以失巴各上表自訟先主聽復為巴東南

郡輔匡為太守先主征吳於夷道還薨斯郡以尚書令李嚴為都督

造設圍戍嚴還江州征西將軍汝南陳到為都督到卒官以征北大

將軍南陽宗預為都督預還內領軍襄陽羅獻為代蜀平獻仍其任

拜凌江將軍領武陵太守

泰始二年吳大將步闡唐咨攻獻獻

保城咨西侵至朐忍故蜀尚書郎巴郡楊宗告急於洛未還獻出擊
闡大破之咨退獻遷監軍假節安南將軍封西鄂侯入朝加錫御蓋
朝服吳武陵太守孫恢寇南浦安蠻護軍楊宗討之退走因表以宗
爲武陵太守住南浦誘卹武陵蠻夷得三縣初附民獻卒以犍爲太
守天水楊攸爲監軍攸遷涼州刺史朝議以唐彬及宗爲代晉武帝
問散騎常侍文立曰彬宗孰可用立對曰彬宗俱立事績在西不可
失者然宗才誠佳有酒嗜彬亦其人性在財欲惟陛下裁之帝曰財
欲可足酒嗜難改遂用彬爲監軍加廣武將軍

迄吳平巴東後

省羊渠置南浦

晉太康初將巫北井還建平但五

當作四

縣去洛

二千五百里東接建平南接武陵西接巴郡北接房陵奴獠夷蠻之

蠻民

魚復縣

郡治

公孫述更名白帝章武二年改曰永安咸熙

初復有橘官又有澤水神天旱鳴鼓於傍即雨也

胸忍縣

郡舊脫此字今補正

西二百九十里水道有東陽下瞿數灘山

有大小石城勢靈壽木

當有橘園二字水經注引不誤

鹽井靈龜咸熙元年獻靈龜

於相府大姓扶先徐氏漢時有扶徐荊州著石

當作名舊校非

楚訪當作記舊校非

有弼頭白虎復夷者也

舊校云著石楚訪四字未詳弼其兩切又翹移切弓強兒又渠羈切又渠梁切文一重音

三

漢豐縣

建安二十一年置在郡西北彭溪源

南浦縣

郡南二百里晉初置主夷

郡與楚接人多勁勇少文學有將帥材

涪陵郡巴之南鄙從枳南入析丹涪水本與楚商於之地接秦將司

馬錯由之取楚商於地爲黔中郡也漢後恆有都尉守之舊屬縣五

去洛五千一百七十里東接巴東南接武陵西接牂柯北接巴郡土

地山險水灘人戇勇多獷蠻之民縣邑阿黨鬪訟必死無蠶桑少文

學惟出茶丹漆蜜蠟漢時赤甲軍常取其民蜀丞相亮亦發其勁卒
三千人爲連弩士遂移家漢中 延熙十三年大姓徐巨反車騎

將軍鄧芝討平之見玄援緣其山芝性好弩手自射援中之援子拔
其箭卷木葉塞其創芝嘆曰嘻吾傷物之性其將死矣乃移其豪徐
藺謝范五千家於蜀爲獵射官分羸弱配督將韓蔣名爲助郡軍遂
世掌部曲爲大姓晉初移弩士於馮翊蓮勺其人性質直雖徙他所
風俗不變故迄今有蜀漢關中涪陵其爲軍在南方者猶存 山
有大龜其甲可卜其緣可作叉世號靈叉

涪陵縣 郡治

丹興縣 蜀時省山出名丹

漢平縣 延熙十三年置

萬寧縣 孝靈帝時置本名永寧

漢髮縣 有鹽井

諸縣北有獾蠻又有蟾夷也

巴西郡屬縣七去洛二千八百一十五里東接巴郡南接當有西接

梓潼北接涼當西城土地山原多平有牛馬桑蠶其人自先漢以來

隗偉倣儻冠冕三巴及郡分後叔布榮始周羣父子程公弘等或學

兼三才或精秀奇逸其次馬盛衡承伯才藻清妙龔德緒兄弟英氣

曄然黃公衡應權通變馬德信王子均勾孝興張伯岐建功立事劉

二主之世稱美荆楚乃先漢以來馮車騎范鎮南皆植斯鄉故曰巴

有將蜀有相也及晉譙侯脩文於前陳君煥炳於後並遷雙固倬羣

穎世甄在傳記縉紳之徒不勝次載焉

閬中縣 郡治 有彭池大澤名山靈臺見文緯書按文緯書當作孔子

內見續漢書志注 識大姓有三狐五馬蒲趙任黃巖也

南充國縣 和帝時置有鹽井大姓侯譙氏

安漢縣 號出人士大姓陳范閻趙

平州縣

其二縣為郡

按二當作三即宕渠郡之宕渠漢昌宜漢三縣也

宕渠郡延熙中置以廣漢王士為太守郡建九年省永興元年李雄復置今遂為郡長老言宕渠蓋為故寶國今有寶城盧城秦始皇時有長人二十五丈見宕渠秦史胡母敬曰是後五百年外必有異人為大人者及雄之王祖世出自宕渠有識者皆以為應之先漢以來士女賢貞縣民車騎將軍馮緄大司農玄賀大鴻臚龐雄桂楊太守李温等皆建功立事有補於世緄温各葬所在當作常以三月二子之靈還鄉里水暴漲郡縣吏民莫不於水上祭之其列女節義在先

賢志

宕渠縣

郡治

有鐵官石蜜山圖所採也

漢昌縣

和帝時置大姓勾氏

宜漢縣

今省

右巴國凡分爲五郡二十三縣

譏曰巴國遠世則黃炎之支封在周則宗姬之戚親故於春秋班倅
秦楚示甸衛也若蔓子之忠烈范目之果毅風淳俗厚世挺名將斯
乃江漢之含靈山岳之精爽乎觀其舊校云闕足以知其敦壹矣昔沙麓
崩卜偃言其後當有聖女興元城郭當作建見漢書公謂王翁孺屬當其時
故有政君李雄宕渠之斯伍略陽之黔首耳起自流隸君獲當作獲君誤倒
士民其長人之魄良有以也

華陽國志卷第一

華陽國志卷第二

漢中志

漢中郡本附庸國屬

當有脫

周赧王二年秦惠文王置郡因水名也漢

有二源東源出武都氐道漾山因名漾禹貢流漾爲漢是也西源出

隴西

當有西縣二字水經注引不誤

岷冢山會白水經葭萌入漢始源曰沔故曰漢

沔在詩曰滔滔江漢南國之紀其應上照於天又曰惟天有漢其分

野與巴蜀同占其地東接南郡南接廣漢西接隴西陰平北接秦川

厥壤沃美賦貢所出略侔三蜀六國時楚強盛略有其地後爲秦恆

成爭地漢高帝旣克秦獲子嬰項羽封高帝爲漢王王巴蜀三十一

縣帝不悅丞相蕭何謀曰雖王漢中之惡不猶愈於死乎且語曰天

漢其稱甚美夫能屈於一人之下則伸於萬乘之上者湯武是也願

大王王漢中撫其民以致賢人收用巴蜀還定三秦天下可圖也帝

從之都南鄭及項籍弑義帝高帝東伐蕭何常居守漢中足食足兵

既定三秦蕭何鎮關中資其衆卒平天下以田叔為漢中守屬縣十
二去洛一千九十一里叔既饋以軍饗又致名材立宮室帝嘉之後
為魯相然以帝業所興不封藩王自叔之後世脩文教有倣儻之士
異人並挺鄧公抗言於孝景之朝以明忠枉之情張騫特以蒙險遠
為孝武帝開緣邊之地賓沙越之國致大宛之馬入南海之象而車
渠瑪瑙珊瑚琳碧麝寶明珠玳瑁虎魄水晶琉璃火浣之布蒲桃之
酒筇竹菹醬殊方奇玩盈於市朝振揚威靈被於幽裔遂登九列杖
節繡衣剖符博望谷口子真秉箕穎之操湛然岳立不營不求德聲
邁流楊王孫應至人之概 自建武以後羣儒脩業開按圖緯漢

之宰相當出坤鄉於是司徒李公屢登七政太傅子堅奕世論道其

珪璋瑚璉之器則陳伯臺當有脫李季子當脫陳字陳術字甲伯見士女贊及目錄申伯之

徒文秀瑋曄其州牧郡守冠蓋相繼於西州為盛蓋濟濟焉 莽

時公孫述據蜀跨有漢中當秦隴之徑每懼於其害 安帝永初

二年陰平武都羌反入漢中煞太守董炳沒略吏民

四年羌復

來太守鄭廛出屯襄中欲與羌戰主簿段崇陳諫

舊誤禪今改正

以爲但可

堅守來虜乘勝其鋒不可當廛不從戰敗績崇與門下史王宗原展及崇子勃兄子伯生力戰捍廛并命功曹程信素居守馳來赴難冒寇殞殮廛虜遂大盛天子乃拜巴郡陳禪爲漢中太守虜素憚禪更來盤結禪知攻守未可卒下而年荒民困乃矯詔赦之大小咸服既誅其亂首天子善之徙禪左馮翊太守程信怨恥乃結故吏冠蓋子弟嚴孳李容姜濟陳巴曹廉勾矩劉旌等二十五人誓志報羌各募壯士豫結同死以待寇太守鄧成命信爲五官孳等門下官屬

元和

當作初

二年羌復來巴郡板楯救之信等將其士卒力奮討大破

之信被八創二十五人戰死自是後羌不敢南向

五年天子下

詔褒嘆信崇等賜其家穀各千斛宗展孳等家穀各五百斛列畫東觀每新太守到必先存問其家以羌畏服陳禪拜禪子澄漢中太守

漢末沛國張陵學道於蜀鶴鳴山造作道書自稱太清玄元以惑百姓陵死子衡傳其業衡死子魯傳其業魯字公祺以鬼道見信於益州牧劉焉魯母有少容往來焉家 初平中以魯爲督義司

馬住漢中斷谷道魯既至行寬惠以鬼道教立義舍置義米義肉其中行者取之量腹而已不得過多云鬼病之其市肆賈平亦然犯法者三原而後行刑學道未信者謂之鬼卒後乃爲祭酒巴漢夷民多便之其供道限出五斗米故世謂之米道扶風蘇固爲漢中太守魯遣其黨張脩攻固成固人陳調素遊俠學兵法固以爲門下掾說固守捍禦寇之術固不能用踰牆走投南鄭趙嵩嵩將俱逃賊盛固遣嵩求隱避處嵩未還固又令鈴下偵賊賊得鈴下遂得煞固嵩痛憤杖劍直入調亦聚其賓客百餘人攻脩戰死魯遂有漢中數害漢使焉上書言米賊斷道 至劉焉子璋爲牧時魯益驕恣 建安

五年殺魯母弟魯說巴夷杜濩朴胡袁約等叛爲讎敵魯時使使漢

朝亦慢驕帝室以亂不能征就拜鎮民中郎將漢寧太守不置長吏皆以祭酒爲治璋數遣龐羲李思等討之不能克而巴夷日叛乃以羲爲巴西太守又遣楊懷高沛守關頭請劉先主討魯先主更襲取璋

二十年魏武帝西征魯魯走巴中先主將迎之而魯功曹巴西閻圃說魯北降歸魏武贊以大事宜附託不然西結劉備以歸之魯勃然曰寧爲曹公作奴不爲劉備上客遂委質魏武武帝拜魯鎮南將軍封襄平侯又封其五子皆列侯

時先主東下江安巴漢

稽服魏武以巴夷王杜濩朴胡袁約爲三巴太守留征西將軍夏侯淵及張郃益州刺史趙顥等守漢中遷其民於關隴

二十四年

春先主進軍攻漢中至定軍淵郃顥來戰大爲先主所破將軍黃忠斬淵顥首

魏武帝復西征先主先主曰孟德雖來無能爲也我

必有漢川矣先主遂爲漢中王將還成都當得重將以鎮漢中衆皆以必張飛張飛心亦自許先主乃以牙門義陽魏延爲鎮遠將軍漢

中太守先主大會羣臣問延曰今委卿以漢中卿居之若何對曰若
曹操舉天下而來請爲大王拒之若偏將十萬而來請爲大王吞之
衆壯其言初魏武之留淵郤也以雞肋示外外人莫察惟主簿楊脩
知之故曰夫雞肋棄之如可惜食之無所得以比漢中也 是後

處蜀魏界固險重守自丞相大司馬大將軍皆鎮漢中 蜀平梁

州治沔陽 太康中晉武帝子漢王迪受封更曰漢國郡但六縣

南鄭縣 郡治 周貞王十六年秦厲公城之有池水從旱山

來入沔大姓李鄭趙氏

沔陽縣 州治 有鐵官又有度水水有二源一曰清檢二曰

濁檢有魚穴清水出鱖濁水出鮒常以二月八月取蜀丞相諸葛亮

葬定軍山

褒中縣 孝昭帝元鳳六年置本都尉治也山名扶木有唐公房

祠也

成固縣 蜀時以沔陽爲漢城成固爲樂城

蒲池縣

西鄉縣

魏興郡本漢中西城縣正曰哀平之世縣民錫光字長沖爲交州刺

史徙交趾太守王莽篡位據郡不附莽方有事海內未以爲意尋值所在兵起遂自守更始卽位正其本官世祖嘉其忠節徵拜爲大將軍朝侯祭酒封鹽水侯後漢中數寇亂縣土獨存漢季世別爲

郡 建安二十四年劉先主命宜都太守孟達從姊歸北伐房陵上庸自漢中又遣副軍中郎將劉封乘沔水會達上庸以申耽弟儀爲建信將軍西城太守達耽降魏黃初二年文帝轉儀爲魏興太守封鄖鄉侯 蜀平遂治西城屬縣六戶萬去洛一千七百里土地險隘其人半楚風俗略與荊州沔中郡同

西城縣 郡治 元康元年封越騎校尉蜀郡何攀爲公國也

錫縣

安康縣

興晉縣

晉置

鄖鄉縣

本名長利縣縣有鄖鄉

當作關見漢書地理志

洵陽縣

洵水所出

上庸郡故庸國楚與巴秦所共滅者也秦時屬蜀後屬漢中

漢

末為上庸郡

建安二十四年孟達劉封征上庸上庸太守申耽

稽服遣子弟及宗族詣成都先主拜耽征北將軍封鄖鄉侯仍郡如

故 黃初中降魏文帝拜耽懷集將軍徙居南陽省上庸并新城

孟達誅後復為郡屬縣五戶七千去洛一千七百里

上庸縣

郡治

北巫縣

安樂縣

咸熙元年為公國封劉後主也

按當有誤也上文言屬縣五而今有六縣或不

數公國耳但考晉書地理志幽州燕國有安樂國相蜀主劉禪封此縣公明不得屬上庸此之云然所未詳矣

武陵縣

安富縣

微陽縣

新城郡本漢中房陵縣也秦始皇徙呂不韋舍人萬家於房陵以其隘地也漢時宗族大臣有罪亦多徙此縣漢末以爲房陵

郡

建安二十四年孟達征房陵煞太守蒯祺進平三郡與劉封

不和封奪達鼓吹關羽圍樊城求助於封達封達以新據山郡未可擾動爲辭羽爲吳所破殺達旣忿封又懼先主見責遂拜書先主告叛降魏魏文帝善達姿容觀以爲散騎常侍建武將軍襲劉封封敗走達據房陵文帝合三郡爲新城以達爲太守後蜀丞相諸葛亮將北伐招達爲外援故貽書曰嗟乎孟子度邇者劉封侵凌足下以傷先帝待士之望慨然永歎每存足下平素之志豈虛託名載策者

哉都護李嚴亦與書曰吾與孔明並受遺詔思得良伴吳主孫權亦
招之達遂背魏通吳蜀表請馬弩於文帝撫軍司馬宣王以爲不可
許帝曰吾爲天下主義不先負人當使吳蜀知吾心乃多與之過其
所求

明帝太和初達叛魏歸蜀時宣王屯宛知其情乃以書喻
之曰將軍昔棄劉備託身國家委將軍以疆場之任任將軍圖蜀之
事可謂心貫白日蜀人愚智莫不切齒於將軍諸葛亮欲相破惟苦
無路耳模之所言

舊校云郭謨亮遣詐降洩孟達謀者

非小事也亮豈輕之而令宣露

此殆易知耳達乃以書與亮曰宛去洛八百去此千二百里聞吾舉
事當表上天子比相反覆一月閒也則吾城已固諸軍足辨則吾所
在深險司馬公必不自來諸將來吾無患矣及兵到達又告亮曰吾
起事八日而兵至城下何其神速也亮以其數反覆亦不救遂爲宣
王所誅滅

宣王分爲三郡新城屬縣四戶二萬去洛一千六百

里

房陵縣

郡治舊脫此二字今補正

有維山維水所出東入瀘

舊校云瀘疑誤

當作漢今按當依漢書地理志作東至中廬入沔又水經沔水篇云又東過中廬縣東維水自房陵縣維山東流注之亦其明證舊校非也

沔鄉縣

昌魏縣

綏陽縣

右三郡漢中所分也在漢中之東故蜀漢謂之東三郡蜀時為魏屬
荊州晉元康六年始還梁州山水艱阻有黃金子午馬聰建鼓之阻
又有作道九君搏土作人處而其記及漢中記不載又不為李雄所
據據識其大梗概未能詳其小委曲也

梓潼郡本廣漢屬縣也

建安十八年劉先主自葭萌南攻州牧

劉璋留中郎將南郡霍峻守葭萌城張魯遣將楊帛誘峻求共城守

峻曰小人頭可得城不可得也帛退劉璋將向存扶禁由巴閬水攻

峻歲餘不能克峻衆才八百人存衆萬計更爲峻所破敗退走成都
既定先主嘉峻功 二十二年分廣漢置梓潼郡以峻爲太守屬

縣六

當作五

戶萬去洛二千八百三十八里東接巴西南接廣漢西接

陰平北接漢中土地出金銀丹漆藥蜜也世有雋彥人侔於巴蜀

梓潼縣

郡治

有五婦山故蜀五丁士所拽虵崩山處也有

善板祠一曰惡子民歲上雷杼十枚歲盡不復見云雷取去四姓文

景雍鄧者也

舊校云一本作梓潼按當作潼

涪縣

去成都三百五十里水通於巴於蜀爲東北之要蜀時大

將軍鎮之有岩田本稻田孱水出孱山其源出金銀鑛洗取火融合
之爲金銀陽泉出石丹大司馬蔣琬葬此大姓楊杜李人士多見耆
舊傳也

晉壽縣

本葭萌城劉氏更曰漢壽水通於巴西又入漢川有金

銀鑛民今歲歲洗取之蜀亦大將軍鎮之漆藥蜜所出也大將軍費

禕葬此山大姓葬此者多

白水縣 有關尉故州牧劉璋將楊懷高沛守也

漢德縣 舊作廣漢縣德陽縣誤衍今刪正漢德縣沈約以為疑劉氏所立廣漢郡之廣漢縣德陽縣自在蜀志中不得屬梓潼也

有劍閣道三十里至險有閣尉桑下兵民也 當有誤

武都郡本廣漢西部都尉治也 元鼎六年別為郡屬縣九戶萬

去洛一千八百七十八里東接 當有脫 梓潼西接天水北接始平土地

險阻有麻田氏叟多羌戎之民其人半秦多勇戇出名馬牛羊漆蜜

水經注漾水篇引常璩云郡居河池一名仇池池方百頃疑此有脫文 有瞿堆百頃險勢氏叟常依之

為叛漢世數征討之分徙其羌遠至酒泉敦煌其攻戰壘戍處所亦

多 建安二十四年先主遣將軍雷同吳蘭平之為魏將曹洪所

破殺

魏益州刺史天水楊阜治此郡阜以濱蜀境移其氏叟於汧雍及天

水略陽 建興七年丞相諸葛亮遣護軍陳戒伐之遂平武都陰

平二郡還屬益州

魏將夏侯淵張郃徐晃征伐常由此郡而蜀

丞相亮及魏延姜維等多從此出秦川遂荒無留民其氏叟楊濮屬

魏魏遙置其郡

當重有郡字

屬蜀 蜀平屬雍州

太康六年還梁

州 八年氏叟齊萬年反郡懼其寇晉民流徙入蜀及梁州

永嘉初天水氏叟楊茂搜率種人爲寇保據其郡貢獻長安愍帝以

胡寇方盛欲懷來戎翟拜驃騎將軍 左賢王劉曜破長安丞相

平昌公上隴據天水茂搜數饋平昌公拜茂搜長子難敵征南將軍

少子堅頭龍驤將軍種衆彊盛東破梁州南連李雄威服羌戎時平

昌公爲劉曜所破陳安作賊於時并氏叟如一國茂搜死敵堅代爲

主數歲劉曜自攻武都敵堅南奔雄至晉壽遣子爲質又厚賂雄兄

晉壽守將稚曜不獲敵堅

當重有敵堅二字

引還武都恃險驕慢攻走雄陰

平太守羅演演稚舅也稚忿恚白兄含與雄求征之雄使含稚將數

千人攻之時敵妻死葬於陰平含稚徑至下辨入武街城以深入無

繼盡爲氏叟所破煞 敵堅死子盤毅復代爲主咸康四年敵從

弟初煞盤毅兄弟代爲主迄今 自茂搜父子之結據也通晉家

及李雄劉曜石勒石虎張駿皆稱臣奉貢受其官號所向用其官及

其年號

下辨縣 郡治 一曰武街

武都縣 東漢水所出有天池澤

上祿縣 舊脫縣字 今補正

故道縣

河池縣 泉街 舊衍縣字 今刪正 水入沮合漢也

沮縣 河池 按河池二字當作沮見漢書地理志此水所出東狼

谷也

平樂縣

脩成縣

嘉陵縣

陰平郡本廣漢北部都尉

永平後羌虜數反遂置爲郡屬縣四

戶萬去洛二千三百四十四里東接漢中南接梓潼西接隴西北接酒泉土地山險人民剛勇多氏僮有黑白水羌紫羌胡虜風俗所出與武都略同

漢安帝永初二年羌反燒郡城郡人退住白水會

漢陽諸羌反溢入漢煞太守漢陽杜琦自稱將軍叛亂廣漢郡屯葭萌漢使御史大夫唐喜討琦進討羌經年不下詔賜死更遣中郎將尹就討羌亦無功諸郡太守皆屯涪

元初五年巴郡板楯軍救

漢中漢中大破羌羌乃退郡復治置助郡都尉

劉先主之入漢

中也爭二郡不得

建興七年諸葛亮始命陳戒平之

魏亦

遙置其郡屬雍州自景谷有步道徑江油左儋行出涪鄧艾從之伐蜀

元康六年還屬梁州

永嘉末太守王鑒粗暴郡民毛深

左騰等逐出之相率降李雄晉民盡出蜀氏羌爲楊茂搜所占有

陰平縣

郡治

漢曰陰平道也

甸氏縣

有白水出徼外入漢

平武縣

有關尉自景谷有步道徑江油左儋出涪鄧艾伐蜀道

也劉主時置義守號關尉

剛氏縣

涪水所出有金銀鑛

右梁州

譔曰漢沔彪炳靈光上照在天鑒爲雲漢於地畫爲梁州而皇劉應之洪祚悠長蕭公之云不亦宜乎

華陽國志卷第二

卷之二

...

...

...

...

...

...

...

...

華陽國志卷第三

蜀志

蜀之為國肇於人皇與巴同囿至黃帝為其子昌意娶蜀山氏之女

生子高陽是為帝嚳封其支庶於蜀世為侯伯歷當脫唐虞二字夏商周武

王伐紂蜀與焉其地東接於巴南接於越北與秦分西奄峨嶓地稱

天府原曰華陽故其精靈則井絡垂耀江漢遵流河圖括地象曰岷

山之精舊脫精字今補正上舊誤下今改正為井絡帝以會昌神以建福夏書曰岷

山導江東別為沱泉源深盛為四瀆之首而分為九江其寶則有璧

玉金銀珠碧銅鐵鉛錫赭堊錦繡麝鼈犀象氈毼丹黃空青桑漆麻

紵之饒滇獠獫狁僮僕六百之富其卦值坤故多班綵文章其辰值

未故尚滋味德在少昊故好辛香星應輿鬼故君子精敏小人鬼黠

與秦同分故多悍勇在詩文王之化被乎江漢之域秦豳同詠故有

夏聲也 其山林澤漁園圃瓜果四節代熟靡不有焉 有周

之世限以秦巴雖奉王職不得與春秋盟會君長莫同書軌 周

失綱紀蜀先稱王有蜀侯蠶叢其目縱始稱王死作石棺石椁國人

從之故俗以石棺椁為縱目人冢也 次王曰柏灌次王曰魚鳧

王田於湔山忽得仙道蜀人思之為立祠 後有王曰杜宇教民

務農一號杜主時朱提有梁氏女利遊江源宇悅之納以為妃移治

郫邑或治瞿上 七國稱王杜宇稱帝號曰望帝更名蒲卑自以

功德高諸王乃以褒斜為前門熊耳靈關為後戶玉壘峨眉為城郭

江潛綿洛為池澤以汶山為畜牧南中為園苑會有水災其相開明

決玉壘山以除水害帝遂委以政事法堯舜禪授之義遂禪位於開

明帝升西山隱焉時適二月子鵑鳥鳴故蜀人悲子鵑鳥鳴也巴亦

化其教而力農務迄今巴蜀民農時先祀杜主君當作若開明當重有

字位號曰叢帝叢帝生盧帝盧帝攻秦至雍生保子帝 帝攻青

衣雄張當作長獠棘 九世有開明帝始立宗廟以酒曰醴樂曰荆

人尙赤帝稱王時蜀有五丁力士能移山舉萬鈞每王薨輒立大石長三丈重千鈞爲墓志今石筍是也號曰筍里未有謚列但以五色爲主故其廟稱青赤黑黃白帝也 開明王自夢郭移乃徙治成

都 周顯王之世蜀王有褒漢之地因獵谷中與秦惠王遇惠王

以金一笥遺蜀王王報珍玩之物物化爲土惠王怒羣臣賀曰天承有矣王將得蜀土地惠王喜乃作石牛五頭朝瀉金其後曰牛便金有養卒百人蜀人悅之使使請石牛惠王許之乃遣五丁迎石牛旣不便金怒遣還之乃嘲秦人曰東方牧犢兒秦人笑之曰吾雖牧犢當得蜀也 武都有一丈夫化爲女子美而豔蓋山精也蜀王納

爲妃不習水土欲去王必留之乃爲東平之歌以樂之無幾物故蜀王哀之乃遣五丁之武都擔土爲妃作冢蓋地數畝高七丈上有石鏡今成都北角武擔是也後王悲悼作與邪歌隴歸之曲其親埋作冢者皆立方石以志其墓成都縣內有一方折石圍可六尺長三丈

許去城北六十里曰毗橋亦有一折石亦如之長老傳言五丁士擔
土擔也公孫述時武擔石折故治中從事任文公歎曰噫西方智士
死吾其應之歲中卒 周顯王二十二年蜀侯使朝秦秦惠王數

以美女進蜀王感之故朝焉惠王知蜀王好色許嫁五女於蜀蜀遣
五丁迎之還到梓潼見一大蛇入穴中一人攬其尾掣之不禁至五
人相助大呼拙蛇山崩時壓殺五人及秦五女并將從而山分爲五
嶺直頂上有平石蜀王痛傷乃登之因命曰五婦冢山川

當作穿平屬下讀

石上爲望婦塚作思妻臺今其山或各五丁冢 蜀王別封弟葭

萌於漢中號苴侯命其邑曰葭萌焉苴侯與巴王爲好巴與蜀仇故
蜀王怒伐苴侯苴侯奔巴求救於秦秦惠王方欲謀楚羣臣議曰夫
蜀西僻之國戎狄爲鄰不如伐楚司馬錯中尉田真黃曰蜀有桀紂
之亂其國富饒得其布帛金銀足給軍用水通於楚有巴之勁卒浮
大船舶以東向楚楚地可得得蜀則得楚楚亡則天下并矣惠王曰

善 周慎王五年秋秦大夫張儀司馬錯都尉墨等從石牛道伐

蜀蜀王自於葭萌拒之敗績王遯走至武陽為秦軍所害其相傳及

太子退至逢鄉死於白鹿山開明氏遂亡凡王蜀十二世 冬十

月蜀平司馬錯等因取苴與巴 周赧王元年秦惠王封子通國

為蜀侯以陳壯為相置巴郡以張若為蜀國守戎伯尚強乃移秦民

萬家實之 三年分巴蜀置漢中郡 六年陳壯反殺蜀侯通

國秦遣庶長甘茂張儀司馬錯復伐蜀誅陳壯 七年封子惲為

蜀侯司馬錯率巴蜀眾十萬大舶船萬艘米六百萬斛浮江伐楚取

商於之地為黔中郡 五年惠王二十七年按此有誤也考史記赧王二年公子緜通

封蜀四年蜀相殺蜀侯五年誅蜀相秦惠王立十三年明年更元又

十二年凡二十五年而為赧之二年是赧三年當惠二十六年也赧

四年當惠二十七年也是年惠王卒赧五年當儀與若城成都周迴

十二里高七丈郾城周迴七里高六丈臨邛城周迴六里高五丈造
作下倉上皆有屋而置觀樓射蘭 成都縣本治赤里街若徙置

少城內城營廣府舍置鹽鐵市官并長丞脩整里闐市張列肆與咸陽同制其築城取土去城十里因以養魚今萬歲當作傾池是也惠王

二十七年也

城北又有龍垣

當作堤

池城東有千秋池城西有柳

池嘗有西北有天井池津流徑通十字見水經注

冬夏不竭其園囿因之平陽山亦有池澤

蜀之魚畋之地也

赧王十四年蜀侯惲祭山川獻饋於秦孝文

王惲後母害其寵加毒以進王王將嘗之後母曰饋從二千里來當試之王與近臣近臣卽斃文王大怒遣司馬錯賜惲劍使自裁惲懼夫婦自殺秦誅其臣郎中令嬰等二十七人蜀人葬惲郭外

五年王封其子綰爲蜀侯

十七年聞惲無罪冤死使使迎喪入

葬之郭內初則炎旱三月後又霖雨七月車溺不得行喪車至城北門忽陷入地中蜀人因名北門曰咸陽門爲蜀侯惲立祠其神有靈能興雲致雨水旱禱之

三十年疑蜀侯綰反王復誅之但置蜀

守張若因取笮及其江南地也

周滅後秦孝文王以李冰爲蜀

守冰能知天文地理謂汶山爲天彭門乃至湔氐縣見兩山對如闕因號天彭鬬髣髴若見神遂從水上立祀三所祭用三牲珪璧沈瀆漢興數使使者祭之

冰乃壅江作壩穿郫江檢江別支流雙過郡下以行舟船岷山多梓柏大竹頽隨水流坐致材木功省用饒又溉灌三郡開稻田於是蜀沃野千里號爲陸海旱則引水浸潤雨則杜塞水門故記曰水旱從人不知飢饉時無荒年天下謂之天府也外作石犀五頭以厭水精穿石犀溪於江南命曰犀牛里後轉置犀牛二頭一在府市市橋門今所謂石牛門是也一在淵中乃自湔堰

上分穿羊摩江灌江西於玉女房下白沙

舊誤自涉今改正

郵作三石人立

三水中與江神要水竭不至足盛不沒肩時青衣有沫水出蒙山下伏行地中會江南安觸山脅溷崖水脈漂疾破害舟船歷代患之冰發卒鑿平溷崖通正水道或曰冰鑿崖時水神怒冰乃操刀入水中與神鬪迄今蒙福

燹道有故蜀王兵蘭亦有神作大灘江中其

崖巖峻不可鑿乃積薪燒之故其處懸崖有赤白五色

冰又通

笮通當作

文舊誤改

井江徑臨印與蒙溪分水白木江會

當有至字

武陽

天社山下合江又導洛通山洛水或出瀑口經什邡郫別江會新都

大渡

又有緜水出紫巖山經緜竹入洛東流過資中會江陽皆

漑灌稻田膏潤稼穡是以蜀川人稱郫繁曰膏腴緜洛爲浸沃也

又識齊水脈穿廣都鹽井諸陂池蜀於是盛有養生之饒焉

漢祖自漢中出三秦伐楚蕭何發蜀漢米萬船南給助軍糧收其精

銳以補傷疾雖王有巴蜀南中不賓也

高祖六年始分置廣漢

郡

高后六年城夔道開青衣

孝文帝末年以廬江文翁爲

蜀守穿湔江口漑灌繁田千七百頃是時世平道治民物阜康承秦

之後學校陵夷俗好文刻

當作刺

翁乃立學選吏子弟就學遣雋士張

叔等十八人東詣博士受七經還以教授學徒鱗萃蜀學比於齊魯

巴漢亦立文學孝景帝嘉之令天下郡國皆立文學因翁倡其教蜀

為之始也 孝武帝皆徵入叔為博士叔明天文災異始作春秋

章句官至侍中揚州刺史 元光四年置蜀四部都尉 元鼎

二年立成都十八郭當作門見蜀都賦及劉淵林注於是郡縣多城觀矣 六年

分廣漢置犍為郡按地理志建元六年開 元封元年分犍為置牂柯郡按地理志建元六年開

理志元鼎六年開 二年分牂柯置益州郡按地理志元封二年開 六年以廣漢西部當

脫蜀南部為越巂郡按地理志元鼎六年開考漢書西南夷傳武帝建元六年置犍為郡又二十四年為元鼎六年

置牂柯郡及越巂郡沈黎郡文山郡武都郡又二年為元封二年置益州郡地理志同以訂此文先後舛駁特甚必經宋人改竄遂不可

通北部冉駝為汶山郡當有西邛笮為沈黎郡合置二十餘縣

天漢四年罷沈黎置兩部都尉一治旄牛主當有微字外羌一治青衣主

漢民 孝宣帝地節三年罷汶山郡置北部都尉 時又穿臨

邛蒲江鹽井二十所增置鹽鐵官 蜀自漢興至乎哀平皇德隆

熙牧守仁明宣德立教風雅英偉之士命世挺生感於帝思於是璽

書交馳於斜谷之南玉帛踐乎梁益之鄉而西秀彥盛或龍飛紫闈

允陟璿璣或盤桓利居經綸皓素故司馬相如耀文上京楊子雲齊
聖廣淵嚴君平經德秉哲王子淵才高明雋李仲元湛然岳立林公
孺訓詁玄遠何君公謨明弼諧王延世著勳河平其次楊壯何顯得
意之徒恂恂焉斯蓋華岷之靈標江漢之精華也故益州刺史王襄
悅之命王褒作中和頌令胄子作鹿鳴聲歌之以上孝宣帝帝曰此
盛德之事朕何以堪之卽拜爲郎 降及建武以後爰迄靈獻文

化彌純道德彌臻趙志伯三遷台衡子柔兄弟相繼元輔司空張公
宣融皇極太常仲經爲天下材英廣陵太守張文紀號天下整理武
陵太守杜伯持能決天下所疑王稚子震名華夏常茂尼流芳京尹
其次張俊秦宓英辨博通董扶楊厚究知天文任定祖訓徒同風洙
泗其孝悌則有姜詩感物寤靈禽堅精動殊俗隗通石橫中流吳順
赤烏來巢其忠貞則王皓隕身不傾朱遵絆馬必死王累懸頸州門
張任守節故主其淑媛則有元常紀常程瑛及吳几先絡郛之二姚

殷氏兩女趙公夫人自時厥後龍宗有鱗鳳集有翼摺紳邵右之疇
比肩而進世載其美是以四方述作有志者莫不仰其高風範其遺
則擅名八區爲世師表矣其忠臣孝子烈士貞女不勝詠述雖魯之
詠洙泗齊之禮稷下未足尙也故漢徵八士蜀有四焉然秦惠文始
皇克定六國輒徙其豪俠於蜀資我豐土家有鹽銅之利戶專山川
之材居給人足以富相尙故工商致結駟連騎豪族服王侯美衣娶
嫁設太牢之廚膳歸女有百兩之徒車送葬必高墳瓦椁祭奠而羊
豕夕牲贈襚兼加賄賂過禮此其所失原其由來染秦化故也若卓
王孫家僮千數程鄭各八百人而郟公從禽巷無行人簫鼓歌吹擊
鍾肆懸富侔公室豪過田文漢家食貨以爲稱首蓋亦地沃土豐奢
侈不期而至也

蜀郡州治屬縣五

當作六

戶漢廿七萬晉六萬五千去洛三千一百二

十里東接廣漢北接汶山西接漢嘉

當有南

犍爲

州治太城郡

治少城西南兩江有七橋直西門郛江中冲治橋西南石牛門曰市橋下石犀所潛淵中也城南曰江橋南渡流曰萬里橋西上曰夷里

橋上當作亦曰竿橋橋當作又從冲治橋西出當作折曰長昇橋郛江上

西有永平橋按此八字與下文複當有誤長老傳言李冰造七橋上

應七星故世祖謂吳漢曰安軍宜在七當有橋連二字見水經注星閒城北十里

有昇仙橋有送客觀司馬相如初入長安題市當作門曰不乘赤車

駟馬不過汝下也其郛當有江字西上有永平橋於是江衆多作橋故蜀

立里多以橋為名 其大江自湔堰下至犍為有五津始曰白華

津二曰里津三曰江首津四曰涉當作沙頭津劉璋時召東州民居此

改曰東州頭五曰江南津入犍為有漢安橋玉津東沮津津亦七

始文翁立文學精舍講堂作石室一作當作玉室在城南永初後

堂遇火太守陳留高朕更脩立又增造二石室州奪郡文學為州學

郡更於夷里橋南岸道東邊起文學有女牆其道西城故錦官也錦

工織錦濯其中則鮮明濯他江則不好故命曰錦里也 西又有

車官城其城東西南北皆有軍營壘城其郡四出大道道實二十里有衢今言十八里者昔蜀王女未嫁年二十亡王哀悼不忍言二十故言十八也王女墓在城北今王女陌是也 其太守著德垂績

者前漢莫聞建武以來有第五倫廉范叔度特垂惠愛百姓歌之曰廉叔度來何暮來時我單衣去時重五袴其後漢中趙瑤自扶風太守來之郡司空張溫謂曰第五伯魚從蜀郡爲司空今掃吾第以待足下瑤換廣漢陳留高眈亦播文教太尉趙公初爲九卿適子寧還蜀眈命爲文學撰鄉俗記亦能屈士如此廣漢王商犍爲楊洪皆見詠懷 及晉建西夷府太守多遷爲西夷校尉亦遷益州刺史

成都縣 郡治 有十二鄉五部尉漢戶七萬晉三萬七千名

難治時廣漢馮顥爲令而太守京兆劉宣不奉法顥奏免之立文學學徒八百人實戶口萬八千開稻田百頃治有尤異後有廣漢劉龐

爲令大姓恣縱諸趙倚公故多犯法濮陽太守趙子真父子強橫龐
治其罪莫不震肅郫民陽伯侯奢侈大起冢營因龐爲郫令伯侯遂
徙占成都龐復爲成都豪右敬服有蜀侯祠大姓有柳杜張趙郭楊
氏富先有程鄭郅公後有郭子平奢豪楊伯侯兄弟

郫縣

郡西北六十里冠冕大姓何羅郭氏

繁縣

郡北九十里有泉水稻田三張爲甲族

江原縣

郡西渡大江濱文井江去郡一百二十里有青城山稱

江祠安漢上下朱邑出好麻黃潤細布有羌筒盛小亭有好稻田東

方常氏爲大姓文井

當有江字

上有守捉

按守捉當作常氏堤見水經注

三十里上有天

馬祠

臨邛縣

郡西南二百里本有邛民秦始皇徙上郡實之有布濮

水從布濮來合文井江有火井夜時光映上昭民欲其火先以家火
投之頃許如雷聲火燄出通耀數十里以竹筒盛其光藏之可拽行

終日不滅也井有二當有誤水取井火煮之一斛水得五斗鹽家火煮

之得無幾也有古石山有石鑛大如蒜子火燒合之成流支鐵甚剛

因置鐵官有鐵祖廟祠漢文帝時以鐵銅賜侍郎鄧通通假民卓王

孫歲取千匹故王孫貨累巨萬億鄧通錢亦盡天下王孫女文君能

鼓琴時有司馬長卿者臨邛令王吉與之游王孫家文君因奔長卿

漢世縣民陳立歷巴郡牂柯天水太守有異政陳氏劉氏為大姓冠

蓋也

廣都縣 郡西三十里元朔二年置有鹽井漁田之饒大豪馮氏

有魚池鹽井縣凡有小井十數所及漁田之饒江有魚漕梁山有鐵

鑛江西有安當有誤稻田穿山崖過水二十里漢時縣民朱辰字元燕

為巴郡太守甚著德惠辰卒官郡獲民北送及墓獲蜚鼓刀辟踊感

動路人於是葬所草木頃許皆做之曲折迄今蜀人莫不歎辰之德

靈為之感應今朱氏為首族也

成都市官本有長建武十八年省

蜀郡太康初屬王國改號曰成都內史王改封乃復舊

廣漢郡高帝六年置屬縣八漢戶十七萬晉四萬去洛三千里南去成都百二十里西接汶山北接梓潼東接巴郡本治繩鄉安帝永和中陰平漢中羌反元初二年移涪後治雒城王莽改曰就都公孫述名曰子同益州以蜀郡廣漢犍爲爲三蜀土地沃美人士俊乂

一州稱望然漢選蜀郡廣漢太守每重德高俊故前趙護第五伯魚後有蔡陳表章禮物殊於諸郡其太守著功德者有劉感孫賓蔡當字陳魚自郡逕遷司徒寵亦至三公而殺諷尹睦鮮于趙瑤

皆公望也薛鴻輦卿佐也而許靖亦爲上公及何祗常閔皆有稱

以處州中益州恆治此郡初平中益州牧劉焉自縣竹移雒縣城築闕門云其地不王乃留孫脩據之建安十八年劉先主自涪

攻圍且一年軍師龐統中流矢死先主痛惜言則涕泣廣漢太守南

楊張存曰統雖可惜違大雅之體先主怒曰統殺身成仁非仁乎卽免存官

十九年夏雒城拔襄陽馬良書詒諸葛亮曰承雒城已

下尊兄配業光國魄兆見矣時州或治成都時復治雒爲蜀淵府

雒縣

郡治

汎當作沈鄉有孝子姜詩田地宅姓族有鐔李郭

翟氏

緜竹縣

劉焉初所治緜與雒各出稻稼畝收三十斛有至五十

斛漢時任定祖以儒學教號侔沫泗有多士秦杜爲首族也

什仿縣

山出好茶楊氏爲大姓美田有鹽井

新都縣

蜀以成都廣都新都爲三都號名城有金堂山水通於

巴漢時五倉名萬安倉有棗魚梁多名士有楊厚董扶又有四姓馬

史汝鄭者也

五城縣

郡東南有水通於巴漢時置五倉發五縣民尉部主之

後因以爲縣出龍骨云龍升其山值天門閉不達墮死於此後沒地

中故掘取得龍骨

鄆縣 有山原田富國鹽井濮出好棗宜君山出麋當作麀廣韻引不誤尾

特好入貢大姓王李氏又有高馬家世掌部曲蜀時高勝馬秦皆叛

伏誅

廣漢縣 有山原田蜀時彭義當作義有雋才晉世改當作段下當有容字段容

見後賢志號令德故二姓為甲族也

德陽縣 有青石祠山原肥沃有澤漁之利士女貞孝望山樂水

土地易為生事車騎將軍鄧芝雅有終焉之思後遂葬其山太守夏

侯慕時古濮為功曹康古袁當有脫氏為四姓大族之甲者也

劉氏延熙中分廣漢四縣置東廣漢郡咸熙初省泰始末又分置新

都郡太康省末年又置蜀王國蜀郡常騫為內史永嘉末省

犍為郡孝武建元六年置時治警當有屬字縣十二漢戶十萬警故犍為

地是也警有犍山見保乾圖 武帝初欲開南中令蜀通棘青衣

道建舊誤是元年當作中當作棘道令通之費功無成百姓愁怨司馬相如

諷諭之使者唐蒙將南入以道不通執令將斬之嘆曰忝官益土恨

不見成都市蒙即令送成都市而殺之蒙乃斬石通閣道故世為諺

曰思都郵斬令頭云後蒙為都尉治南夷道 元光五年郡移治

南廣 太初舊脫此二字今補正見水經注四年益州刺史任安城武陽 孝

昭元年郡治棘道後遂徙武陽至晉屬縣五戶二萬去洛三千二百

七十里東接江陽南接朱提北接蜀郡西接廣漢當作漢嘉王橋升其北

山彭祖家當有其家其彭蒙當作家白虎仁於廣德寶鼎見於江漑綏和五

年又上寶磬十六劉向以為美化所降用立辟雍而士多仁孝女性

貞專王莽改曰西順郡人不會更始都南陽遠奉貢職及公孫述有

蜀郡拒守述伐之郡功曹朱遵逆戰眾寡不敵遵絆馬死戰遂為述

所并而任君業閉戶費貽素隱光武帝嘉之曰士大夫之郡也

郡去成都百五十里渡大江昔人作大橋曰漢安橋廣一里半每秋

夏水盛斷絕歲歲脩理百姓苦之建安二十一年太守南陽李嚴乃鑿天社山尋江通車當道省橋三津吏民悅之嚴因更造起府寺觀壯麗爲一州勝宇 二十四年黃龍見武陽赤水九日蜀以劉氏瑞應其太守漢興以來鮮有顯者

武陽縣 郡治 有王橋彭祖祠蒲當作藉 江當有爲字見水經注大堰灌

郡下六門有朱遵祠山出鐵及白玉特多大姓有七楊五李諸姓十二也

南安縣 郡東四百里治青衣江會縣溉有名灘當作灘名誤倒灘句絕讀名下

屬一當行曰雷垣當作坻 二當作亦皆見水經注曰鹽溉李冰所平也有柑橘官社

漢有鹽井南安武陽皆出名茶多陂池西有熊耳當有峽字續漢志注引不誤南

有峨眉山山去縣八十里孔子地圖言有仙藥漢武帝遣使者祭之欲致其藥不能得有四姓能宣謝審五大族楊費又有信士呂孟真

紀至行也

棘道縣

在南安東四百里距郡百里高后六年城之治馬湖江

會水通越舊本有棘人故秦紀言棘童之富漢民多漸斥徙之有荔

芟薑蒟濱江有兵蘭李冰所燒之崖有五色赤白映水玄黃魚從楚

當作棘見水經注

來至此而止畏崖映水也有韓原素祠又有孝子隗通為

母汲江裔

當作齊見水經注

水天為出平石生江

當有齊字

中今石在馬湖江而

孝子吳順奉母赤烏巢其門崩容江出好磨石江多魚害民失在於

徵巫好鬼妖大姓吳隗又有楚石薛相者

牛鞞縣

受新都江去郡二百里元鼎二年置

句相當作有

陽明

鹽井程韓氏為冠蓋之族

資中縣

受牛鞞江也先有王延世著勳河平後有董鈞為漢定

禮王董張趙為四族二縣在中多山田少種稻之地

以上三十六字舊錯簡入江陽

郡下今移正

江陽郡

舊此下錯簡今移正見上

本犍為枝江都尉建安十八年置郡漢安程徵

石謙白州牧劉璋求立郡璋聽之以都尉廣漢成存為太守屬縣四
戶五千去洛四千八百里東接巴郡南接牂柯西接廣漢當衍此犍

為北接廣漢有荔枝巴菽桃枝蒟給當有橙俗好文刻當作少儒學

多樸野蓋天性也舊校云有荔枝巴菽桃枝蒟給橙字與

江陽縣 郡治 治舊脫治字今補正 江維會有方山蘭祠江中有大

闕小闕季春黃龍堆沒闕即平昔云世祖微時過江陽有一子望氣

者曰江陽有貴兒氣王莽求之縣人殺之後世祖為子立祠謫江陽

民不使冠帶者數世有富義鹽井又郡下百二十里者曰伯塗魚梁

云伯氏女為塗氏婦造此梁四姓王孫程鄭八族又有趙魏先周也

漢安縣 郡東當有五百當有里土地雖迫山水特美好宜蠶桑

有鹽井魚池以百數家家有焉一郡豐沃四姓程姚郭石八族張季

李趙輩而程石傑立郡常秉議論選之

符縣 郡東二百里元鼎二年置治安樂水會當有東接巴蜀當

樂城絕句南水

當行通平夷

舊誤羌今改正

警縣永建元年十二月縣長趙祉遣

吏先尼和拜檄巴蜀

當行守過成瑞灘

死子賢求喪不得女絡年二十

五迺分金珠作二錦囊繫兒頭下至二年二月十五日女絡乃乘小

船至父沒所哀哭自沈見夢告賢曰至二十一日與父尸俱出至日

父子浮出縣言郡太守蕭登高之上尙書遣戶曹掾爲之立碑人爲

語曰符有先絡楚道張帛求其夫天下無有其偶者矣

新樂縣

郡西二百八十里元康五年置西楚

當作通

楚道有鹽井

大姓魏呂氏

舊校云西楚楚道四字疑誤

汶山郡本蜀郡北部冉駝都尉孝武元封四

當作鼎六漢書武帝紀後漢書冉駝夷傳皆有

明文郡立於元鼎六年庚午省於地節三年甲寅故凡四十五年也

年置舊屬縣八戶二十五萬去洛

三千四百六十三里東接蜀郡南接漢嘉西接涼

舊誤梁今改正

州酒泉北

接陰平有六夷羌胡羌虜白蘭峒九種之戎牛馬旄氍班罽青頓髦

毼羊毼

按後漢書毼作髮章懷注云青頓毼髮並未詳字書無此二字

之屬特多雜藥名香土地剛

鹵不宜五穀惟種麥而多冰寒盛夏凝凍不釋故夷人冬則避寒入蜀庸賃自食夏則避暑反落歲以為常故蜀人謂之作五百石子也

宣帝地節元

當作三漢書宣帝紀後漢書冉駹夷傳皆有明文又前云孝宣地節三年罷汶山郡者即此事亦可

證也太平寰宇記引年武都白馬羌反使者駱武平之因此脫去乃

關汶山郡云云又關漢嘉郡又關越嶲郡首也考太平寰宇記引華陽國志宣帝地節元年武都白馬羌反使駱武平定之因慰勞汶山

吏及百姓詣武自訟一歲再度更賦至重邊人貧苦無以供給求省郡郡建以來四十五年矣武以狀上遂省汶山郡復置都尉今汶山

郡此因字下無慰勞云云而誤連越嶲郡之拜越嶲太守云云慰勞以下當在所關中又考晉書地理志汶山郡統縣入汶山升遷都安

廣陽興樂平康蠶陵廣柔也漢嘉郡統縣四漢嘉徙陽嚴道旄牛也劉昭續漢郡國志注蜀郡汶江道引華陽國志曰澌水馳水出焉多

冰寒盛夏凝凍不釋孝安延光三年復立之以為郡又廣柔引華陽國志曰夷人營其地方百里不敢居牧有過逃其野中不敢追云畏

禹神能藏三年為人所不得則共原之云禹神靈祐之又縣虎道引華陽國志曰有玉壘山出壁玉湍水所出當在今汶山郡所關中顏師

古注漢書貨殖傳引華陽國志曰汶山郡都安縣有大芋如蹲鴟也亦當在今汶山郡所關中又劉昭注蜀郡屬國漢嘉引華陽國志曰

有沫水從邛崃出岷江又從岷山西來入江合郡下青衣江入大江土地多山又巖道引華陽國志曰道至險有長嶺若棟入渡之難楊

母閣之峻昔楊氏倡造作閣故名焉邛崃山本名邛荝故邛人荝人界也巖阻峻迴曲九折乃至山上凝冰夏結冬則劇寒王陽行部至

此退又徙引華陽國志曰出丹砂雄雌黃空青青碧又旄牛引華陽國志曰旄地也在邛崃山表邛人自蜀入度此山甚險難南人毒之故名邛崃有鮮水若水一名洲江當在今所闕漢嘉郡中水經沫水篇注引華陽國志沫青衣二水於漢嘉青衣縣東合爲一川亦當在今所闕漢嘉郡中以此訂之郡有青衣縣不盡如晉志也世閱已無善本得見其元文者矣

〔漢嘉郡〕

闕

〔越巂郡〕

闕

以上拜越巂太守迎者如雲後蜀郡趙

當衍此三字

温

當作亦

著治績

按考後漢書邛都夷傳永平後太守巴郡張翕政化清平得夷人和在郡十七年卒安帝元初六年天子以張翕有遺愛

乃拜其子湍爲太守夷人懼喜奉迎道路此以上所闕及僅存之原委也宋人校刊改竄全非

故王莽遣任貴

爲鎮戍大尹守之自建武後數叛

按以上亦宋人校刊改竄王莽建武不得在永平元初後也今但無

以正

章武三年越巂高叟大帥高定元稱王恣睢遣都督李承

之煞將軍梓潼焦璜破沒郡土丞相亮遣越巂大守龔祿住安上縣

遙領太守安上去郡八百里有名而已

建興三年蜀安南將軍

馬忠討越巂郡夷郡夷剛很皆鴟視忠率越巂太守張嶷將所領之

郡誘殺蘇祈邑君冬逢及其弟隗渠等懷集種落威信允著諸種漸

服又斬斯都耆帥李承之首乃手煞焦璜龔祿者也又討叛鄙降夷

人安種落蠻夷率服疑始以郡郭宇頽更築小塢居之舊校云舊本記此段訛外

不重敘姑考專之本末略加整頓刻之今按章武三年以下用三國志證之未見訛外李奎所整頓謂其以上耳延熙二年

乃還舊郡更城郡城夷人男女莫不致力興復七縣疑遷後復頗奸

軌雖有四部斯兒當作叟下同及七營軍不足固守乃置赤甲北軍二牙

門及斯兒督軍中堅衛夷徼

邛都縣 郡治 因邛邑名也邛之初有七部後為七部營軍

又有四部斯兒南山出銅續漢書志注引邛都河有啣雋山疑此有脫文有温泉穴冬夏熱

其温可湯鷄豚下流治疾病餘多惡水水神護之不可污穢及沈亂

髮照面則使人被惡疾一郡通云然

臺登縣 有孫水一曰白沙江入馬湖水山有磐石火燒成鐵剛

利禹貢厥賦磐是也又有漆漢末夷皆有之疑取焉舊校云張疑也

闡縣 故邛人邑續漢志注引有治字邛都續漢志注引有城字接寒關按當有誤續漢書志注引

靈關道有銅山又有利慈疑此郡本有靈道縣今爲脫文遂無以補之附見於此 今省

蘇示縣 漢末夷王及弟隗渠數偕叛以服諸種張嶷先殺王弟

隗渠又叛遁入西徼遣親信二人使嶷嶷知姦計以重賂使使殺渠

渠死夷徼肅清縣晉省

會無縣 路通寧州渡瀘得住當作狼當作蝦南中志作縣故濮人邑也

今有濮人冢冢不閉戶其穴多有碧珠人不可取取之不祥有天馬

河馬日千里後死於蜀葬江原小亭今天馬冢是也縣有天馬祠初

民家馬牧山下或產駿駒云天馬子也今有天馬徑厥跡存焉河中

有銅胎今以羊祀之可取河中見存土地時當作產當有犀牛當有

山色當作青碧志注引不誤

大笮縣 漢末省也

定笮縣 笮笮當夷也汶山曰夷南中曰昆明漢嘉越巂曰笮蜀

曰邛皆夷種也縣在郡西渡瀘水賓剛徼白摩沙夷有鹽池積薪以

齊水灌而後焚之成鹽漢末夷皆錮之張嶷往爭夷帥狼舊脫此字今補正

岑槃木王舅此二字舊誤作明今改正不肯服嶷禽撻殺之厚賞賜餘類皆安官

迄有之北沙河是

三縫縣 一曰小會無音三播舊校云音三播字疑誤通道寧州渡瀘得蜻

蛉縣有長谷石時坪中有石豬子母數千頭長老傳言夷昔牧豬於

此一朝豬化為石迄今夷不敢牧於此

卑水縣 去郡三百里水流通馬湖

潛街縣 漢末置晉初省

安上縣

馬湖縣 水通犍道入江晉初省

右益州 漢初統郡五後漸分建蜀郡及巴郡又分爲五郡廣漢

漢中犍爲四郡又開益州五郡合二十五郡及寧州梁州建復增七

郡按以上舛駁所未詳矣蜀於是有三舊脫此字今補正州四當有十二郡一百九十

六縣

州分後益州凡新舊郡九

當有誤

縣四十八戶夷晉二十二

萬

譔曰蜀之爲邦天文井絡輝其上地理岷嶓鎮其域五岳則華山表其陽四瀆則汶江出其徼故上聖則大禹生其鄉媾姻則黃帝婚其女顯族大賢彭祖育其山列仙王喬升其岡而寶鼎輝光於中流離龍仁虎躍乎淵陵開闢及漢國富民殷府腐穀帛家蘊畜積雅頌之聲充塞天衢中林之詠侔乎二南蕃衍三州土廣萬里方之九區於斯爲盛固乾坤之靈囿先王之所經緯也

華陽國志卷第三

華國國史卷之二

漢書卷之六十四

漢書卷之六十四 卷之六十四 卷之六十四

漢書卷之六十四 卷之六十四 卷之六十四

漢書卷之六十四 卷之六十四 卷之六十四

漢書卷之六十四 卷之六十四 卷之六十四

漢書卷之六十四 卷之六十四 卷之六十四

漢書卷之六十四 卷之六十四 卷之六十四

漢書卷之六十四 卷之六十四 卷之六十四

華陽國志卷第四

南中志

寧州晉泰始六年初置蜀之南中諸郡庾降都督治也南中在昔蓋

夷越之地滇濮句町夜郎葉榆桐師嵩唐侯王國以十數編髮左衽

隨畜遷徙莫能相雄長舊校云下永昌郡有嵩唐縣周之季世楚威按顏師古漢書地理志注

引作頃襄考史記漢書西南夷傳皆作威蓋顏師古因秦奪楚黔中地在頃襄王時改而引之也王遣將軍莊蹻泝

沅水出且蘭以伐夜郎植牂柯繫當作椽下同船於是且蘭既克夜郎又

降而秦奪楚黔中地無路得反遂留王滇池躡楚莊王苗裔也以牂

柯繫船因名且蘭為牂柯國分侯支黨傳數百年秦并蜀通五尺道

置吏主之漢興遂不賓有竹王者興於遯水有一女子浣於水

濱有三節大竹流入女子足閒推之不肯去聞有兒聲取持歸破之

得一男兒長養有才武遂雄夷狄氏以竹為姓捐所破竹於野成竹

林今竹王祠竹林是也王與從人嘗止大石上命作羹從者曰後漢書夜

郎傳注無水王以劍擊石水出今後漢書夜郎傳注引有竹字王水是也破石存

焉後漸驕恣武帝使張騫至大夏國見邛竹蜀布問所從來曰吾賈人從身毒國得之身毒國蜀之西國今永昌是也騫以白帝東越攻南越大行王恢救之恢使番陽令唐蒙曉喻南越人食有菹醬蒙問所從曰牂柯來蒙亦以白帝因上書曰南越地東西萬里名爲外臣實一州主今以長沙豫章往水道多絕難行竊聞夜郎精兵可得十萬若從番禺浮船牂柯出其不意此制越之一奇也可通夜郎道爲置吏主之帝乃拜蒙中郎將發巴蜀兵千人奉幣帛見夜郎侯喻以威德爲置吏旁小邑皆貪漢繒帛以爲道遠漢終不能有也故皆且聽命司馬相如亦言西戎邛笮蜀之後園可置爲郡帝旣感邛竹又甘菹醬乃拜爲中郎將往喻意皆聽命後西南夷數反發運役費甚多相如知其不易也乃假巴蜀之論以諷帝且以宣指便

於百姓舊校云檄在本傳卒開棘門通南中相如持節開越舊按道侯韓說

開益州武帝轉拜唐蒙爲都尉開牂柯以重幣喻告諸種侯王侯王服從因斬竹王置牂柯郡以吳霸爲太守及置越雋朱提益州四郡後夷濮阻城咸怨訴竹王非血氣所生求立後嗣霸表封其三子列侯死配食父祠今竹王三郎神是也

昭帝始元元年益州廉頭

姑繒等二十四縣民反水衡都尉呂破奴募吏民及發犍爲蜀郡奔命擊破之後三歲姑繒復反都尉呂辟胡擊之敗績明年遣大鴻臚田廣明等大破之斬首捕虜五萬人獲畜產十萬餘頭富埒中國封其渠帥亡波爲鉤町王以助擊反者故也廣明賜爵邑

成帝時

夜郎王興與鉤町王禹漏臥侯愈更相攻擊帝使太中大夫張匡持節和解之鉤町夜郎王不服乃刻木作漢使射之大將軍王鳳薦金城司馬蜀郡陳立爲牂柯太守何霸爲中郎將

當有

出益州立旣到

郡單至夜郎召興興與邑君數千人來見立立責數斬興邑君皆悅服興妻父翁指興與子恥復反立討之威震南裔

平帝末梓潼

文齊為益州太守公孫述時拒郡不服光武稱帝以南中有義

益州西部金銀寶貨之地居其官者皆富及十世孝明帝初廣漢鄭

純獨尚清廉毫毛不犯夷漢歌詠表薦無數上自三司下及卿士莫

不歎賞明帝嘉之因以為永昌郡拜純太守 章帝時蜀郡王阜

為益州太守治化尤異神馬四匹出滇池河中甘露降白鳥見始興

文學漸遷其俗 安帝永初中漢中陰平廣漢羌反征戰連年

元初四年益州永昌越嶲諸夷封離等反眾十餘萬多所殘破益

州刺史張喬遣從事蜀郡楊竦將兵討之竦先以詔書告諭告諭不

從方略滌討凡殺虜三萬餘人獲生口千五百人財物四千餘萬降

赦夷三十六種舉劾姦貪長吏九十人黃綬六十人諸郡皆平竦以

傷死故功不錄自是後少寧五十餘年 迄靈帝熹平中蠻夷復

反擁沒益州太守雍陟遣御史中丞朱龜將并涼勁兵討之不克朝

議不能征欲依朱崖故事棄之太尉掾巴郡李顥獻陳方策以為可

討帝乃拜顯益州太守與刺史龐芝伐之徵龜還顯將巴郡板楯軍討之皆破陟得生出後復更叛梓潼景毅爲益州太守承喪亂後民夷困餓米一斛千錢皆離散毅至安集後米一斛八錢

建安十

九年劉先主定蜀遣安遠將軍南郡鄧方以朱提太守庾降都督治南昌縣輕財果毅夷漢敬其威信方亡先主問代於治中從事建寧李恢對曰西零之役趙充國有言莫若老臣先主遂用恢爲都督治平夷縣先主薨後越雋叟帥高定元殺郡將軍焦璜舉郡稱王以叛益州大姓雍闓亦殺太守正昂更以蜀郡張裔爲太守闓假鬼教曰張裔府君如瓠壺外雖澤而內實麤殺之不可縛與吳於是執送裔於吳吳主孫權遙用闓爲永昌太守遣故劉璋子闓爲益州刺史處交益州際牂柯郡丞朱褒領太守恣睢丞相諸葛亮以初遭大喪未便加兵遣越雋太守巴西龔祿住安上縣遙領郡從事蜀郡常頌行部南入以都護李嚴書曉喻闓闓答曰愚聞天無二日土無二

王今天下派分正朔有三遠人惶惑不知所歸其傲慢如此頽至牂柯收郡主簿考訊姦褻因煞頽爲亂益州夷復不從闔閩使建寧孟獲設夷叟曰官欲得烏狗三百頭膺前盡黑螭腦三蚪斷木構三丈者三千枚汝能得不夷以爲然皆從闔斷木堅剛性委曲高不至二丈故獲以欺夷

建興三年春亮南征自安上由水路入越嶲別

遣馬忠伐牂柯李恢向益州以犍爲太守廣漢王士爲益州太守高定元自旄牛定笮卑水多爲壘守亮欲俟定元軍衆集合并討之軍卑水定元部曲殺雍闓及士庶等

當衍二字

孟獲代闓爲主亮旣斬定元

而馬忠破牂柯李恢敗於

當衍

南中

夏五月亮渡瀘進征益州生

虜孟獲置軍中問曰我軍如何獲對曰恨不相知公易勝耳亮以方務在北而南中好叛亂宜窮其詐乃赦獲使還合軍更戰凡七虜七赦獲等心服夷漢亦思反善亮復問獲獲對曰明公天威也邊民長不爲惡矣秋遂平四郡改益州爲建寧以李恢爲太守加安漢將軍

領交州刺史移治味縣

分建寧越嶲置雲南郡以呂凱爲太守

又分建寧牂柯置興古郡以馬忠爲牂柯太守移南中勁卒青

羌萬餘家於蜀爲五部所當無前軍號飛

舊校云闕

分其羸弱配大姓焦

雍婁爨孟量毛李爲部曲置五部都尉號五子故南人言四姓五子也
以夷多剛很不賓大姓富豪乃勸令出金帛聘策惡夷爲家部曲
得多者弈世襲官於是夷人貪貨物以漸服屬於漢成夷漢部曲亮
收其俊傑建寧爨習朱提孟琰及獲爲官屬習官至領軍琰輔漢將
軍獲御史中丞出其金銀丹漆耕牛戰馬給軍國之用都督常用重
人

李恢卒後以蜀郡太守犍爲張翼爲都督翼持法嚴不得殊

俗和夷帥劉胄反徵翼以馬忠爲代忠未至翼脩攻戰方略資儲羣
下懼翼曰吾方臨戰場豈可以絀退之故廢公家之務乎忠至承以
滅胄蜀賜翼爵關內侯忠在南柔遠能爾甚垂惠愛官至鎮南大將
軍卒後南人爲之立祠水旱禱之以蜀郡張表爲代加安南將軍又

以犍爲楊義

當作義

爲參軍副貳之表後以南郡閻宇爲都督南郡霍

弋爲參軍弋甚善參毗之禮遂代宇爲監軍安南將軍撫和異俗爲之立法施教輕重允當夷晉安之 及晉世因仍其任時交趾不

附假弋節遙領交州刺史得以便宜選用長吏今官和解夷人及適

罰之皆依弋故事弋卒子在龔

當作龔

領其兵和諸姓晉以巴西太守

吳靜在官數年撫卹失和軍司鮮于嬰表徵靜還嬰因代之

泰

始六年以益州大分南中四郡爲寧州嬰爲刺史

咸寧五年尙

書令衛瓘奏兼并州郡

太康三年罷寧州置南夷以天水李毅

爲校尉持節統兵鎮南中統五十八部夷族都監行事每夷供貢南

夷府入牛金旃馬動以萬計皆豫作忿恚致校尉官屬其供郡縣亦

然南人以爲饒自四姓子弟仕進必先經都監夷人大種曰昆小種

曰叟皆曲頭木耳環鐵裹結無大侯王如汶山漢嘉夷也夷中有桀

黠能言議屈服種人者謂之耆老便爲主論議好譬諭物謂之夷經

今南人言論雖學者亦半引夷經與夷爲姓當作婚曰遑耶諸姓當作婚字

爲自有耶世亂犯法輒依之藏匿或曰有爲官所法夷或爲報仇與夷至厚者謂之百世遑耶恩若骨肉爲其逋逃之藪故南人輕爲禍變恃此也其速徵巫鬼好詛盟投石結草官常以盟詛要之諸葛亮乃爲夷作圖譜先畫天地日月君長城府次畫神龍龍生夷及牛馬羊後畫部主吏乘馬幡蓋巡行安卹又畫牽牛負酒齎金寶詣之象以賜夷夷甚重之許致生口直又與瑞錦鐵券今皆存每刺史校尉至齎以呈詣動亦如之 毅後永昌呂祥爲校尉祥後數人李

廣漢從雲南犍爲郡守爲校尉久之建寧太守巴西杜俊朱提太守梓潼雍約懦鈍無治政以賄成俊奪大姓鐵官令毛詵中郎李叡部曲致詵弟耐罪朱提大姓太中大夫李猛有才幹弟爲功曹分當察舉而俊約受都尉雷逢賂舉逢子炤孝廉不禮猛等怨之 太

安元年初詵叡猛當逐俊以叛猛貽之書曰昔魯侯失道季氏出之

天之愛民君師所治知足下追踵古人見賢思齊足下箕帚枉慚吾郡亦逐約應之作亂衆數萬毅討破之斬誅首勣走依遑耶五蔡當夷帥于陵承猛箋降曰生長遐荒不達禮教徒與李雄和光合勢雖不能營師五丈略地渭濱冀北斷褒斜東據永安退老靈符晉德長久誠非狂夫所能干輒表革面歸罪有司毅惡其言遂誘殺之

部永昌從事江陽孫辨上南中形勢七郡斗絕晉弱夷強加其土人屈塞應復寧州以相鎮慰冬十一月丙戌詔書復置寧州增統牂柯益州朱提合七郡爲刺史加龍驤將軍進封成都縣侯二年于陵承詣毅請恕勣罪毅許之勣至羣下以爲誅勣破州土必殺之毅不得已許諾及勣死于陵承及誅猛遑耶怒扇動謀反奉建寧太守巴西馬恢爲刺史燒郡僞發毅方疾作力出軍初以救恢及聞其情乃殺恢夷愈強盛破壞郡縣沒吏民會毅疾甚軍連不利晉民或入交州或入永昌牂柯半亦爲夷所困虜夷因攻圍州城毅但疾力

固孤城病篤不能戰討時李特李雄作亂益州而所在有事救援莫至毅上疏陳謝不能式遏寇虐疾與事遇使虜遊魂兵穀旣單器械窮盡而求救無望坐待殄斃若必不垂矜憂乞請大使及臣尙存加臣重罪若臣已死陳屍爲戮積四年

光熙元年春三月毅薨子

釗任洛還赴到牂柯路塞停住交州文武以毅女秀明達有父才遂奉領州事秀初適漢嘉太守廣漢王載載將家避地在南故共推之又以載領南夷龍驤參軍秀獎勵戰討食糧已盡人但樵草炙鼠爲命秀伺夷怠緩輒出軍掩破首尾三年釗乃得達丁喪文武復逼釗領州府事毅故吏毛孟等詣洛求救至欲自刎懷帝乃下交州使救助之以釗爲平寇將軍領南夷護軍遣御史趙濤贈毅少府諡曰威侯交州刺史吾彥遣子威遠將軍咨以援之朝廷以廣漢太守魏興王遜爲南夷校尉寧州刺史代毅自永嘉元年受除四年乃至遙舉建寧董敏爲秀才郡久無太守功曹周悅行郡事輕敏不下其板遜

至怒殺悅弟秦臧長周曷合夷叟謀以趙濤父渾昔爲建寧有德
惠欲殺遜樹濤遜誅之并殺濤夷晉莫不惶懼表劍爲朱提太守治
南廣禦雄時荒亂後倉無糶粟衆無一旅官民虛弱繩紀弛廢遜惡
衣菜食招集夷民夷徼厭亂漸亦返善勞來不怠數年克復以五茶

當作

夷昔爲亂首圖討之未有致罪會夷發夜郎莊王墓遜因此遂

討滅之及討惡獠剛夷數千落威震南方官至平西安南將軍又兼
益州刺史加散騎常侍封褒中伯而嚴猛太過多所誅鋤犍爲太守
朱提雷炤流民陰貢平樂太守董霸破牂柯平夷南廣北降李雄建
寧爨量與益州太守李湯梁水太守董懂保興古盤南以叛雄遣叔
父驤破越嶲代寧州遜使督護雲南姚岳距驤於堂螂縣違遜指授
雖大破之驤不獲 太興四年遜發病薨州人推中子堅領州事
永昌元年晉朝更用零陵太守南陽尹奉爲寧州刺史南夷校尉加
安西將軍奉威刑緩鈍政治不理 咸和八年遂爲雄弟壽所破

獲南中盡爲雄所有惟牂柯謝恕不爲壽所用遂保郡獨爲晉官至撫夷中郎將寧州刺史冠軍是歲咸和八年也

牂柯郡漢武帝元鼎二

當作六

年開屬縣漢十七戶六萬及晉縣四

當作

八戶五千去洛五千六百一十里郡上值天井故多雨潦俗好鬼巫

多禁忌畚山爲田無蠶桑頗尙學書少威棱多懦怯寡畜產雖有僮

僕方諸郡爲貧王莽更名牂柯曰同亭郡不服會公孫述時

當作據李至依

後漢書三蜀句

誤改耳大姓龍傳尹董氏與功曹謝暹保郡聞漢世祖在河

北乃遠使使由番禺江出奉貢漢朝世祖嘉之號爲義郎

明章

之世毋斂人尹珍字道真以生遐裔未漸庠序乃遠從汝南許叔重

受五經又師事應世叔學圖緯通三材還以教授於是南域始有學

焉珍以經術選用歷尙書丞郎荊州刺史而世叔爲司隸校尉師生

並顯平夷傳保夜郎尹貢亦有名德歷尙書郎長安令巴郡太守彭

城相號南州人士郡特多阻險有延江霧赤煎水爲池衛少有亂惟

朱褒見誅其郡守垂功名者前有吳霸陳立後有漢中張亮則廣漢

劉寵犍為費詩巴西馬忠皆著勳烈晉元帝世太守建寧孟才以驕

暴無恩郡民王清范朗逐出之刺史王遜怒分營半當作平下為平

夷郡夜郎以南為夜郎郡當有但字四縣

萬壽縣 郡治 有萬壽山沮當有本有鹽井漢末時夷民共詛

盟不開今三郡皆無鹽

且蘭縣舊校云音沮 漢曰故且蘭有柱蒲關也

廣談縣

毋斂縣 有剛火當作水見漢書地理志也

平夷郡晉元帝建興當作武元年置屬縣二戶千

平夷縣 郡治 有碣津安樂水山出茶蜜

營縣 故犍為郡城也不狼山出營水入沅有野生薜可食大姓

王氏

夜郎郡夜郎國也屬縣二戶千

夜郎縣

郡治

有遼水通廣鬱林

後漢書夜郎傳注引無廣字

有竹王三

郎祠甚有靈響也

談指縣

晉寧郡本益州也元鼎初屬牂柯越嶲漢武帝元封二年叟反遣將軍郭昌討平之因開為郡治滇池上號曰益州漢屬縣二十四戶二十萬晉縣七戶萬去洛五百里司馬相如韓說初開得牛馬羊屬三十萬漢乃募徙死罪及奸豪實之郡土大平敞原田多長松臯有鸚鵡孔雀鹽池田漁之饒金銀畜產之富俗奢豪難撫御惟文齊王阜景毅李顥及南郡董和為之防檢後遂為善蜀建興二年丞相亮之南征以郡民李恢為太守改曰建寧治味縣寧州別建為益州郡後太守李暹恢孫也與前太守董懂建興爨量共叛寧州刺史王遜表改益州為晉寧郡

滇池縣

郡治

故滇國也有澤水週迴二百里所出深廣下

流淺狹如倒流故曰滇池長老傳言池中有神馬或交焉即生駿駒

俗稱之曰滇池駒日行五百里

當有有黑二字見漢書地理志

水神祠祀亦有溫泉

如越雋温水又有白蜩山山無石惟有蜩也

同勞縣

同安縣

連然縣

有鹽泉南中共仰之

建伶縣

毋單縣

秦臧縣

建寧郡治故庾降都督屯也南人謂之屯下屬縣晉太安二年分爲

益州平樂二郡合縣十三戶萬去洛五千六百三十九里有五部都

尉四姓及霍家部曲

味縣

郡治

有明月社夷晉不奉官則官與共盟於此社也

牧麻縣

山出好升麻有塗水

同樂縣

大姓爨氏

穀昌縣

漢武帝將軍郭昌討夷平之因名郭昌以威夷孝章時

改爲穀昌也

同瀨縣

雙柏縣

存駝縣

雍闓反結壘於縣山繫馬柳柱生成林今夷言無雍梁

言馬也

昆澤縣

漏江縣

九十里出蠙口

談藁縣

有濮獠

伶丘縣

主獠

華陽國志

卷四

九一中華書局聚

脩雲縣

新定縣

按當作俞元縣續漢書志之俞元注引華陽國志裴山在河
中洲上明此郡本有俞元縣并有脫文也其新定縣自入平

樂郡不當更
列於此矣

平樂郡元帝建興

當作武

元年刺史

當有王
遜二字

割建寧

當有
之字

新定興遷二

縣新立平樂三沮二縣合四縣為一郡後太守建寧董霸叛降李雄

郡縣遂省寧州北屬雄復為郡以朱提李壯為太守

按此下脫
文未詳

朱提郡本犍為南部孝武帝元封二年置屬縣四建武後省為犍為

屬國至建安二十年鄧方為都尉先主因易名太守屬縣五戶八千

去洛五千三百里先有梓潼文齊初為屬國穿龍池溉稻田為民興

利亦為立祠大姓朱魯雷興仇遞高李亦有部由其民好學濱犍為

號多士人為寧州冠冕

朱提縣

郡治

堂螂縣

因山名也出銀鉛白銅雜藥有堂螂附子

南秦縣

自夔道南廣有八亭道通平夷

漢陽縣

有漢水入延江

南昌縣

故都督治有鄧安遠城也

南廣郡蜀延熙中置以蜀郡常竺為太守蜀朝召竺入為侍中巴西

令狐衷代之

建武九年

當有

省

元帝世刺史王遜移朱提

治郡南廣太守李釗數破雄殺賊大將樂初後刺史尹奉却郡還舊

治及雄定寧州復置郡以興古太守朱提李播為太守屬縣四戶千

自夔道至朱提有水步道水道有黑水及羊官水至險難行步道度

三津亦艱阻故行人為語曰猶溪赤木盤蛇七曲盤羊烏橐氣與天

通看都濩訛住柱呼尹康降賈子左儋七里又有牛叩頭馬搏

當有

經注坂其險如此土地無稻田蠶桑多蛇蛭虎狼俗妖巫禁忌多神

祠

南廣縣

郡治

漢武帝太初元年置有鹽官

臨利縣

常遷縣

新興縣

永昌郡古哀牢國哀牢山名也其先有一婦人名曰沙壺

舊校云後漢作沙壺

依哀牢山下居以捕魚自給忽於水中觸有一沈木遂感而有娠度

十月產子男十人後沈木化爲龍出謂沙壺曰若爲我生子今在乎

而九子驚走惟一小子不能去陪龍坐龍就而舐之沙壺與

當作鳥言

語以龍與陪坐因名曰元

當作九下同

隆猶漢言陪坐也沙壺將元隆居

龍山下元龍長大才武後九兄曰元隆能與龍言而黠有智天之貴

也共推以爲王時哀牢山下復有一夫一婦產十女元隆兄弟妻之

由是始有人民皆象之衣後著十尾臂脰刻文元隆死世世相繼分

置小王往往邑居散在溪谷絕域荒外山川阻深生民以來未嘗通

中國也南中昆明祖之故諸葛亮爲其國譜也

孝武時通博南

山度蘭倉水者溪置雋唐不韋二縣徙南越相呂嘉子孫宗族實之
因名不韋以彰其先人惡行人歌之曰漢德廣開不賓渡博南越蘭
津渡蘭倉爲他人渡蘭倉水以取哀牢地哀牢轉衰

武二十三年王扈栗

舊校云後漢作賢栗

遣兵乘單船南攻鹿蓼鹿蓼民弱小

將爲所擒會天大震雷疾風暴雨水爲逆流單船沈沒溺死者數千
人後扈栗復遣六王攻鹿蓼鹿蓼王迎戰大破哀牢軍殺其六王哀
牢人埋六王夜虎掘而食之哀牢人驚怖引去扈栗懼謂耆老曰哀
牢略徼自古以來初不如此今攻鹿蓼輒被天誅中國有受命之王
乎是何天祐之明也漢威甚神卽遣使詣越雋太守願率種人歸義
奉貢世祖納之以爲西部屬國其地東西三千里南北四千六百里
有穿胸當作鼻見後漢書 櫛耳種閩越濮鳩獠其渠帥皆曰王 孝明帝

永平十二年哀牢柳狼遣子奉獻

明帝乃置郡以蜀郡鄭純爲

太守屬縣八戶六萬去洛六千九百里寧州之極西南也有閩濮鳩

獠僂越躒濮身毒之民土地沃腴黃金光珠虎魄翡翠孔雀犀象蠶

桑綿絹采帛文繡又有貊獸食鐵猩猩獸能言其血可以染朱罽有

大竹名濮竹節相去一丈受一斛許有梧當當作撞下同蜀都曰

後漢書木其華柔如絲民績以為布幅廣五尺以還潔白不受汚俗

名曰桐華布以覆亡人然後服之及賣與人有闌干細布蘭干獠言

紵也織成文如綾錦又有罽旄帛疊水精瑠璃軻蟲蚌珠宜五穀出

銅錫太守著名績者自鄭純後有蜀郡張化常員巴部沈稚黎

彪然顯者猶鮮章武初郡無太守值諸郡叛亂功曹呂凱奉郡

丞蜀郡王伉保境六年丞相亮南征高其義表曰不意永昌風

俗當有敦直二字乃爾以凱為雲南太守伉為永昌太守皆封亭侯李恢遷

濮民數千落於雲南建寧界以實二郡凱子祥太康中獻光珠

五百斤還臨本郡遷南夷校尉祥子元康末為永昌太守值南夷作

亂閩濮反乃南移永壽去故郡千里遂與州隔絕呂氏世官領郡於

今三世矣大姓陳趙楊氏

不韋縣 故郡治

比蘇縣

哀牢縣

永壽縣 今郡治

舊唐縣 有周水從徼外來

雍鄉縣

南涪縣 有翡翠孔雀

博南縣 山高四當作西山高二續漢書志注後漢書哀牢傳注引皆不誤十里越之得蘭滄

水有金沙以火當作洗取續漢書志注引不誤融之為黃金有光珠穴出光珠有虎

魄能吸芥又有珊瑚雲南郡蜀建興三年置屬縣七戶萬去洛六千

三百四十三里本雲川地有熊倉山上有神鹿一身兩頭食毒草有

上方下方夷亦出當有華布孔雀常以二月來翔月餘而去土地有

十二中華書局聚

稻田蓄牧但不蠶桑

雲南縣 郡治

葉榆縣 有河州

遂久縣 有繩水也

弄棟縣 有無血水水出連山

靖蛉縣 有鹽官濮水同出按同出當作出馬同三字山有碧鷄金馬光影倏

忽民多見之有山神漢宣帝遣諫議大夫蜀郡王褒祭之欲致鷄馬

褒道病卒故不宣著其縣二別為郡

河陽郡刺史王遜分雲南置屬縣四戶千

河陽縣 郡治 在河中源洲上也按此下脫文未詳

梁水郡刺史王遜分置在興古之盤南當有脫

梁水縣 郡治 有振山出銅

賁古縣 山出銅鉛鐵

西隨縣

興古郡建興三年置屬縣十一當有戶四萬去洛五千八百九十里

多鳩獠濮特有瘴氣自梁水興古西平三郡少穀有桄榔木可

以作麪以牛酥酪食之人民資以為糧欲取其木先當祠祀

宛舊脫此字今補正温縣 郡治 元鼎二年置

律高縣 西有石空當作室山出錫東南有監町山出錫當作銀鉛見漢書地

志

鐔封縣 有温水

句町縣 故句町王國名也其置自濮王姓毋漢時受封迄今

漢興縣

勝休縣 有河水也

都唐舊誤倒今改正縣 故名都舊誤雲今改正夢縣

西平郡刺史王遜時爨量保盤南遜出軍攻討不能克已遜薨後寇

掠州下吏民患之刺史尹奉重募徼外夷刺殺量而誘降李暹盤南平奉以功進安西將軍封前陵伯乃割興古雲南之盤江來如南零

三縣爲郡

按此下脫文未詳

右寧州統郡十四縣六十八

咸熙元年吳交趾郡吏呂興殺太守孫靖內附魏魏拜興安南將軍時南中監軍霍弋表遣建寧爨谷爲交趾太守率牙門將軍建寧董元毛炅孟幹孟通爨熊李松王素等領部曲以討之谷未至興已爲功曹李統所殺

泰始元年谷等徑至郡撫和初附無幾谷卒晉

更用馬忠子融代谷融卒遣犍爲楊穆代之加綏遠將軍又進諸牙

門皆雜號將軍封吳侯

當作侯吳誤倒侯句絕讀吳字下屬

交州刺史劉峻大都督脩

則領軍三攻穆皆爲穆所敗鬱林九真皆附穆穆表遣將軍毛炅董元等攻合浦戰於古城大破吳軍殺峻則穆因表炅爲鬱林太守元爲九真太守元病亡更以益州王素代之數攻交州諸郡泰始七年

春吳王孫皓遣大都督薛珣交州刺史陶璜帥二十萬軍興扶巖惡夷合十萬伐交趾稷遣昺及將軍建寧孟岳等禦之戰于封溪衆寡不敵昺等敗績僅以身還交趾固城自守破敗之後衆才千人并新附可有四千男女萬餘口陶璜圍之杜塞蹊徑救援不至雖班糧約食猶不供繼至秋七月城中食盡病餓死者大半交趾人廣野將軍王約反應陶璜以梯援外吳人遂得入城得稷等皆囚之卽斬稷長史張登將軍孟通及昺并交趾人邵暉等二千餘人受皓詔傳稷秣陵故梛稷及孟幹爨熊李松四人於吳通四遠消息稷至合浦發病歐血死傳首秣陵棄其屍喪於海幹松熊至吳將加斬刑或說皓宥免幹等可以勸邊將皓原之欲徙付臨海郡初稷等私誓不能死節困辱虜手若蒙未死必當思求北歸稷旣路死幹等恐北路轉遠以吳人愛蜀側竹弓弩言能作之皓轉付部爲弓工

九年幹自吳逃返洛陽松熊爲皓所殺初晉武帝以稷爲交州刺史大封半道稷

城陷或傳降故不錄幹至表狀乃追贈交州刺史封松熊後嗣侯焉

古城之戰毛晃手殺脩則則子允隨陶璜璜以晃壯勇欲赦之

而允必欲求殺晃晃亦不屈於璜璜怒乃裸身囚結面縛呵曰晉兵

賊晃亦烈聲呵曰吳狗何等為賊吳人生割其腹允割其肝罵曰虜

腹按三國志注引作晃罵不斷曰尚欲斬汝孫皓汝父何死狗也吳

人斬之武帝聞而矜哀即詔晃子襲爵封諸子三人關內侯九真太

守王素以交趾敗與董元牙門王承等欲還南中為陶璜別將衛濮

所獲功曹李祚見交趾民殘害還遂率吏民保郡為晉祚舅黎晃為

吳將攻伐祚不下數遣人解喻降之祚答曰舅自吳將祚自晉臣惟

力是視矣 邵暉子胤先為父使詣洛拜奉車都尉比還暉敗亡

胤依祚固守求救南中南中遙為之援當有諸姓得世有部曲弋遣

之南征因以功相承也

譏曰南域處邛笮五夷之表不毛閩濮之鄉固九服之外也而能開

土列郡爰建方州踰博南越蘭滄遠撫西垂漢武之迹可謂大業然
要荒之俗不與華同安邊撫遠務在得才故高祖思猛士作歌孝文
想頗牧咨嗟斯靜禦之將信王者所詳擇也馬霍王尹得失之際足
以觀矣交趾雖異州部事連南中故并志焉

華陽國志卷第四

華國國法亦深因

以唐英交協國其陳情事與南中始其

意誠以容與海國之人其言曰彼國無禮於我則我亦無禮於人海國
要亦之必不與華國交焉則其言曰彼國無禮於我則我亦無禮於人海國
其言曰彼國無禮於我則我亦無禮於人海國其言曰彼國無禮於我則我亦無禮於人海國

華陽國志卷第五

公孫述劉二牧志

先王命史立典遠

當作建

則經紀人倫三材炳煥品物章矣然而有志

之士猶敢議論於鄉校之下藹藹之人加之謠誦於林野之中管闚
警言君子有採所以綜核羣善休風惟照也公孫述劉牧二主之廢
興存亡漢書國志固以詳矣統之州部物有條貫必申斯篇者格之
前憲左氏素臣之功王侯之載籍也而八國之語作焉五傳淵邃大
義洋洋聖人之微言也而八覽之書興焉苟在宜稱雖道同世出一
事當作一事出
誤倒一句絕身見遊精博志無嫌其繁矣

漢十二世孝平皇帝帝祚短促國統三絕孝元后兄子安漢公新都
侯魏郡王莽篡盜稱天子改天下郡守爲卒正又改蜀郡爲導江遷
故中散大夫茂陵公孫述字子陽爲導江卒正治臨邛而劉辟起兵
廣漢更始劉聖公在南陽蜀欲應之會宗成垣副王岑等作亂述率

吏民拒禦之所在討破作圍守防遏逸越斬首萬計遂據成都威有
巴漢政治嚴刻民不爲非更始誅王莽都關中爲赤眉賊所敗

建武元年世祖光武皇帝卽位河北述夢人謂己曰公按當作八子

系舊校云後漢作八子系今按此傳寫之譌非有異也十二爲期述以語婦婦曰朝聞道夕

死尙可何況十二乎會夏四月龍出府殿前以爲瑞應述遂稱皇帝

號大成建元龍興以莽尙黃乃服色尙白白以興西方爲金行也以

功曹李雄當作熊見後漢書爲大司徒巴部任滿爲大司空弟恢爲太尉具

置百官造十層赤樓射蘭改益州爲司隸蜀郡爲成都尹時世祖方

平河北而荆邯延牙並歸述盡有益州置鐵錢官廢銅錢百姓貨賣

不行蜀中童謠曰黃牛白腹五銖當復謂莽黃牛述爲白腹五銖漢

錢言漢當復也故主簿李隆舊校云後漢作張隆常少數諫述歸帝稱藩述不

納天水隗囂亦據隴連述蜀土清晏述乃移檄中國稱引圖緯以惑

衆世祖報曰西狩獲麟讖曰乙子卯金卽以未歲授劉氏非西方之

守也光廢昌帝立子公孫卽霍光廢昌邑王立孝宣帝也黃帝姓公孫自以土德君所知也漢家九百二十歲以蒙孫亡受以丞相其名當塗高高豈君身耶吾自繼祖而興不稱受命求漢之斷莫過王莽近張滿作惡兵圍得之歎曰爲天文所誤恐君復誤也又使述舊交馬援喻述述不從 荆邯說述曰昔湯以七十里王天下文王方

百里臣諸侯其次漢祖敗而復征傷瘳復戰故能禽秦亡楚以弱爲強況今地方數千杖戟百萬天下之心未有所歸不東出荆門北陵關隴與之進取則王業不全子孫不久安也述悅之乃出軍荆門陳倉欲震盪秦楚多改易郡縣分封子弟淫恣過度然國富民殷戶百餘萬世祖未遑加兵與述及隗囂書輒署公孫皇帝 七年囂背

漢降述述封爲王厚資給之 十年世祖命大司馬吳漢與大司

徒鄧禹討囂平隴右述聞而惡之城東素有秦時空倉述更名白帝倉使人宣言白帝倉暴出米巨萬公卿以下及國人就視之無米述

曰倉去此數里虛妄如此隗王在數千里外言破壞真不然矣

十一年世祖命征南大將軍岑彭自荆門泝江征述又遣中郎將來歙及述舊交馬援奉詔喻述隆少諫令服從述怒曰自古來有降天子乎尙書解文卿大夫鄭文伯初亦諫述繫之暴室六年二子幽死自是莫有言者

彭破述荆門關及沔關徑至彭亡述使刺客刺殺彭由是改彭亡曰平無言無賊也又使刺客刺殺歙於武都世祖重遣吳漢與劉尙征述又遣臧宮從斜谷道入述使妹壻延牙距宮大司徒謝豐距漢連戰輒北漢到城下軍其江橋及其少城豐在廣都牙引還成都述謂曰事當奈何牙對曰男兒貴死中求生敗中求成無愛財物也述乃大發金帛開門募兵得五千餘人以配牙牙告漢戰因僞遣鼓角麾幟渡市橋漢兵爭觀牙因放奇兵擊漢大破之漢溺水緣馬尾至盜底得出後宮兵已至北門述復城守占書曰虜死城下述以爲漢等是虜乃自出戰述當漢牙當宮大戰牙殺宮兵

數百三合三勝士卒氣驕漢益鼓之自旦至日中飢不得食倦不得息日昃後述兵敗漢騎士高午以戟刺述中頭卽墜馬叩心者數十人都知是述前取其首牙等悵然還城吏民窮急卽夜開門出降漢盡誅公孫氏及牙等諸將帥二十餘人放兵大掠多所殘害是歲十二年也

漢搜求隱逸旌表忠義以述臣常少李隆忠諫發憤病死表更遷葬贈以漢卿官屬蜀郡王皓王嘉廣漢李業刎首死節表其門閭犍爲朱遵絆馬死戰贈以將軍爲之立祠費貽任永君業馮信等閉門素隱公車特徵文齊守義益州封爲列侯董鈞習禮明經貢爲博士程烏李育本有才幹擢而用之於是西土宅心莫不鳧藻

建武十八年刺史郡守撫卹失和蜀郡史歆怨吳漢之殘掠蜀也擁郡自保世祖以天下始平民未忘兵而歆唱之事宜必克復遣漢平蜀多行誅戮世祖誚讓於漢漢深陳謝自是守藩供職自建武至乎中平垂二百載府盈西南之貨朝多華岷之士矣

漢二十二世孝靈皇帝政治衰缺王室多故太常竟陵劉焉字君朗
建議言刺史太守貨賂爲官割剝百姓以致離叛可選清名重臣以
爲牧伯鎮安方夏焉內求州牧以避世難侍中廣漢董扶私於焉曰
京都將亂益州分野有天子氣焉惑之意在益州會刺史河南郗儉
賦斂繁擾流言遠聞而并州殺刺史張壹涼州殺刺史耿鄙焉議得
行漢帝將徵儉加刑以焉爲監軍使尋領益州牧董扶亦求爲蜀西
部都尉太倉令巴郡趙韙去官從焉來西
中平元年涼州黃巾

逆賊馬相趙祗等聚衆緜竹殺縣令李升募疲役之民一二日中得
數千人遣王饒趙播等進攻雒城殺刺史儉并下蜀郡犍爲旬月之
閒破壞二郡相自稱天子衆以萬數又別破巴郡殺太守趙韙部州
從事賈龍素領家兵在犍爲之青衣率吏民攻相破滅之州界清淨
龍乃選吏卒迎焉旣到州移治緜竹撫納離叛務行小惠時南陽
三輔民數萬家避地入蜀焉恣饒之引爲黨與號東州士遣張魯斷

北道枉誅大姓巴郡太守王咸李權等十餘人以立威刑前後左右部司馬擬四軍統兵位皆二千石

漢獻帝初平二年健爲太守

任岐與賈龍惡焉之陰圖異計也舉兵攻焉燒成都邑下焉禦之東州人多爲致力遂克岐龍焉意盛乃造乘輿車服千餘僭擬至尊焉長子範爲左中郎將仲子誕治書御史季子璋奉車都尉皆從獻帝

都當作

在長安惟叔子別部司馬瑁隨焉聞相者相陳留吳懿妹當

大貴爲瑁聘之荊州牧山陽劉表上焉有子夏在西河疑聖人論帝

遣璋曉諭焉焉留璋不遣反

四年征西將軍馬騰自郿與焉範

通謀襲長安治中從事廣漢王商亟諫不從謀泄範誕受誅議郎河南龐羲以通家將範誕諸子入蜀而天火燒焉車乘蕩盡延及民家興平元年焉徙治成都旣痛二子又感祲災疽發背卒州帳下

司馬趙韙治中從事王商等貪璋温仁共表代父京師大亂不能更遣天子除璋監軍使者領益州牧以韙爲征東中郎將率衆征劉表

璋字季玉既襲位懦弱少斷張魯稍驕於漢中巴夷杜濩朴胡袁約等叛詣魯璋怒殺魯母弟遣和德中郎將龐羲討魯不克巴人日叛乃以羲爲巴郡太守屯閬中禦魯羲以宜須兵衛輒召漢昌寶民爲兵或構羲於璋璋與之情好攜隙趙韙數進諫不從亦恚恨也

建安五年趙韙起兵數萬將以攻璋璋逆擊之

明年韙破敗羲

懼遣吏程郁宣旨於郁父漢昌令畿索益寶兵畿曰郡合部曲本不爲亂縱有讒諛要在盡誠遂懷異志非所聞也羲令郁重往畿曰我受牧恩當爲盡節汝自郡吏宜念效力不義之事莫有二意義恨之使人告曰不從太守家將及禍畿曰昔樂羊食子非無父子之恩大義然也今雖羹子畿飲之矣羲乃厚謝於璋璋善畿遷爲江陽太守

十年璋聞曹公將征荊州遣中郎將河內陰溥致敬公表加璋振威將軍兄瑁平寇將軍

十二年璋復遣別駕從事蜀郡張肅送叟兵二百人并雜御物公辟肅爲掾拜廣漢太守

十三年仍

遣肅弟松爲別駕詣公公時已定荊州追劉主不存禮松加表望不足但拜越巽比蘇令松以是怨公會公軍不利兼以疫病而劉主尋取荊州松還疵毀曹公勸璋自絕因說璋曰劉豫州使君之肺腑更可與通時扶風法正字孝直留客在蜀不見禮恨望松亦以身抱利器忖璋不足與有爲常與正竊歎息松舉正可使交好劉主璋從之使正將命正佯爲不得已當有而字行又遣正同郡孟達將兵助劉主守禦前後賂遺無限 十六年璋聞曹公將遣司隸校尉鍾繇伐張

魯有懼心松進曰曹公兵強無敵天下若因張魯之資以向蜀土誰能禦之者乎璋曰吾固憂之而未有計松對曰劉豫州使君之宗室而曹公之深讎也善用兵使之伐魯魯必破破魯則益州強曹公雖來無爲也且州中諸將龐羲李異等皆恃功驕豪欲有外意不得豫州則敵攻其外民叛於內必敗之道也璋然之復遣法正迎劉先當主主簿巴西黃權諫曰左將軍有驍名今請到欲以部曲遇之則不

滿其心欲以賓客待之則一國不容二君客有太山之安則主有累卵之危璋不聽從事廣漢王累倒懸於州門以死諫璋璋壹無所納正旣宣旨陰獻策曰以明將軍之英才乘劉牧之懦弱張松之股肱以響應於內然後資益州之富憑天設之險以此成帝業猶反手也劉主大悅乃留軍師中郎將諸葛亮將軍關羽張飛鎮荊州率萬人泝江西上璋初勅所在供奉入境如歸劉主至巴郡巴郡嚴顏拊心歎曰此所謂獨坐窮山放虎自衛者也劉主由巴水達涪璋往見之松復令正白劉主曰今因此會便可執璋則將軍無用兵之勞坐定一州也軍師中郎將襄陽龐統亦言之劉主曰此大事也初入他國恩信未著不可倉卒歡飲百餘日璋推劉主行大司馬司隸校尉劉主推璋行鎮西大將軍領牧如故益劉主兵使伐張魯又令督白水軍併三萬軍當作人車甲精實而別璋還州劉主次葭萌厚樹恩德以收衆心

十七年曹公征吳吳主孫權呼劉主自救劉主貽璋書

曰孫氏與孤本爲唇齒今樂進在清泥與關羽相拒不往赴救進必大克轉侵州界其憂有甚於魯魯自守之賊不足慮也求益萬兵及資實璋但許四千他物半給張松書與劉主及法正曰今大事垂可立如何釋此去乎松兄廣漢太守肅懼禍及己白璋露松謀璋殺松劉主歎曰君矯殺吾內主乎嫌隙始構璋勅諸關守不內劉主龐統說曰陰選精兵晝夜兼行徑襲成都璋旣不武又無素豫一舉而定此上計也楊懷高沛璋之名將各仗強兵據守關頭數有牋諫璋遣將軍還將軍遣與相聞說當東歸並使速裝二子旣服將軍名又嘉將軍去必乘輕騎來見將軍因此執之進取其兵乃向城都此中計也退還之白帝連引荊州徐還圖之此下計也劉主然其中計卽斬懷等遣將黃忠卓膺魏延等勒兵前行梓潼令南陽王連固城堅守劉主義之不逼攻也進據涪城置酒作樂謂龐統曰今日之會可謂樂矣統對曰伐人之國而以爲歡非仁者也劉主曰武王伐紂前歌

後舞豈非仁也統退出劉主尋請還謂曰向者之談何誰為失統曰君臣俱失 十八年璋遣將劉瓚冷苞張任鄧賢吳懿等拒劉主

於涪皆破敗還保縣竹縣令當衍此二字懿詣軍降拜討逆將軍 初

劉主之南伐也廣漢鄭度說璋曰左將軍縣軍襲我眾不滿萬百姓

未附野穀是資計莫若驅巴西梓潼民內涪川以南其倉廩野穀一

皆燒除高壘深溝靜以待之彼請戰不許久無所資不過百日必禽

矣先主聞而惡之法正曰璋終不能用無所憂也璋果謂羣下曰吾

聞拒敵以安民未聞動民以避敵絀度不用故劉主所至有資進攻

縣竹璋復遣護軍南陽李嚴江夏費觀等督縣竹軍嚴觀率眾降同

拜裨將軍進圍璋子循於雒城 十九年關羽統荊州事諸葛亮

張飛趙雲等沂江降下巴東入巴郡巴郡太守巴西趙筭拒守飛攻

破之獲將軍嚴顏謂曰大軍至何以不降敢逆戰顏對曰卿等無狀

侵奪我州我州但有斷頭將軍無降將軍也飛怒曰牽去斫頭顏正

色曰斫頭便斫何爲怒也飛義之引爲賓客 趙雲自江州分定

江陽犍爲飛攻巴西亮定德陽巴西功曹龔諶迎飛璋帳下司馬蜀

郡張裔距亮敗於柏下裔退還 夏劉主克雒城與飛等合圍成

都而偏將軍扶風馬超率衆自漢中請降劉主遣建寧督李恢迎超

超徑至璋震恐所署蜀郡太守汝南許靖踰城出降璋知不敢誅被

圍數十日城中有精兵三萬穀支二年衆咸欲力戰璋曰父子在州

二十餘年無恩德以加百姓攻戰三年肌膏草野以璋故也何以能

安遂遣張裔奉使詣劉主主許裔禮其君而安其民劉主又遣從事

中郎涿郡簡雍說璋璋素雅敬雍遂與同輿而出降吏民莫不歔歔

涕泣劉主復其所佩振威將軍印綬還其財物遷璋於南郡之公安

吳主孫權之取荊州也以璋爲益州刺史劉主東征璋於吳卒也

譏曰公孫述藉導江之資值王莽之虐民莫援者得跨巴蜀而欺天

罔物自取滅亡者也然妖夢告終期數有極奉身歸順猶可以免而

矜愚遂非何其頑哉劉焉器非英傑圖射僥倖璋才非人雄據土亂世其見奪取陳子以爲非不幸也昔齊侯嗤晉魯之使旋蒙易乘之困魏君賤公叔之侍人亦受割地之辱量才懷遠誠君子之先略也觀劉璋曹公之侮慢法正張松二憾旣徵同怨相濟或家國覆亡或三分天下古人一饋十起輟沐揮洗良有以也

華陽國志卷第五

華陽國志卷第六

劉先生志

先主諱備字玄德涿郡涿縣人漢景帝中山靖王勝後也勝子真元狩六年封涿縣陸城亭侯因家焉祖父雄察孝廉爲東郡范令父弘先主幼孤與母販履織蓆自業舍東南角籬上有桑樹生高五丈餘遙望童童如車蓋人皆異之或謂當出貴人先主少時與宗中諸兒戲於樹下言吾必乘此羽葆蓋車叔父子敬謂曰汝勿妄言滅吾門也年十五母遣行學與宗人劉德然遼西公孫瓚俱事故九江太守同郡盧子幹德然父元起常資給先主與德然等元起妻曰各自一家何能常爾起曰宗中有此兒非常人也而瓚深與先主善瓚年長先主兄事之喜狗馬音樂美衣服長七尺五寸垂臂下膝顧自見耳能下人喜怒不形於色善交結豪俠年少爭附之中山大商張世平蘇雙等見而奇之多與之金先主由是得合徒衆河東關羽雲

長同郡張飛益德並以壯烈爲禦侮先主與二子寢則同牀食則共器恩若弟兄然於稠人廣衆中侍立終日

中平元年從校尉鄒

靖討黃巾賊有功除安喜尉求謁督郵不得乃入縛執之杖二百以綬繫督郵頭頸著馬柳柱委官亡命頃之應大將軍何進募有功除下密丞復爲高唐尉遷爲令瓚爲中郎將表先主爲別部司馬拒冀州牧袁紹數有戰功守平原令進領平原相郡民劉平恥爲之下使客刺之客服其德告之而去北海相魯國孔融爲黃巾賊所圍使太史慈求救於先主先主曰孔文舉聞天下有劉備乎以兵救之廣陵太守下邳陳登元龍太尉球孫也有雋才輕天下士謂功曹陳矯曰閨門雍穆有德有行吾敬陳元方父子冰清玉潔有德有言吾敬華子魚博聞強志奇偉卓犖吾敬孔文舉雄姿傑出有王霸之略吾敬劉玄德名器盡此

徐州牧陶謙表先主爲豫州刺史

徐州

牧陶謙病篤謂別駕東海麋竺曰非劉備不能安此州也謙卒竺率

州迎先主先主未許廣陵太守下邳陳登進曰今漢室陵遲海內傾

覆立功立事在

當有於字見三國志

今日鄆州殷富戶口百萬欲屈使君撫臨

州事先主曰袁公路近在壽春此君四世五公海內所歸可以州與之登曰公路驕豪非治亂之主今欲爲使君合步騎十萬上可以匡濟生民成五霸之業下可以割地守境書功於竹帛若使君不見聽許登亦未敢聽使君也北海相孔融謂先主曰袁術豈憂國忘家者耶冢中枯骨何足介意今日之事百姓與能天與不取悔不可追先主遂領徐州牧

建安元年曹公表爲鎮東將軍封宣城亭侯先

主與袁術相拒而下邳守將曹豹叛爲呂布所敗先主失妻子轉軍

海西麋竺進妹爲夫人及客奴二千金銀寶貨資之先主因而獲振

連合於布布還其妻子先主衆萬餘移軍小沛布惡之自攻先主先

主歸曹公公以爲豫州牧益其軍使伐布失利布將高順復虜先主

妻子送布公使夏侯惇助先主不能克

三年公自征布生禽之

布曰使布為明公將騎天下不足定也公有疑色先主曰公待布能如丁建陽董太師乎公頷之布曰先主曰大耳兒最叵信者也遂殺布

先主還得妻子從公還許為左將軍公禮之甚重出則同輿坐則同席又拜關羽張飛皆中郎將公謀臣程昱郭嘉勸公殺先主

公慮失英豪望不許 袁術自淮南欲經徐州北就袁紹按此下當脫公

遣先主主要擊術云云獻帝舅車騎將軍董承受帝衣帶中密詔當殺公承先與

先主及長水校尉种輯將軍吳子蘭王子服等同謀以將行未發公

從容謂先主曰天下英雄惟使君與操本初之徒不足數也先主方

食失匕箸會天震雷先主曰聖人言迅雷風烈必變良有以也一震

之威乃至於此也公亦悔失言先主還沛解按沛字不當有解即今之解字也公使

覘之見其方披葱使廝人為之不端正舉杖擊之公曰大耳翁未之

覺也其夜先主急東行昱嘉復言之公馳使追之不及先主遂殺徐

州刺史車胄以叛留關羽行下邳太守事身還小沛而承等謀洩受

誅 先主衆數萬遣從事北海孫乾自結於袁紹公遣將軍劉岱

王忠擊之不克 五年公東征先主先主敗績妻子及關羽見獲

先主奔青州刺史袁譚奉迎道路馳以白父紹紹身出鄴二百里與

先主相見公壯羽勇銳拜偏將軍初羽隨先主從公圍呂布於濮陽

時秦宜祿爲布求救於張楊羽啓公妻無子下城乞納宜祿妻公許

之及至城門復白公疑其有色自納之後先主與公獵羽欲於獵中

殺公先主爲天下惜不聽故羽常懷懼公察其神不安使將軍張遼

以情問之羽歎曰吾極知曹公待我厚然吾受劉將軍恩誓以共死

不可背之當有要當二字立効以報曹公公聞而義之 是歲紹征官渡

遣梟將顏良攻東郡太守劉延於白馬公使遼羽爲先鋒羽望見良

麾蓋策馬刺良於萬衆中斬其首還紹將莫敵遂解延圍公卽表封

羽漢壽亭侯重加賞賜當有羽字盡封其物拜書告辭而歸先主左右欲

追之公曰彼各有主 先主說紹南連荊州牧劉表紹遣將其本

兵至汝南公使將蔡楊擊之先主謂曰吾勢雖不便汝等百萬來未
如吾何曹孟德單車來吾自去楊等必戰爲先主所殺 公旣破

紹自南征汝南先主遣麋竺孫乾詣劉表表郊迎之待以上賓使屯
新野潁川徐元直致瑯琊諸葛亮曰孔明臥龍也將軍願見之乎先
主曰君與俱來庶曰此人可就見不可屈致也先主遂造亮凡三因
屏人曰漢室傾頹奸臣竊命主上蒙塵孤不度德量力欲信大義於
天下而智術淺短遂用猖蹶至於今日志猶未已君謂計將安出亮
對曰自董卓以來豪傑並起跨州連郡不可勝數曹操比於袁紹則
名微而衆寡然遂能克紹以弱爲強雖云天時抑人謀也今操已擁
百萬之衆挾天子而令諸侯此誠不可與爭也孫權據有江東已歷
三世國險而民附賢能爲之用此可以爲援而不可圖也荊州北據
漢沔利盡南海東連吳會西通巴蜀此用武之國而其主不能殆天
所以資將軍也益州險塞沃野當有千里一
字見三國志天府之士高祖因之以

成帝業劉璋闇弱張魯在北國富民殷而不知卹賢能之士思得明君將軍旣帝室之胄信義著於四海總攬英雄思賢如渴若跨有荆益保其險阻西和諸戎南撫夷越結好孫權內修政理天下有變命一上將將荊州之軍以向宛洛將軍身率益州之衆出於秦川天下孰不簞食壺漿以迎將軍者乎如此則霸業可成漢室可興矣先主曰善與亮情好日密自以爲猶魚得水也

十三年表卒少子琮襲位曹公南征琮遣使請降先主屯樊不知曹公卒至至宛先主乃知遂將其衆去比到當陽衆十餘萬人車數千兩日行十餘里別遣關羽乘船會江陵或謂先主曰宜速行雖擁大衆被甲者少曹公軍至何以禦之先主曰夫濟大事以人爲本今人歸吾何忍棄之

公以江陵有軍實恐先主據之乃釋輜重以輕騎五千追先主一日一夜行二百里及於當陽之長坂先主棄妻子與諸葛亮張飛等數十騎走公盡獲其民衆急追先主張飛據水斷橋橫馬按矛曰我張

益德也可來決死公徒乃止

先主斜趣漢津適與羽船會而趙

雲身抱先主弱子後主及擁先主甘夫人相及濟江亮曰事急矣請奉命求救於孫將軍時權軍柴桑既服先主大名又悅亮奇雅卽遣周瑜程普水軍三萬助先主拒曹公大破公軍於赤壁焚其舫舟公引軍北歸先主以劉表長子江夏太守琦爲荊州刺史先主南平四郡武陵太守金旋長沙太守韓玄桂陽太守趙範零陵太守劉度皆降廬江雷緒率部曲數萬口稽顙琦病死先主領荊州牧治公安孫權進妹恩好綢繆以亮爲軍師中郎將督南三郡事以關羽爲盪寇將軍領襄陽太守住江北張飛爲征虜將軍宜都太守

初先主之敗東走也徑往鄂無土地關羽責之曰早從獵中言無今日先主曰安知此不爲福也及得荊州復有人衆孫權遣使

求共伐蜀又曰雅願以隆成爲一家諸葛孔明母兄在吳可令相并主簿殷觀曰若爲吳先驅大事去矣今但可贊之言新據諸郡未可

以動彼必不越我而有蜀也先主乃報曰益州不明得罪左右庶幾將軍高義上匡漢朝下輔宗室若必尋干戈備將放髮於山林未敢聞命權果輟計遷觀別駕

十六年益州牧劉璋遣法正迎遂西

入益州

建安十九年先主克蜀蜀中豐富盛樂置酒大會饗食

三軍取蜀城中民金銀頒賜將士還其穀帛賜諸葛亮法正關羽張飛金五百斤銀千斤錢五千萬錦段萬匹其餘各有差以亮爲軍師將軍署左將軍府事正揚武將軍蜀郡太守關羽督荊州事張飛爲巴西太守馬超平西將軍不用許靖法正說曰有獲虛譽而無實者靖也然其浮名稱播海內人將謂公輕士乃以爲長史龐羲爲司馬

李嚴爲犍爲太守費觀爲巴郡太守徵益州太守南郡董和

當有爲字掌

軍中郎

當有將巴郡三字將句絕見三國志王謀在劉璋時爲巴郡太守見陳壽季漢輔臣讚注

太守漢嘉王謀

爲別駕廣漢彭蒙爲治中辟零陵劉巴爲西曹掾廣漢長黃權爲偏將軍於是亮爲股肱正爲謀主羽飛超爲爪牙靖羲及麋竺簡雍孫

乾山陽伊籍爲賓友和嚴權本劉璋所授用也吳懿費觀璋之婚親也彭秉璋所排擯也劉巴所宿恨也皆處之顯位盡其器能有志之士無不競勸

羣下勸先主納劉瑁妻先主嫌其同族法正曰論其親疎何與晉文之於子圉乎從之正既臨郡睚眦之怨一澆之惠

無不報復或謂諸葛亮曰法正蜀郡太縱橫將軍宜啓主公亮曰有當

注公之在公安也北畏曹操之強東憚孫權之逼內慮孫夫人興變

於肘腋之下孝直爲輔翼遂翻飛翺翔不可復制如何禁法使不得

行其志也孫夫人才捷剛猛有諸兄風侍婢百人皆仗劍侍立先主

每下車心常凜凜正勸先主還之二十年孫權使報先主欲得

荊州先主報曰吾方圖涼州涼州定以荊州相與孫權怒遣呂蒙襲

奪長沙零陵桂陽三郡先主下公安令關羽下益陽會曹公入漢中

張魯走巴西黃權進曰若失漢中則三巴不振此割蜀人股臂也於

是先主與吳連和分荊州江夏長沙桂陽東屬南郡零陵武陵西屬

引軍還江夏以權爲護軍迎魯魯已北降曹公權破公所署三巴太守杜濩朴胡袁約等公留征西將軍夏侯淵益州刺史趙顥及張郃守漢中公東還郃數犯掠巴界先主率張飛等進軍宕渠之蒙頭拒郃相持五十餘日飛從他道邀郃戰於陽石遂大破郃軍郃失馬緣山獨與麾下十餘人從閒道還南也 二十一年先主還成都

二十二年蜀郡太守法正進曰曹操一舉降張魯定漢中不因此勢以圖巴蜀而留淵郃身遽北還非智不逮力不足將內有憂逼耳今算淵郃才略不勝吾將率舉衆往討則必可擒天以與我時不可失也先主從之以問儒林校尉巴西周羣羣對曰當得其地不得其民若出偏軍必不利先主遂行諸葛亮居守足食足兵也 二十

三年先主急書發兵軍師亮以問從事犍爲楊洪洪對曰漢中蜀之咽喉存亡之機若無漢中則無蜀矣此家門之禍男子當戰女子當運發兵何疑亮以法正從行白先主以洪領蜀郡太守後遂卽真初

珍傲宋版
洪爲犍爲太守李嚴功曹去郡數年已爲蜀郡嚴故在職而蜀郡何
祇爲洪門下書佐去郡數年已爲廣漢太守洪故在官是以西土咸
服亮之能攬拔英秀也後洪祇俱會亮門下洪謂祇曰君馬何駛祇
對曰故吏馬不爲駛明府馬不進耳 二十四年先主定漢中斬

夏侯淵張郃率吏民內徙先主遣將吳蘭雷同入武都皆沒乃舉羣
茂才時州後部司馬張裕亦知占術坐漏言言先主得蜀寅卯之間
當失漢凶年在庚子誅 曹公爲魏王王西征聞法正策曰固知

玄德不辨此又曰吾收奸雄略盡獨不得正邪 羣下上先主爲

漢中王大司馬以許靖爲太傅法正爲尙書令零陵賴恭爲太常南
陽黃權爲光祿勳王謀爲少府武陵廖立爲侍中關羽爲前將軍張
飛爲右將軍馬超爲左將軍皆假節鉞又以黃忠爲後將軍趙雲翊
軍將軍其餘各進官號軍師諸葛亮曰黃忠名望本非關張馬超之
倫也今張馬在近親見其功猶可喻指關遙聞之恐必不悅先主曰

吾自解之 時關羽自江陵圍曹仁於樊城遣前部司馬健爲費

詩拜假節羽怒曰大丈夫終不與老兵同列不肯受拜詩謂曰昔蕭

曹與高祖幼舊陳韓亡命後至論其班爵韓最居上未聞蕭曹以此

爲怨今王以一時之功隆崇於漢升舊校云黃忠字也意之輕重寧當與君

侯齊乎王與君侯譬猶一體禍福同之愚謂君侯不宜計官號之高

下爵位之多少也羽卽受拜初羽聞馬超來降素非知故書與諸葛

亮問其人材亮知羽忌前答曰孟起黔彭之徒一世之桀當與益德

並驅爭先猶不如髯之絕倫也羽省書忻悅以示賓客羽美鬢髭故

亮稱云髯也羽臂嘗中流矢每天陰疼痛醫言矢鋒有毒須破臂刮

毒患乃可除羽卽伸臂使治時適會客臂血流離盈於盤器而羽引

酒割炙言笑自若 魏王遣左將軍于禁督七軍三萬人救樊漢

水暴長皆爲羽所獲又殺魏將龐德威震華夏魏王議徙許都以避

其銳而孫權襲江陵將軍傅士仁南郡太守麋芳降吳羽久不拔城

魏右將軍徐晃救樊羽退還遂為孫權所殺吳盡取荊州以劉璋為益州牧住姊歸 是歲尚書令法正卒諡曰翼侯以尚書劉巴為

尚書令 二十五年春正月魏武王薨嗣王丕即位改元延康蜀

傳聞漢帝見害先主乃發喪制服追諡曰孝愍皇帝所在並言眾瑞

故議郎陽泉亭侯劉豹青衣侯向舉偏將軍張裔黃權當有大字司見三國志

馬屬陰純別駕趙祚治中楊洪從事祭酒何宗議曹從事杜瓊勸學

從事張爽尹默譙周等上河洛符驗孔子所甄赤三日德昌九世會

備合為帝際洛書寶號命曰天度帝道備稱皇又言周羣父未亡時

數言西南有黃氣立數十丈而景雲祥風從璇璣下來應之如圖書

必有天子出方今大王應際而生與神合契願速即洪業以寧海內

先主未許冬魏王丕即皇帝位改元黃初漢獻帝遜位為山陽公

章武元年魏黃初二年也春太傅許靖安漢將軍麋竺軍師將軍

諸葛亮太常賴恭光祿勳黃權少府王謀等乃勸先主紹漢絕統即

帝號先主不許亮進曰昔吳漢耿弇等勸世祖世祖辭讓耿純進曰天下英雄喁喁冀有所望若不從議者士大夫各歸其主無從公也世祖感之今曹氏篡漢天下無主大王紹世而起乃其宜也士大夫隨大王久勤苦者亦欲望尺寸之功如純言耳先主乃從之亮與博士許慈議郎孟光建立禮儀擇令辰費詩上疏曰殿下以曹操父子逼主篡位故乃羈旅萬里糾合士衆將以討賊今大敵未克而先自立恐人疑惑昔高祖與楚約先破秦者王及屠咸陽獲子嬰猶推讓況今殿下未出門便欲自立愚臣誠不爲殿下取也朝廷左遷詩部永昌從事

夏四月丙午先主卽帝位大赦改元章武以諸葛亮

爲丞相假節錄尚書許靖爲右司徒張飛車騎將軍領司隸校尉進

封西鄉侯馬超驃騎將軍領涼州刺史封糜鄉侯北督臨沮偏將軍

吳懿爲關中都督進魏延鎮北將軍李嚴輔漢將軍襄陽馬良爲侍

中楊儀爲尚書蜀郡何宗爲鴻臚立宗廟祫祭高皇帝世祖光武皇

帝 五月辛巳立皇后吳氏吳懿妹劉璋兄瑁妻也子禪為皇太

子 六月立子永為魯王理為梁王 先主將東征以復關羽

之恥命張飛率巴西萬兵將會江州飛帳下將張達范疆殺飛持其

首奔吳初飛勇冠三軍當有脫俱稱萬人之敵羽善待小人而驕士大

夫飛愛敬君子而不卹小人是以致敗先主常戒之曰卿刑殺過差

鞭撻健兒令在左右此取禍之道飛不悟故敗先主聞飛營軍都督

之有表也曰噫飛死矣命丞相亮領司隸校尉 秋七月先主東

伐羣臣多諫不納廣漢秦宓上陳天時必無其利先主怒繫之於理

孫權送書請和先主不聽吳將陸議李異劉阿等軍至姊歸左

右領軍南郡馮習陳留吳班自建平攻破異等軍次姊歸武陵五溪

蠻夷遣使請兵 二年春正月先主軍姊歸吳班陳戒等水軍屯

夷陵夾江東西岸 二月將進黃權諫曰吳人悍戰而水軍泝流

進易退難臣請為先驅以嘗寇陛下宜為後鎮先主不從以權為鎮

北將軍督江北軍先主連營稍前軍於夷道猊亭遣侍中馬良經佷山安慰五溪蠻夷

夏六月黃氣見自姊歸十餘里中廣十餘丈

後十數日與吳人戰先主敗績馮習及將張南皆死先主歎曰吾之敗天也委舟舫由步道還魚復將軍義陽傅彤爲後殿兵衆死盡彤氣益烈吳將喻令降彤罵曰吳狗何有漢將軍降者遂戰死從事祭酒程畿獨泝江退衆曰後追以至宜解舫輕行畿曰吾在軍未習爲敵之走況從天子乎亦見殺

黃權偏軍孤絕遂北降魏李異劉

阿等踵躡先主屯南山

先主改魚復曰永安丞相亮聞而歎曰

法孝直若在則能制主上使不東行既復東行必不顛危矣

八

月司徒靖卒

是歲驃騎將軍馬超亦卒臨沒上疏曰臣宗門二

百餘口爲孟德所誅略盡唯從弟岱當爲微宗血食之係深託陛下

岱官至平北將軍拜彤子僉左右

當作中郎將

冬十月詔丞相亮

營南北郊於成都孫權聞先主在白帝甚懼遣使請和先主使太中

大夫南陽宗璋報命

十有一月先主寢疾十有二月漢嘉太守

黃元素亮所不善聞先主疾病慮有後患舉郡拒守

三年春正

月召丞相亮於成都詔亮省疾於永安元燒臨邛城治中從事楊洪

啓太子遣將軍陳賀鄭綽由青衣水伐元滅之

二月亮至永安

先主謂曰君才十倍曹丕必能安國終定大事若嗣子可輔輔之如其不才君可自取亮涕泣對曰臣敢竭股肱之力効忠貞之節繼之以死先主又爲詔勅太子曰汝與丞相從事事之如父亮與尙書令李巖並受寄託

夏四月先主殂於永安宮時年六十二亮表後

主曰大行皇帝邁仁樹德覆育無疆昊天不弔今月二十四日奄忽升遐臣妾號咷如喪考妣乃顧遺詔事惟太宗百寮發哀三日除服到葬復服其郡國守相令長丞尉三日除服五月梓宮至成都謚曰昭烈皇帝秋八月葬惠陵

譏曰漢末大亂雄桀並起若董卓呂布二袁韓馬張楊劉表之徒兼

州連郡衆踰萬計叱咤之間皆自謂漢祖可踵桓文易邁而魏武神武幹略戡屠盪盡於時先主名微人鮮而能龍興鳳舉伯豫君徐假翼荆楚翻飛梁益之地克胤漢祚而吳魏與之鼎峙非英才命世孰克如之然必以曹氏替漢宜扶信順以明至公還乎名號爲義士所非及其寄死託孤於諸葛亮而心神無貳陳子以爲君臣之至公古今之盛軌也

華陽國志卷第六

華陽國志卷第七

劉後主志

後主諱禪字公嗣先主太子甘夫人所生也襲位時年十七

建

興元年夏五月後主卽位尊皇后吳氏曰皇太后大赦改元於魏黃初四年吳黃武二年也

立皇后張氏車騎將軍飛女也封丞相

亮武鄉侯中護軍李嚴假節加光祿勳封都鄉侯督永安事中軍師衛尉魯國劉琰亦都鄉侯中護軍趙雲江州都督費觀屯騎校尉丞相長史王連中部督襄陽向寵及魏延吳懿皆封都亭侯楊洪王謀等關內侯

南中諸郡並叛亂亮以新遭大喪未便加兵遣尙書

南陽鄧芝固好於吳吳主孫權曰吾誠願與蜀和親但主幼國小慮不自存芝對曰吳蜀二國之地吳有三江之阻蜀有重險之固大王命世之英諸葛一時之桀合此二長共爲唇齒進可兼并天下退可鼎足而峙大王如臣服於魏魏則上望大王入朝其次求太子入侍

若其不從則奉辭伐叛蜀必順流見可而進如此江南之地非復大王之有也吳主大悅與蜀和報使聘歲通芝後累往權曰若滅魏之後二主分治不亦樂乎芝對曰滅魏之後大王未深識天命者戰爭方始耳權曰君之誠懇乃至於此書與亮曰丁宏挾張陰化不實和合二國惟有鄧芝

二年丞相亮開府領益州牧事無巨細咸決於亮亮乃撫百姓示儀軌約官職從權制盡忠益時者雖仇必賞犯法怠慢者雖親必罰服罪輸情者雖重必釋遊辭巧飾者雖輕必戮善無微而不賞惡無纖而不貶庶事精練物究其本循名責實虛僞不齒終乎封域之內畏而愛之刑政雖峻而無怨者以其用心平勸戒明也

辟尙書郎蔣琬及廣漢李邵巴西馬勳爲掾南陽宗預爲主簿皆德舉也秦宓爲別駕犍爲五梁爲功曹梓潼杜微爲主簿皆州俊彥也而江夏費禕南郡董允郭攸之始爲侍郎贊揚日月

吳遣中郎將張溫來聘報鄧芝也將返命百官餞焉惟秦宓未往

亮累催之温問曰彼何人也亮曰益州學士也及至温問宓曰君學乎答曰五尺童子皆學何況小人温曰天有頭乎在何方也宓曰詩云乃眷西顧知其在西又曰天有耳乎宓曰詩不云乎鶴鳴九臯聲聞于天若無其耳何以聽之又曰天有足乎曰詩不云乎天步艱難之子不猶若其無足何以步之又曰天有姓乎曰姓劉何以知之曰其子姓劉又曰日生於東乎曰雖生於東終沒於西答問如響之應聲温大敬服宓亦尋遷右中郎將長水校尉大司農 三年春長

水校尉廖立坐謗訕朝廷改徙汶山立自荊州與龐統並見知而性傲侮後更冗散怨望故致黜廢 三月亮南征四郡以弘農太守

楊儀爲參軍從行步兵校尉襄陽向朗爲長史統留府事 秋南

中平軍資所出國以富饒 冬亮還至漢陽與魏降人李鴻相見

說新城太守孟達委仰於亮無已亮方北圖欲招達爲外援謂參軍蔣琬從事費詩曰歸當有書與子度相聞對曰孟達小子昔事振威

不忠後奉先帝背叛反覆之人何足與書亮不答詩數率意而言故
凌遲於世 十有二月亮至羣官皆道迎而亮命侍郎費禕參乘

禕官小年幼衆士於是莫不易觀 四年永安都護李嚴還督江

州城巴部大城以征西將軍汝南陳到督永安封亭侯 是歲魏

文帝崩明帝立 五年魏太和元年也春丞相亮將北伐上疏曰

今天下三分益州疲弊此誠危急存亡之秋也然侍衛之臣不懈於

內忠志之士忘身於外者咸追先帝之遇欲報之陛下也先帝以臣

謹慎故臨崩寄臣以大事受命以來夙夜憂歎故五月渡瀘深入不

毛今南方已定兵甲已足當帥獎三軍北平中原庶竭駑鈍攘除姦

凶克復漢室還於舊都此臣所以報先帝而忠於陛下願陛下託臣

以討賊興復不効則治臣之罪以告先帝之靈陛下亦宜自謀諮諏

善道察納雅言不宜引喻失誼以塞忠諫之路也又曰親賢臣遠小

人先漢所以興隆昵小人疎君子後漢所以傾覆侍中郭攸之費禕

侍郎董允先帝簡拔以遺陛下斟酌規益進盡忠言則其任也宮省之事悉以諮之必能裨補闕漏有所廣益也

以尚書南陽陳震

爲中書令治中張裔爲留府長史與參軍蔣

當有琬字

公琰知居府事

二月亮出屯漢中營沔北陽平石馬以鎮北將軍魏延爲司馬

六年春丞相亮揚聲由斜谷道取郿使鎮東將軍趙雲中監軍鄧

芝據箕谷爲疑軍魏大將軍曹真舉衆當之亮身率大衆攻祁山賞

罰肅而號令明天水南安安定三郡叛魏應亮關中響震魏明帝西

鎮長安命張郃拒亮亮使參軍襄陽馬謖裨將軍巴西王平及張休

李盛黃襲等在前違亮節度爲郃所破平獨斂衆爲殿而雲芝亦不

利亮拔將西縣千餘家還漢中戮謖及休盛以謝衆奪襲兵貶雲秩

長史向朗以不時臧否免罷超遷平參軍進位討寇將軍封亭侯統

軍五年

按當衍軍字年當作部三國志平傳云加拜參軍統五部兼當營事進位討寇將軍封亭侯可證也五部裴松之無注據

南中志言移南中勁卒青羌萬餘家於蜀爲五部然則平所統者卽此五部矣亮上疏曰臣以弱才叨竊非

據親秉旄鉞以厲三軍不能訓章明法臨事而懼至有街亭違令之
闕箕谷不戒之失咎皆在臣臣授任無方春秋責帥職臣是當請自
貶三等以督厥咎於是亮爲右將軍行丞相事辟天水姜維爲倉
曹掾加奉義將軍封當陽亭侯亮書與長史張裔參軍蔣琬稱維曰
姜伯約西州上士馬季常李永南不如也 冬亮復出散關圍陳

倉糧盡還魏將王雙追亮亮合戰斬雙 七年春丞相亮遣護軍

陳式攻武都陰平魏雍州刺史郭淮出將擊式亮自至建威淮退遂
平二郡 後主詔策亮曰街亭之敗咎由馬謖而君引愆深自抑

損重違君意聽順所守前年耀師馘斬王雙今歲爰征郭淮遜走降
集氏羌興復二郡威震凶暴功勳赫然復君丞相君其無辭 夏

四月吳主孫權稱尊遣衛尉陳震慶問吳與蜀約分天下 冬城

漢樂 八年春丞相亮以參軍楊儀爲長史加綏遠將軍遷姜維

護軍征西將軍 秋魏大將軍司馬宣王由西城征西車騎將軍

張郃由子午大司馬曹真由斜谷三道將攻漢中丞相亮軍成固表
進江州都護李嚴驃騎將軍將二萬人赴漢中嚴初求以五郡爲巴
州書告亮言魏大臣陳羣司馬懿並開府亮乃加嚴中都護以嚴子
豐爲江州都督大雨道絕真等還丞相亮以當西當作北征因留嚴
漢中署留府事嚴改名平 丞相司馬魏延將軍吳懿西入羌中

大破魏後將軍費曜雍州刺史郭淮於陽溪延遷前軍師鎮西將軍
封南鄭侯懿左將軍高陽鄉侯徙魯王永爲甘陵王梁王理爲安平
王皆以魯梁在吳分故也 九年春丞相亮復出圍祁山始以木

牛運參軍王平守南圍司馬宣王拒亮張郃拒平亮慮糧運不繼設
三策告都護李平曰上計斷其後道中計與之持久下計還住黃土
時宣王等糧亦盡盛夏雨水平恐漕運不給書白亮宜振旅 夏

六月亮承平指引退張郃至青封交戰爲亮所殺 秋八月亮還

漢中平懼亮以運不辨見責欲殺督運領岑述驚問亮何故來還又

表後主言亮爲退亮怒表廢平爲民徙梓潼奪平子豐兵以爲從事
中郎與長史蔣琬共知居府事時費禕爲司馬也 十年春丞相

亮休士勸農車騎將軍劉琰與軍師魏延不和還成都秋旱亮練兵
講武 十一年魏青龍元年也丞相亮治斜谷閣運糧谷口

十二年春丞相亮以流馬運從斜谷道出武功據五丈原與司馬宣
王對於渭南亮每患糧不繼使志不伸乃分兵屯田爲久住之基耕
者雜於渭濱居民之間百姓安堵軍無私焉 秋八月亮疾病卒

於軍時年五十四還葬漢中定軍山塚足容棺斂以時服諡曰忠武
侯鎮西大將軍魏延與長史楊儀素不和亮旣恃延勇猛又惜儀籌
畫不能偏有所廢常恨恨之爲作甘戚論二子不感延常舉刃擬儀
儀涕淚交流惟護軍費禕和解中間終亮之世盡其器用儀欲案亮
成規將喪引退使延斷後姜維次之延怒舉軍先歸南鄭各相表反
留府長史蔣琬侍中董允保儀疑延延逆欲擊儀儀遣平北將軍馬

岱討滅延延自以武幹常求將數萬別行依韓信故事亮不許以亮
爲怯及儀將退使費禕造延延曰公雖亡吾見在當率衆擊賊豈可
以一人亡廢國家大事乎使禕報儀不可故欲討儀儀帥諸軍還成
都大赦以吳懿爲車騎將軍假節督漢中事初亮密表後主以儀性
狷狹若臣不幸可以蔣琬代臣於是以琬爲尙書令總統國事以儀
爲中軍師司馬費禕爲後軍師征西姜維爲右監軍輔漢將軍鄧芝
前軍師領兗州刺史張翼前領軍並典軍政 廖立在汶山聞亮
卒垂泣曰吾終爲左袵矣李平亦發病死初立平爲亮所廢安奄沒
齒常冀亮當自補復策後人不能故感憤焉 十三年拜尙書令

蔣琬爲大將軍領益州刺史以費禕爲尙書令時新喪元帥遠近危
悚琬超登大位旣無戚容又無喜色衆望漸服侍郎董允兼虎賁中
郎將統宿衛兵軍師楊儀自以年宦在琬前雖同爲參軍長史已常
征伐勤苦更處琬下書當衍怨望謂費禕曰公亡際吾當舉衆降魏處

世寧當落度如此耶禕表其言廢徙漢嘉儀又上書激切遂行儀重辟

吳以亮之卒也增巴丘守萬人蜀亦益白帝軍右中郎宗預使吳吳主曰東之與西共為一家何以益白帝守預對曰東增巴丘之戍蜀益白帝之兵俱事勢宜然不足以相問也

十四年夏四月後主西巡至湔山當當有坂觀汶川之流武都氏王符健

請降將軍張尉迎之過期不至大將軍琬憂之牙門將巴西張嶷曰

健求附款至必無返滯聞健弟狡不能同功各將乖離是以稽耳健

弟果叛就魏健率四百家隨尉居廣都縣十五年魏景初元年

也夏六月皇后張氏薨諡曰敬哀是歲車騎將軍吳懿卒

以後典軍安漢將軍王平領漢中太守代懿督漢中事懿從弟

班漢大將軍何進官屬吳匡之子也名常亞懿官至驃騎將軍持節

鄉侯按當作假節縣竹侯見時南郡輔匡當作元弼零陵劉邕南和

官亦至鎮南將軍潁川袁綝南郡高翔至大將軍綝征西將軍

延熙元年春正月立皇后張氏敬哀皇后妹也大赦改元立子璿爲太子瑤爲安定王以典學從事巴西譙周爲太子家令梓潼李譔爲僕射皆名儒也 冬十二月大將軍琬出屯漢中更拜王平以前

護軍署大將軍府事尙書僕射李福爲前監軍領大將軍司馬

延熙

當衍此二字

二年春二月進大將軍琬大司馬開府辟治中從事犍

爲楊義

當作義下同

爲東曹掾義性簡琬與言時不應答羣吏以爲慢琬

曰夫人心不同各如其面面從後言古人所戒義欲贊吾是耶則非本心欲反吾言也則顯吾之非是以嘿然此義之快也督農楊敏常毀琬作事憤憤誠非前人也或以白琬琬曰吾信不如前人主者白乞問憤憤狀琬曰苟其不如則憤憤矣復何問也後敏坐事下獄人以爲必死琬心無適莫是以上下輯睦歸仰於琬蜀猶稱治 輔

漢將軍姜維領大司馬

按此下當重有司馬二字三國志後主傳云延熙二年春三月進蔣琬位爲大司馬姜維

傳云琬既遷大司馬以維爲司馬然則維所領者蔣是歲按此二字琬大司馬之司馬也傳寫者誤認爲複文而刪之耳

當在下文

魏明帝崩之上西征入羌中

魏明帝崩齊王卽位

延熙當衍此三字

年魏正始元年也安南將軍馬忠率越巂太守張疑平越巂郡

四年冬十月尙書令費禕至漢中與大司馬琬諮論事計歲盡還

五年春正月姜維還屯涪縣大司馬琬以丞相亮數入秦川不克

欲順沔東下征三郡朝臣咸以爲不可安南將軍馬忠自建寧還朝

因至漢中宣詔旨於琬琬亦連疾動輟計遷忠鎮南大將軍封彭鄉

侯六年大司馬琬上疏曰臣旣闇弱加嬰疾疹奉辭六年規方

無成夙夜憂慘今魏跨帶九州除之未易如東西犄角但當蠶食然

吳期二三連不克果輒與費禕馬忠議以爲涼州胡塞之要宜以姜

維爲涼州刺史銜持河右今涪水陸四通惟急是赴東北之便應之

不難冬十月琬還鎮涪以王平爲鎮北大將軍督漢中事姜維

鎮西大將軍涼州刺史十有一月大赦遷尙書令費禕大將軍

錄尙書事就遷江州都督鄧芝車騎將軍七年閏月魏大將軍

曹爽征西將軍夏侯玄征蜀王平白與護軍零陵劉敏距興勢圍以大司馬琬疾病假大將軍禕節率軍自成都赴漢中旌旗啓路馬人擐甲羽檄交馳嚴鼓將發光祿大夫義陽來敏求共圍棋禕留意博弈色守自若敏曰聊試君耳君信可人必能辨賊者也比至爽等退命鎮南將軍馬忠平尙書事

夏四月安平王卒子胤嗣

秋

九月禕還大司馬琬以病故讓州職於費禕董允於是禕加大將軍領益州刺史允加輔國將軍守尙書令允立朝正色處中上則匡主下帥羣司於時蜀人以諸葛亮蔣費及允爲四相一號四英宦人黃皓便僻佞慧畏允不敢爲非後主欲採擇允曰妃后之數不可過十二允嘗與軍典義陽胡濟大將軍禕共期遊宴命駕將出郎中襄陽董恢造允脩敬自以官卑少行求索去允曰本所以出者欲同與好遊談耳君以自屈方展闊積舍此就彼非所謂也命解驂止駕允之下士接物皆此類也君子以爲有周公之德

八年秋皇太后吳

氏薨諡曰穆

冬十有一月大將軍禕行軍漢中

九年夏六

月禕還成都

秋大赦司農孟光衆責禕曰夫赦者偏枯之物非

明世之所宜有也今主上賢仁百寮稱職有何旦夕之急數施非常之恩以惠奸軌之惡上犯天時下違人理豈具瞻之高美所望於明德哉禕但顧謝焉初丞相亮時有言公惜赦者亮答曰治世以大德不以小惠故匡衡吳漢不願爲赦先帝亦言吾周旋陳元方鄭康成閒每見啓告治亂之道備矣曾不語赦也若景升季玉父子歲歲赦宥何益於治故亮時軍旅屢興不妄下也自亮沒後茲制遂虧

蜀初闕三司之位以待天下賢人其卿士皆勳德融茂太常杜瓊學

通行脩衛尉陳震忠惇篤粹孟光亮直著聞皆良幹也但光好指擿

利病大長秋南陽許慈普記舊校云闕性光祿來敏舉措不慎失勢事者

指當世美名不及特進太常廣漢譚承光祿勳河東裴雋也其朝臣

尚書巴西司學義陽胡博僕射巴西姚伉侍中汝南陳祗並讚事業

以故丞相長史向朗爲左將軍朗自去長史優遊無事乃鳩合
經籍開門誘士講論古義不預世務是以上自執事下及童冠莫不
宗敬焉 冬十有一月大司馬琬卒諡曰恭侯中書令董允亦卒

超遷蜀郡太守南陽呂乂爲尙書令進姜維爲衛將軍與大將軍禕
並錄尙書事維出隴西與魏將郭淮夏侯霸戰尅之 十年涼州

胡王白虎文治無戴等率衆降衛將軍維徙之繁縣 汶山平康

夷反維復討平之過見廖立意氣自若維還假節 十一年鎮北

將軍王平卒以中監軍胡濟爲驃騎將軍假節領兗州刺史代平督

漢中事平始出軍武不大知書性警朗有思理與馬忠並垂事績平

同郡勾扶亦果壯亞平官至右將軍封宕渠侯後張翼與襄陽廖化

並爲大將故時人爲語曰前有何勾後有張廖平本養外家何氏後

復姓 夏五月大將軍禕出屯漢中 十二年魏嘉平元年也

魏誅大將軍曹爽右將軍夏侯霸來降淵子也拜車騎將軍 四

月大赦 秋衛將軍維出雍州不克將軍勾安李韶降魏 十

三年衛將軍維復出西平不克而還 十五年吳主孫權薨子亮

立來告赴如古義也 立子琮爲西河王 命大將軍禕開府

尚書令呂乂卒以侍中陳祗守尚書令加鎮軍將軍 十六

年春正月朔魏降人郭循因賀會手刃殺大將軍費禕於漢壽諡曰

敬侯禕當國名略與蔣琬比而任業相繼雖典戎於外慶賞刑威咸

咨於己承諸葛之成規因循不革故能邦家和壹自禕歿後閹宦秉

權衛將軍維自負才兼文武加練西方風俗謂自隴以西可制而有

禕常裁制至是無禕屢出師旅功績不立政刑失錯矣 四月維

將數萬攻南安魏雍州刺史陳泰拔之維糧盡還 十七年魏正

元元年也 春衛將軍維督中外軍事大赦 夏六月維復出

隴西魏狄道長李簡舉縣降維圍襄武魏大將徐質拔之維拔狄道

河間按胡三省通鑑注云當作關臨洮三縣民入蜀居於縣竹及繁 是歲魏

帝齊王廢高貴鄉公卽位

十八年春衛將軍維復議出征征西

大將軍張翼廷爭以小國不宜黷武維不聽

夏率車騎將軍夏

侯霸及翼出狄道大破魏雍州刺史王經於洮西經衆死數萬經退保狄道城翼曰可矣不宜進或毀此成功爲虵畫足維必進魏征西

將軍陳泰掾狄道維退駐鍾題

十九年魏甘露元年也

春

進衛將軍姜維爲大將軍

秋八月維復出天水至上邽鎮西大

將軍胡濟失期不至大爲魏將鄧艾所破死者衆士庶由是怨維而隴以西亦無寧歲 冬維還謝過引負求自貶削於是以維爲後

將軍行大將軍事

立子瓚爲新平王大赦

二十年春大赦

魏征東大將軍諸葛誕以淮南叛連吳魏分關中兵東下後將軍姜維復從駱谷出長城軍芒水與魏大將軍司馬望鄧艾相持 景

耀元年維以誕破退還成都復拜大將軍

史官言景星見大赦

改元

宦人黃皓與尙書令陳祗相表裏始豫政皓自黃門丞至

今年為奉車騎尉中常侍 姜維雖班在祇右權任不如蜀人無

不追思董允者時兵車久駕百姓疲弊太中大夫譙周著仇國論言

可為文王難為漢祖人莫察焉 征北大將軍宗預自永安徵拜

鎮南當作軍見三國志將軍領兗州刺史以襄陽羅憲為鎮軍督永安事

吳大臣廢其主亮立孫休來告難如同盟也 大將軍維議以

為漢中錯守諸圍適可禦敵不獲大利不若退據漢樂二城積穀堅

壁聽敵入平且重關鎮守以禦大當作之句絕見三國志敵攻關不克野無散

穀千里懸糧自然疲退此殄敵之術也於是督漢中胡濟却守漢壽

監軍王含守樂城護軍蔣舒當作斌見三國志守漢城又於西安建威武衛

石門武城建昌臨遠皆立圍守 二年夏六月立子謹為北地王

恂為新興王虔為上黨王 以征西張翼為左車騎將軍領冀州

刺史廣武督廖化為右車騎將軍領并州刺史時南郡閻宇為右衛

大將軍 秋八月丙子領中護軍陳祗卒諡曰忠侯祗在朝上希

主指下接闔宦後主甚善焉以僕射南鄉侯董厥爲尙書令

三

年魏景初元年也

秋八月追諡故前將軍關羽曰壯繆侯車騎

將軍張飛曰桓侯驃騎將軍馬超曰威侯軍師龐統曰靖侯後將軍

黃忠曰剛侯

是歲魏帝高貴鄉公卒常道鄉公卽帝位

四

年春三月追諡故鎮軍趙雲曰順平侯

冬十月大赦拜丞相亮

子武鄉侯瞻中都護衛將軍遷董厥輔國大將軍與瞻輔政以待中
義陽樊建守尙書令自瞻厥用事黃皓秉權無能正矯者惟建特不
與皓和好往來而祕書令河南郗正與皓比屋周旋皓從微至著旣
不憎正又不愛之官不過六百石常免於憂患

五年春正月西

河王琮卒

大將軍維惡皓之恣擅啓後主欲殺之後主曰皓趨

走小臣耳往者董允切齒吾常恨之君何足介意維本羈旅自託而

功效無稱見皓枝附葉連懼於失言遜辭而出後主勅皓詣維陳謝

維誘皓求沓中種麥以避內逼皓承白後主秋維出侯和爲魏將鄧

艾所破還駐沓中皓協比閻宇欲廢維樹宇故維懼不敢還

六

年春魏相國晉文王命征南

當作西見三國志

將軍鄧艾鎮西將軍鍾會雍

州刺史諸葛緒益州刺史師纂五道伐蜀大將軍姜維表後主求遣左右車騎張翼廖化督諸軍分護陽安關口及陰平橋頭黃皓信巫

鬼謂敵不來啓後主寢其事羣臣不知

夏艾將入沓中會將向

駱谷蜀方聞之遣張翼董厥爲陽安關外助廖化爲維援繼大赦改元炎興比至陰平聞諸葛緒向建威故待月餘維爲鄧艾所摧還陰平平鍾會圍樂城遣別將攻關分將蔣舒開門降都督傅僉奮戰而死

冬會以樂城不下徑長驅而前翼厥之至漢壽也維化捨

陰平還保劍閣拒會會不能尅糧運懸遠議欲還而鄧艾由陰平景谷傍入後主又遣都護諸葛瞻督諸軍距艾至漢涪不進尙書郎黃崇權子也勸瞻速行固險無令敵得入坪言至流涕瞻不從前鋒已破艾徑至涪瞻退保縣竹艾書誘瞻曰若降者必表封瑯琊王瞻怒

殺艾使戰於繇竹瞻軍敗績瞻臨陣死崇及羽林督李球尙書張遵皆必死沒命瞻長子尙歎曰父子荷恩不早斬黃皓以至敗國殄民用生何爲乃驅馬赴魏軍而死

百姓聞艾入坪驚迸山野後主會羣臣議欲南入七郡或欲奔吳光祿大夫譙周勸降魏魏必裂土封後主後主從之遣侍中張紹駙馬都尉鄧良齎璽綬奉牋詣艾降北地王謚恚憤殺妻子而後自殺

艾至成都後主輿櫬面縛銜璧迎之艾親釋其縛受其璧焚其櫬承制拜驃騎將軍使止其宮執黃皓將殺之受賄而赦之諸圍守皆奉後主勅令乃下姜維未知後主降謂且固城素與執政者不平欲使其知衛敵之難而後逞志乃迴由巴西出鄴五城會被後主手令乃投戈釋甲詣鍾會降於涪軍士莫不奮激以刃斫石

明年春正月會構艾檻車見徵會圖異

計奇維雄勇還其節蓋本兵謂長史杜預曰姜伯約比中州名士夏侯太初諸葛公休不如也鄧艾亦謂蜀人曰姜維雄兒也會維則出

同車坐同席將至成都稱益州牧以叛恃維牙爪欲遣維為前將軍
伐中國維既失策又知會志廣教會誅北諸將諸將既死徐欲殺會
盡坑魏兵還後主密書通後主曰願陛下忍數日之辱臣欲使社稷
危而復安日月幽而復明魏太后崩會命按通鑑考異引有諸字當補將發喪因
欲誅之諸將半入而南安太守胡烈等知其謀燒成都東門以襲殺
會及維張翼後主太子璿等軍眾抄掠數日乃定 三月後主舉

家東遷洛陽 丁亥封安樂縣公食邑萬戶賜絹萬匹奴婢百人

他物稱此弟兄子孫為郡都尉侯者五十餘人以譙周全國濟民封
城陽亭侯祕書令郗正舍妻子隨侍後主相導威儀封關內侯於是
尚書令樊建殿中督張通侍中張紹亦封侯劉氏凡得蜀五十年正
稱尊號四十二年 蜀郡太守王崇論後主曰昔世祖內資神武

之大才外拔四屯按當作七東京賦授鉞四七薛綜注四七二十八將也之奇將猶勤而獲濟

然乃登天衢車不輟駕坐不安席非淵明弘鑒則中興之業何容易

哉後主庸常之君雖有一亮之經緯內無骨附之謀外無爪牙之將
焉可包括天下也又曰鄧艾以疲兵二萬溢出江油姜維舉十萬之
師案道南歸艾爲成禽禽艾已訖復還拒會則蜀之存亡未可量也
乃迴道之巴遠至五城使艾輕進徑及成都兵分家滅己自招之然
以鍾會之知略稱爲子房姜維陷之莫至尅捷籌策相應優劣惜哉
愚以爲維徒能謀一會不慮窮兵十萬難爲制御美意播越矣
譔曰諸葛亮雖資英霸之能而主非中興之器欲以區區之蜀假已
廢之命北吞強魏抗衡上國不亦難哉似宋襄求霸者乎然亮政脩
民理威武外振爰迄琬禕遵脩弗革攝乎大國之間以弱爲強猶可
自保姜維才非亮匹志繼洪軌民嫌其勞家國亦喪矣

華陽國志卷第八

大同志

古者國無大小必有記事之史表成著敗以明懲勸稽之前式州部宜然自劉氏祚替而金德當陽天下文明不及曩世逮以多故族祖武平府君漢嘉杜府君並作蜀後志書其大同及其喪亂然逮在李氏未相條貫又其始末有不詳第璩往在蜀櫛沐艱難備諳諸故事當作事故按事句絕讀故下屬也更敘次顯挺年號上以彰明德下以治違亂庶幾

萬分有益國史之廣識焉魏咸熙元年蜀破之明年也以東郡袁邵爲益州刺史隴西太守安平牽弘爲蜀郡金城太守天水楊欣爲犍爲太守 後主旣東遷內移蜀大臣宗預廖化及諸葛顯等并三

萬家於東及關中復二十年田租董厥樊建並爲相國參軍 冬

分州置梁州遣厥建兼散騎常侍使蜀慰勞 晉泰始元年春刺

史袁邵以治城將被徵故蜀侍郎蜀郡常忌詣相國府陳邵撫卹有

方遠國初附當以漸導化不宜改易州將失遐外心相國聽留辟忌
爲舍人 冬十月晉武帝踐祚 二年春武帝弘納梁益引援

方彥用故黃金督蜀郡柳隱爲西河巴郡文立爲濟陰太守常忌河
內縣令 四年故中軍士王富有罪逃匿密結亡命刑徒得數百

人自稱諸葛都護起臨邛轉侵江原江原方略吏李高閭術縛富送
州刺史童策斬之初諸葛瞻與鄧艾戰於緜竹也時身死失喪或言
生走深逃瞻親兵言富貌似瞻故富假之也 五年散騎常侍文

立表復假故蜀大臣名勳後五百家不預廝劇皆依故官號爲降

六年分益州南中建寧雲南永昌興古四郡爲寧州 七年汶

山守兵呂匡等殺其督將以叛族滅之初蜀以汶山西五郡北逼陰
平武都故於險要置守自汶山龍鶴冉駝白馬匡用五圍皆置脩屯
牙門晉初以禦夷徼因仍其守 八年三蜀地生毛如白毫三夕

長七八寸生數里 十年汶山白馬胡恣縱掠諸種夏刺史皇甫

晏表出討之別駕從事王紹等固諫不從典學從事蜀郡何旅諫曰
昔周宣王六月北伐者獫狁孔熾憂及諸夏故也今胡夷相殘戎虜
之常未爲大患而盛夏出軍水潦將降必有疾疫宜須秋冬圖之未
晚晏不聽遂西行軍城比人當有麇入營中軍占以爲不祥晏不悟
胡康水子燒香言軍出必敗晏以爲沮衆斬之 夏五月軍至都

安屯觀坂上旅復諫曰今所安營地名觀坂上自當作觀下反上當作

卜之按自上觀下反卜之七字爲一句象徵不吉昔漢祖悟柏人以免難岑彭惡彭

亡而不去遂陷於禍宜移營他所晏不納其言夜所將中州兵蔡雄
宣班張儀等以汶山道險心畏胡之強晏復諫干時衆庶所怨遂引
牙門張弘督張衡等反殺晏衆夜亂不知所爲惟兵曹從事犍爲楊
倉鸞弓力戰射百餘發且詈雄衆擊之矢盡見殺從事廣漢王紹亦
赴之死初晏未出蜀中傳相告曰井中有人學士靳普言客星入東
井東井益州之分野憂刺史戒客人耳又有猛風是逆風其日觀卦

用事若軍西行獲觀坂門人向天井益可慮也故旅勲諫云卒如其言弘等遂誣表晏欲率己共反故殺之求以免罪其衆抄掠百姓廣漢主簿李毅白太守弘農王濬宜急救益州禍亂保晏無惡必爲弘等所枉害濬從之而晏主簿蜀郡何攀以母喪在家聞亂釋纓經詣洛訴晏忠孝而弘等惡逆事得分明詔書因以濬爲益州刺史加輕車將軍濬斬弘等益州平

咸寧三年春刺史濬誅犍爲民陳瑞初以鬼道惑民其道始用酒一斗魚一頭不奉他神貴鮮潔其死喪產乳者不百日不得至道治其爲師者曰祭酒父母妻子之喪不得撫殯入弔及問乳病者轉奢靡作朱衣素帶朱幘進賢冠瑞自稱天師徒衆以千百數濬聞以爲不孝誅瑞及祭酒袁旌等焚其傳舍益州民有奉瑞道者見官二千石長吏巴郡太守犍爲唐定等皆免官或除名

蜀中山川神祠皆種松柏濬以爲非禮皆廢壞燒除取其松柏爲舟船惟不毀禹王祠及漢武帝祠又禁民作巫祀於是

蜀無淫祀之俗教化大行有木連理嘉禾黃龍甘露之祥 三月

被詔罷屯田兵大作舟船爲伐吳調別駕何攀以爲佃兵但五六百人無所辨宜召諸休兵借諸郡武吏并萬餘人造作歲終可成濬從之攀又建議裁船入山動數百里艱難蜀民冢墓多種松柏宜什四市取入山者少濬令攀典舟船器仗 冬十月遣攀使詣洛表可

征伐狀因使至襄陽與征南將軍羊祜荊州刺史宗廷論進取計

四年春漢中都吏龔祚等謀殺太守姜宗以叛宗覺堅守祚等燒南鄭市及平民屋族誅 刺史濬當遷大司農至漢壽重遣參軍

李毅詣洛與何攀並表求伐吳 五年詔書拜濬龍驤將軍假節

監梁益二州軍事除何攀郎中參軍事以典軍從事張任趙明李高徐兆爲牙門姚顯郄堅爲督冬當大舉秋攀使在洛安東將軍王渾表孫皓欲北侵請兵朝議征却須六年攀因表可因今取之策皓必不自送帝乃許焉 冬十有二月濬因自成都帥水陸軍及梁州

三水胡七萬人伐吳臨發斬牙門將李延所愛侍將也以爭騎斬衆莫不肅至江州詔書進濬平東將軍都督二州巴東監軍唐彬及平南軍皆受指授別遣參軍李毅將軍由涪陵入取武陵會巴陵

太康元年春三月吳平攀毅以下功封各有差以淮南胡羆爲益州刺史濬遷輔國將軍 初濬將征問靳普今行何如普對曰客星

伏南斗中而太白歲星在西方占曰東方之國破必如志矣普學術不貪榮華卒於布衣 三年更以益梁州爲輕車當作州句絕按下文元康六年

復以梁益州爲重州可證也刺史乘傳奏事以蜀多羌夷置西夷府以平吳軍司張牧爲校尉持節統兵州別立治西夷治蜀各置長史司馬 五

年罷寧州諸郡還益州置南夷校尉持節如西夷皆舉秀才廉良

八年武帝子成都王穎受封以蜀郡廣漢犍爲汶山十萬戶爲王國易蜀郡太守號爲成都內史 元康六年復以梁益州爲重州

遷益州刺史栗譏爲梁州加材官將軍揚烈將軍趙廞爲益州刺史

加折衝將軍

關中氐及馬蘭羌反寇天水略陽扶風始平武都

陰平發梁州及東羌鎮西討之不克益州遣牙門馬玄尹方救援之

以鹿車運成都米給軍糧

八年廩至州雖崇簡約而性實奢泰

略陽天水六郡民李特及弟庠閼式趙肅何巨李遠等及氐叟青叟數萬家以郡土連年軍荒就穀入漢川詔書不聽入蜀益州勅關禁之而戶曹李苾開關放入蜀布散梁州及三蜀界 汶山興樂縣

黃石北地盧水胡成豚堅安角成明石等與廣柔平康文降劉紫利羌有讎遂與犍宕羌邛逢等數千騎劫縣令求助討紫利太守楊邠撻殺豚堅而降其餘類餘類遂叛殺長吏 冬西夷校尉西平麴

炳表出軍遣牙門將孫眺爲督護萬人征之戰於常安大爲胡所破

九年炳以敗軍徵還晉

當衍

夏用江夏太守陳總爲代胡退

散

永康元年詔徵刺史廩爲大長秋遷成都內史中山耿滕爲

益州刺史折衝將軍因廩所服佩初廩以晉政衰而趙星黃占曰星

黃者王陰懷異計蜀土四塞可以自安乃傾倉賑施流民以收衆心以李特弟庠衛六郡人勇壯厚卹遇之流民恃此專爲劫盜蜀民患之滕數密表流民剛戇而蜀人懦弱客主不能相饒宜移還其本土不者與東三郡隘地觀其情態漸不可長將移秦雍之禍於梁益矣又言倉庫虛竭無以應鋒鏑之急必益聖朝西顧之憂由是廠惡滕州被詔書已遣文武士千餘人迎滕滕以廠未出州故在郡廠募庠黨羅安王利等劫滕大敗於廣漢宣化亭殺傳詔者滕議欲入州城功曹陳恂諫曰今州郡並治兵怨搆日深入城必有大禍不如安住少城檄諸縣合村保以備秦氏陳西夷行至且觀其變不爾可退住犍爲西渡江原以防非常滕不從

冬十有二月滕入城登西門廠遣親近代茂取滕茂告之而去

廠又遣兵討滕滕軍敗績自投少城上吏左雄負滕子奇依民宋寧藏廠購千金寧不出廠尋敗得免郡吏皆竄走惟陳恂面縛詣廠請滕死喪廠義而不殺也恂與

戶曹掾常敞共備棺冢葬之

敞又遣軍逆陳總總至江陽聞敞

有異志主簿趙模進曰今州郡不協必生大變惟當速行府是兵要

助順討逆莫有動者也總更緣道遲留至南安魚涪津以與敞軍遇

模白總散財貨募士卒距戰若克州軍則州可得不克順流而退必

無害也總不能更曰趙益州忿耿侯故殺之與吾無嫌何為如此模

曰今州起事必當立威雖不戰無益也言至垂涕總不聽衆弛總逃

草中模衣總服格戰敞兵殺模見非總乃搜求總殺之敞自稱大當

都督大將軍益州牧以武陽令蜀郡杜淑別駕張粲巴西張龜西夷

司馬龔尼江原令犍為費遠等為左右長史司馬參軍徙犍為太守

李庠為威寇將軍召臨邛令涪陵許弇為牙門將召諸王官莫敢不

往又以廣漢太守張微後賢志及目錄皆作微汶山太守楊邠成都令費立為

軍祭酒時庠與兄當有特字弟流驤妹婿李含天水任回上官晶扶風李

攀始平費他氏符成隗伯董勝等四千騎在北門敞使庠斷北道庠

素東羌良將曉軍陳不用麾志舉矛為行伍庠勸稱大號漢庠部下
放攬廠等忌之遂於會所斬庠及其兄子弘等十餘人慮特等為變
又命為督將安慰其軍還特庠喪其夜特流徹眾散歸絲竹廠遣故
陰平令張衡升遷費怒就綏納皆為特所殺 許弇求為巴東監

軍杜淑張粲逆不許弇怒於州閣下手刃殺淑粲即亦殺弇二子廠
腹心也 永寧元年春正月廠遣萬餘人斷北道次絲竹以長史

費遠為繼前軍宿石亭特等相合得七百餘人夜襲之因放火殺廠
軍略盡進當有攻字成都城中恐懼中郎常美與費遠李苾張微等夜斬

關委廠走文武散盡廠獨與妻子乘小船順水至廣都為下人朱竺
所殺哀舊校云疑今按哀當衍舊校非也廠字和叔本巴西安漢人也祖世隨張魯

內移家趙趙王倫器之歷長安令天門武陵太守來臨州長子曷在
洛亦見誅 特流至成都殺西夷護軍姜發及龔尼相都令袁洽

因大抄掠遺牙門王角李基詣洛表狀初梁州刺史羅尚聞廠反表

威非雄才又蜀人不願爲亂必無同者事終無成敗亡可計日而俟
惠帝因拜尙平西將軍假節領護西夷校尉益州刺史給衛節兵一
千梁州兵二千又配上庸都尉義部千五百人合四千五百人遷梓
潼太守樂陵徐儉爲蜀郡揚烈將軍隴西辛冉爲廣漢太守 羅

尙又表請牙門將王敦兵七千餘人入蜀特等聞尙來甚懼使弟驥
奉迎特厚進寶物尙以驤爲騎督特流奉牛酒勞尙於縣竹王敦說
尙曰特等隴上塞盜劫賊宜軍無後患也會所殺之辛冉本趙王倫
所用非資次召當還欲討厥以自新亦言之尙不納又冉謂特曰故
人相逢不吉當凶特自猜懼三月尙至州治汶山羌反於都安之天
拭山遣王敦討之殺數千人大沒女弱爲生口敦單馬馳爲羌所殺

御史馮該張昌攝秦雍州從事督移還流民徙者萬餘家而特

兄輔素留鄉里託言迎家卽至蜀因謂特曰中國亂不足還遣天水
閻式累詣尙求弛領校權停至秋並進貨賂於尙該許之及秋又求

至冬辛冉李苾以爲不可必欲移之式爲別駕杜弢說逼移利害弢亦欲寬迸民一年辛冉李苾以爲不可尙從之弢致秀才板出還家知計謀不行故也 時有白虹頭在井里尾在東山拖太城上治

中從事巴西馬休問閻式曰此何祥也式曰占言下有万屍氣甚迫於城非佳應天孽可違乎平西若能寬迸民災自消矣冉苾又白尙流民前厥亂際多所枉沒宜因移設關以奪取 秋七月尙移書

梓潼所在抱關 八月關皆城閻式曰無寇而城讎必保之蜀將

亂矣 九月遣軍軍緜竹揚言種麥實備越逸冉又購特流首百

匹特驤悉更其購云能送六郡大姓閻趙任楊李上官及氏叟梁竇符隗董費等首百匹流民本無還意大驚駭趣特 冬十月特流

乃保赤祖爲二營特稱鎮北益州流鎮東皆大將軍兄輔驃騎弟驤驍騎特長子蕩鎮軍少子雄前軍李含西夷校尉含子國離及任回上官晶李攀費他皆將軍以天水任臧上官惇楊褒楊發楊珪王達

麴歆陰平李遠武都李博略陽夕斌等參佐而閻式何巨趙肅亦爲
竇從其餘皆有官號辛冉遣護軍會元攻之爲特所殺尙督護田佐
牙門劉並助冉復敗進圍廣漢尙復遣犍爲太守李苾長史費遠助
冉不能克冉託罪於緜竹令南郡岐苞斬之而潰圍走德陽特等得
廣漢詐爲表奏稱引梁統推舉竇融故事以自貴尙書檄告喻閻式
式答曰辛冉傾巧杜景狂發會元小豎田佐血氣不治李叔平才經
廊廟無將帥之氣討羸之羌謂可長爾式前爲節下及杜景文論留
徙之宜人懷桑梓孰不願之但往初至隨穀庸賃一室五分復值雨
潦乞須冬熟而不見聽必窮鹿抵虎但恐繩之大過迸民不肯延頸
受刃其憂在後卽聽式言寬使治嚴不過去九月盡集十月坐進道
令達鄉里何有如此也雅聽未察卹彼過言今辛冉奴亡叔平長遯
支分勢解事漸及己所謂不寤由突遠薪而有焦爛之客也尙率其
民盡渡郾水以南尙阻長圍自都安至犍爲七百里捍特特等保廣

漢 太安元年春尚牙門夏匡攻李特於立石失利征西遣督護

衙博西征討特博次梓潼晉復拜前廣漢太守張微廣漢太守據德

陽 尚遣督護巴西張龜督四十牙門軍繁城博方遣參軍蒙紹

誘特降尚貽博書曰昔年得李流牋降心款款由時威帖得還爲寇

聞特委誠於下吏而流驤七八千人來寇日至姦凶之態詭譎不測

不可不重以持之也博不從故爲特所破於陽沔梓潼太守張演委

倉庫走巴西巴西按此複衍二字下文郡丞乃梓潼之郡丞不得重巴西也郡丞毛植五官襄班

舉郡降特 衙博才兼文武征西大將軍河閒王深器之初爲陰

平太守爲從事巴郡毛扶所免怨梁州人及西征征西許雄以陽沔

之役寇尚未至聞鶴鳴便退博欲委罪梁州託以自不供給梁州治

中表之博以是得罪晉乃更用許雄爲梁州刺史 八月特破德

陽流次成都北上李驤在毗橋尚遣將張興僞降於驤覘士衆還以

告尚尚遣叟兵襲驤破之流驤并衆攻尚軍軍失利喪其器甲

梁州刺史許雄數遣軍討特特備險不得進征西乃遣監軍劉沈將西征以中國有事不果而南夷校尉李毅遣叟兵助尙軍數挫特勢日盛

二年春正月朔特攻尙水上軍特從益底渡黨徒從赤水

渡入郫及水西南緣江守軍皆散走太守徐儉逼降尙保太城特營少城而流軍江西之檢上蜀民先已結村保特分人就主之雄書諫特收質任無得分散猛銳流亦諫之特怒曰大事以定但當安民何緣疑動而劫害不止尙從事蜀郡任叡說尙曰侵暴百姓又分人衆散在諸村怠沓無備殆天亡特之秋也可告諸村密剋戰日內外擊之破特必矣尙從之從縋出叡使宣旨告諸村期二月十日同時討特手書隱語曰在彼楊水叡先詣特降究觀虛實特問城中叡曰米穀已欲盡但有貨帛耳因求省家特與啓信諸村悉從叡叡還報尙如期出軍討特諸村亦起大殺特衆

當重有特衆二字

破退追及於繁之官

桑斬特及兄輔

當有李字

遠等李流斂餘衆還赤祖尙乘勝但施遊軍征

盪傳特首洛陽焚其屍

李雄以李離為梓潼太守衆還赤祖推

流為大將軍大都督

當有益州牧三字

而荊州刺史宋

當作宗下同

岱水軍三萬

助尙次墊江前鋒建平太守孫阜破特德陽守將蹇碩太守任臧徑

至涪

三月尙遣督護張龜何冲左汜等軍繫城而繇竹降涪陵

民藥紳杜阿應尙尙又遣督護常深軍毗橋為流驤禦蕩雄攻紳深

破驤殺李攀弟恭

絕句

傷為主

當有誤

左汜黃閭逼攻特

當有

北營營中氏

羌因符成隗伯石定叛應汜閭攻蕩雄蕩母羅擐甲略陳伯手刃羅

當重有羅字

傷目壯氣益烈又時成伯戰於內汜閭攻其外自晨至日中

營垂欲破會流破深蕩雄破紳還適與汜閭會大破之成伯將其黨

突出詣尙蕩策馬追退軍為叟長矛所搯死羅雄祕不發喪以安衆

心流以特蕩死而岱阜並至恐懼李含勸流降流從之雄與驤諫之

不納遣子世及含子胡質於阜

李離聞父舅將降自梓潼還欲

諫不及雄與離謀襲阜曰若功成事濟當為人主要三年一更雄曰

與君計雖定老子不從若何離曰當制之若不可便行大事雖君叔

勢不得已老父在君夫復何言雄乃說六郡人士激以尚之自侵懼

以共殘蜀民之禍陳當有襲字阜可富貴之秋得以破阜阜軍死者甚衆

而岱病亡荊州軍退轉攻尚 流慙其短軍事任雄雄數破尚當重

有尚字軍保太城 夏四月尚殺隱士劉敞故州牧劉雄曾孫也隱

居白鹿山高尚皓首未嘗屈志亦不預世事尚信祆言殺之殺之日

雷震人大雨城中出水按此下四十四字事與前復當有誤也五月李流降於孫阜遣

子為質不可乃舉兵與李離襲阜阜軍敗績宋岱病卒墊江州軍退

雄逼攻尚尚保太城中 六月雄從帛羊頽渡攻殺汶山太守陳

圖按圖當作昔通鑑考異云李雄殺陳圖華陽國志作陳昔據郫城今從載記可證也李至校刊此書轉依載記改昔作圖耳

秋七月朔雄入郫城流盡移營據之三蜀民流迸南入東下野

無煙火鹵掠無處亦尋飢餓唯涪陵民千餘家在江西依青城山處

士范賢自守 平西參軍涪陵徐輿求為汶山太守撫帥江西民

與官掎角討雄尚不許輿怨之求使江西因叛降雄雄以為安西將軍當有說賢二字給其軍糧雄得以振 九月流病死雄復稱大將軍都

督州牧尚數攻郢雄使武都朴泰譎尚曰李驤與雄以飢餓孤危日鬪爭相咎驤欲將民江西食穀若潛軍來我為內應可得也尚以為然大與金寶泰曰今事故未立効後取不晚也又求遣人自隨覘伺尚從之泰要發火遣隗伯諸軍攻郢驤使道設伏以長梯上伯軍伯軍見火起皆爭緣梯雄因放兵擊之大破尚軍雄徑追退夜至城下稱萬歲曰已得郢城矣入少城尚乃覺保太城 驤別攻犍為斷

尚運道獲太守武陵龔恢恢往為天水西縣令任回為吏回問曰識故吏不恢曰識汝耳郡吏星散惟功曹楊渙侍衛回謂曰卿義人也吾力恐不能救龔君不能免也卿宜早去渙曰背主求生何如守義而死遂并見殺 以李溥為犍為太守 雄生獲伯知其傷死

創也伯女為梁雙妻為己用故不殺 閏十二月尚糧運不繼而

被攻急夜退由牛鞞水東下留牙門張羅持城終夜比雄覺去以遠
倉卒失節鉞羅特從後得之并獲資應雄得成都 梁州刺史許

雄以討賊不進檻車徵詣詔獄惟護軍與漢國太守杜孟治都戰帥

趙汶荊州太守梓潼舊校云疑闕守漢中 永興元年春正月尙至江

陽軍司辛寶詣洛表狀詔書權統巴東巴郡涪陵三郡供其軍賦

冬尙移屯巴郡遣軍掠蜀中斬雄從祖冉獲驥妻咎子壽兄弟

十二月雄太尉李離伐漢中當有都字戰帥趙汶 永嘉元年春

尙施置關戍至漢安熨道 時益州民流移在荆湘州及越雋牂

柯尙書當作施置郡縣就民所在又施當有置字諸村參軍 三月關中

流民鄧定旬氏等掠漢中冬辰勢以叛巴西太守張燕帥牙門武肇

漢國郡丞宣定遣兵圍之氏求救於李雄 夏五月雄遣李離李

雲李璜李鳳入漢中救定杜孟治聞離至命燕釋圍保州城初燕攻

定定衆飢餓僞降送金一器與燕燕納之居七日氏至定還冬辰勢

燕進圍之不聽孟治言離至先攻肇營營破次攻定又破之燕懼戰
將百騎走離等大破州軍牙門蔡松退告孟治曰州軍已破賊衆不
可待也孟治怖護軍欲城守謂孟治曰賊來雖衆客氣之常李區區
有東南之逼必不分宿兵於外不過迎拔定氏耳孟治曰不然雄冒
稱帝王縱橫天下以遣重衆必取漢中雖有牢城士民破膽不可與
待寇也乃開門退走護軍北還孟治入大桑谷民數千家車數千兩
一夜行才數十里而梓潼荆子舊校云疑字有誤以父與孟治有隙合子弟
追之及於谷口孟治棄子走荆子獲之及吏民千餘家惟漢國功曹
毋建荷檐杖曰吾雖不肖一國大夫國亡不能存終不屬賊也餓死
谷中積十餘日離等引還 漢中民句方白落率吏民還守南鄭

二年詔書錄尙討特功加散騎常侍都督二州進爵夷陵侯長

子宇以佩奉車都尉拜次子延壽騎都尉

梁州以雄所破壞晉

更以皇甫商爲梁州商不能之官更用順陽內史江夏張光爲刺史

治新城

漢中民逼李鳳寇掠東走荆沔

三年冬天水旬琦

張金苟略陽羅兼殺雄太尉李離降尚雄太傅驤李雲李璜攻兼爲

所破殺雲璜雄從弟也爲

當有司徒二字雲司徒璜司空也

司空

十有二月琦

等送離母子於尚尚斬之分其室

四年天水文石殺雄太宰李

國以巴西降尚梓潼巴西還屬

初巴西譙登詣鎮南請兵鎮南

無兵表爲揚烈將軍梓潼內史義募三巴蜀漢民爲兵克復州郡先

征宕渠殺雄巴西太守馬脫還住涪折衝將軍張羅進據犍爲之合

水巴蜀爲語曰譙登治涪城文石在巴西張羅守合水巴氏那得前

秋七月尚薨於巴郡尚字敬之一名仲字敬真襄陽人也歷尚

書丞郎武陵汝南太守徙梁州臨州

詔書除長沙太守下

邳當

此二字

皮素泰昆

當衍此二字

爲益州刺史兼西夷校尉揚烈將軍領義募

人及平西將軍當進治三關時李驤急攻譙登素次巴東勅平西將

軍張順楊顯救登尚子宇恚恨加登糧運不給素至涪欲治執事執

事懷懼

冬十有二月素至巴郡降人天水趙攀閻蘭等夜殺素

素字泰混下邳人也建平都尉暴重殺宇及攀巴郡亂不果救登三府官屬上巴東監軍冠軍將軍南陽韓松爲刺史校尉治巴東

五年春正月李驤破涪城獲登巴西梓潼復爲雄有

荆湘有亂

氏符成隗文作亂宜都西上巴東雄衆攻夔道走犍爲太守魏紀殺江陽太守姚襲 二月氏隗文等反於巴東暴重討之未下重殺

刺史韓松松字公治南陽人魏大司徒暨孫也自領三府事

三

月三府文武與巴東太守吏共囚重及妻子於宜都殺之共表巴郡

太守張羅字景治

當衍此三字

行三府事羅治枳自討隗文於宮圻破降

之旬月復叛劫巴郡太守黃龕託以爲主龕窮急

當有欲字自殺主簿楊

預諫曰文之宿惡江州所知拘劫明府誰不危心虛假之名孰當信

之可使張將軍知其丹誠何遽如此龕曰賊已道斷何緣得令景治

知之預乃作龕書遺弟逃氏詣羅羅曰子宜宣誠吾自明之耳隗文

聞怒囚龔執預問遣信狀龔曰不遣也文乃考預一日夜預不言文欲殺龔預死杖下文義之赦龔羅遣軍討之破還羅自討之敗績身

死羅字景治河南梁人也巴中無復餘種矣文驅略吏民西上降雄

當重有雄字

將任回獲犍爲太守魏紀三府文武共表平西司馬王異行

三府事又領巴郡太守梁州刺史張光復治漢中

六年龍驤將

軍江陽太守犍爲張啓與廣漢羅琦共殺異異字彥明蜀人也啓復

行三府事羅琦行巴郡太守啓病亡啓字進明犍爲人蜀車騎將軍

張翼孫也三府文武復共表涪陵太守義陽向沈行西夷校尉當有率字

吏民南入涪陵

建興元年春沈卒涪陵多疫癘蜀郡太守江陽

程融宜都太守犍爲楊芬西夷司馬巴郡常歆都安令蜀郡常當有倉

弘等共推汶山太守涪陵蘭維爲西夷校尉

時中原旣亂江東

有事救援無所顧望融等共率吏民北出枳欲下巴東遂爲雄將李

恭費黑所破獲

五月梁州刺史張光討王如黨涪陵李運巴西

王建於盤蛇便作山疑其欲叛也運建走保柁山光遣軍攻破殺之
建女聳楊虎保黃金山以叛討之虎夜棄營還趨厄水去州城四十
里住光遣其子孟萇討之迭有勝負光求助於武都氐王楊茂搜虎
亦求救於茂搜初茂搜子難敵遣養子適賈梁州私買良人子一人
光怒鞭殺之難敵以是怨光曰使君初來大荒之後兵民之命仰我
氐活氐有小罪不能贖也陰謀討光會光虎求救 秋八月茂搜

遣難敵將騎入漢中外言助光內實應虎至州城下光以牛酒饗勞
遣與孟萇共討虎孟萇自處前難敵繼後與虎戰久難敵從後擊孟
萇大破生禽孟萇殺之 九月光恚死州人共推始平太守胡子

序領州

冬十月虎與氐急攻州城子序不能守委城退走氐虎

得州城發光冢焚其屍喪難敵得光鼓吹妓樂自號刺史虎領吏民
入蜀漢中民張咸等討難敵難敵退還咸復入蜀於是三州沒爲雄
矣 蜀自太康至於太安頗怪異成都北鄉有人嘗見女子僻入

草中往視物如人有身形頭目口無手足能動搖不能言廣漢有馬
生角長大各半寸又有驢無皮毛袒肉飲食數日死繁什邡郫江原
生草高七八尺莖葉赤子青如牛角內史耿滕以爲朱草表美於成
都王元康三年正月中歟一夜有火光地仍震童謠曰郫城堅盜底
穿郫中細子李特細又曰江橋頭闕下市成都北門十八字及尙在
巴郡也又曰巴郡葛當下美巴郡皮素之西上也又曰有客有客來
侵門陌其氣欲索 武平府君云譙周言巴當作巴沒三十年後當

有異人入蜀蜀由之亡蜀亡之歲去周三十三年又曰宋岱不死則

孫臏不交

當作反

市

當作市

三旬之閒流雄之首懸於轅門愚以爲宋岱

方進臏見得質及更推

當作推

敗設岱生在無所保據矣杜弢自湘中

與柳監軍書曰前諸人不能寬李特一年又不以徐士權爲汶山太

守而屯故如此謂失之毫釐差以萬里斯言有似然必不以杜漸爲

恨者流民初西當承詔書閉關不入其次易代趙廠選宜內遣平西

絲竹之會聽王敦之計少可以寧毫釐之覺非彼之謂也譔曰先王規方萬國必兼親尊賢能而任宗盟者蓋內藩王室外禦叛侮故元牧有連率之職奉貢無失職之愆爰及漢氏部州必卿佐之才郡守皆台鼎之望是以王尊王褒著名前世第五倫蔡茂徑登三司斯作遠之準格不凌之令範也自大同後能言之士無不以西土張曠爲憂求王皇宗樹賢建德於時莫察視險若夷缺垣不防任非其器啓戎長寇遂覆三州詩所謂四國無正不用其良也

華陽國志卷第八